

سهام عثمان

حكاية نادرة

رواية

صدرت الطبعة الأولى فى مايو 2019



حكاية نادرة (رواية)

بطاقة الكتاب

عنوان المؤلف	حكاية نادرة
المؤلف	سهام عثمان
التصنيف	رواية
رقم الإيداع القانوني	219 - 9516
عدد الصفحات	276 صفحة
رقم الإصدار الداخلي	403 الطبعة الأولى مايو 2019
المقاس	20X14
تصميم الغلاف	مؤسسة النيل والفرات

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: 13242 / 2017 - بطاقة ضريبية: 01-35-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 تليفاكس: 020554372901

البريد الإلكتروني: nagyegy200064@gmail.com alnilewaalfourat@gmail.com

البريد الإلكتروني: [alnilewaalfourat.com](http://www.alnilewaalfourat.com)

المقر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الد3 - عقار 304

الإهداء

بسم الله الرحمن الرحيم
اهداء الى كل من أعزهم قلبي وأمتلأ بحبهم وفاض ليحتوى
كل عزيز وغالى
زوجي الحبيب الذي هو لي ظهر وسند
أولادى مصدر سعادتي وهنائى
أحفادى أقمارى وشموسى التى تضى الدنيا فى عيني
أخواتى أنشودة الفؤاد ودفئ الروح من برد الأيام
أصدقائى بئر الأسرار ومشجعى الأفكار
الى كل من يكن لي فى قلبه لمحة من تقدير واحترام أهدي
روايتى لأساتذتى الأفاضل وجمهورى الحبيب
أرجو أن تنال إعجابكم

سهام عثمان

حكاية نادرة

تمتلئ الدنيا بشخصيات غريبة وعجيبة و شخصيتنا شخصية
نادرة إسمحولى أقتحم حياتها وأكشف عن أسرارها
نادرة بنت شخصيتها قوية جدا ولا تخاف من أحد امرأة
بمائة رجل

فى حارة من الحارات القديمة التى تملئ بلدنا نادرة بطة
قصتنا تسكن فى بيت قديم . صاحبتة امرأة سليطة اللسان

- أم صلاح - إنتى يا مخفية ياللى إسمك نادرة ...إقفلى
المية شوية مش عارفين نغسل وشنا

- نادرة - يا فتاح يا عليم يا رزاق ياكريم ربنا يتوب علينا
من البيت اللى يغم النفس دا

(الأم مريضة ونائمة فوق السرير)

- الأم - مغلش يا بنتى نحمد ربنا ياما فيه ناس مش لاقية
أوضة تحت السلم

- نادرة - حامدينه وشاكرينه ياما بس الناس تصحى على
صوت العصافير على صوت قرآن مش تصحى على

صوت أم جلمبوا دى كانت جيرة مهببة

- يالا بقى يا أم نادرة قومى علشان تفطرى وتاخذى الدوا

- الأم - وتعبتى نفسك ليه يابنتى

- نادرة - تعبك راحة يا أمى متقوليش كدا أنا فى ديك

النهار لما أخدمك بس إنتى إدعيلى ربنا يجبرنى ويزقنى

أحسن إمبراح وقفوالى على ضوافيرهم فى السويقة

- ...مش طايقنى ياما مش عارفة مفروسين منى ليه
...زايدة عنهم إيد والا رجل
- الأم - بيغيروا منك يا حبيبتي
 - نادرة - طيب الستات وقلنا ماشى بيغيروا طيب والرجالة
 - الأم - الرجالة متغازين إنك أجدع من رجالة كتير إنتى
فكرك واقفة السوق دى بالساهل
 - نادرة - ربنا يتوب علينا من وقفة السوق دى وأعمل لى
حتة محل كدا قيمة ...هاااه توكلت على الله...عايزة
حاجة قبل ما أمشى ياما
 - الأم - لا يا حبيبتي أعود سلامتك
(على السلم تقابلها أم صلاح)
 - أم صلاح - جرى أيه يا ست نادرة أنتى مش سمعانى
وأنا عمالة أنادى والا بتطنشى
 - نادرة - صباح الخير يا أم صلاح
 - أم صلاح - شوف يا أخويا البرود ده أسمه أيه دا سيبانى
وخارجة ولا كانى بكلمها أنا مش عارفة شايفة روحها
على أيه روحى جتك وجع بطنك
(فى السوق وبالتحديد فى دكان أم نعيم)
 - نادرة - صباح الخير يا خالتى أم نعيم
 - أم نعيم - صباح النور يا نادرة يا بنتى
 - نادرة - ناولينى ترابيزتى والأجرة أهى
 - أم نعيم - ما تخلى يا حبيبتي
 - نادرة - ربنا يخليكى يا خالتى والله لولاكى ما عارفة كنت
هعمل أيه فى السوق دا

- أم نعيم - كذا طب بعد ما ربنا يجبرك تعالى إشرى الشاى
- معايا عندى لكى خبر حلو
- نادرة - عيني يا ست الكل
- (وقفت الزبائن على ترابيزة نادرة)
- أحد الزبائن - الطماطم بكام يا نادرة
- نادرة - بجنيه ونص
- زبونة - والله إنتى أرخص سعر فى السوق يا نادرة
- نادرة - علشان الغلابة تاكل قرب قرب بجنيه و

نص

- (فى وقت بسيط أنتهت نادرة من بيع الطماطم)
- زبونة - ها . مفيش طماطم يا نادرة
 - نادرة - جبرنا يا أم ريم بكرة وعليكى خير
 - (البائعين ينظرون فى غيظ أبو تمام لأبو سليم)
 - أبو تمام - شايف جبرت الملعونة مش عارف الناس
 - بيحبوا يشتروا منها ليه طيب ما أنا معلق التسعيرة بجنيه
 - ونص مجبرتش زيه ليه؟
 - أبو سليم - أنا عارف طلعتنا من أنهى داهية
 - نادرة - الترابيزة يا ست ست أم نعيم
 - أم نعيم - اللهم صلى ع النبى جبرتى يا حبيبتى
 - نادرة - الحمد لله ربنا عالم باللى راقدة فى البيت...ألا
 - بالحق إنتى كنتى بتقوليلى إن فيه خبر حلو
 - أم نعيم - أه م الحق شوفى يا ستى إنتى عارفة فايز ابن
 - الحاج أنور؟...الحاج أنور تاجر المواشى
 - نادرة - أه فايز أنور ماله

- أم نعيم - جاني إمبراح وكلمني عليكى
- نادرة - كلمك عليا إزاي يعنى
- أم نعيم - طلب إيدك يا بت وإنتي عارفة بقى إنهم أغنيا ومبسوطين وهيرحك من قاعدة السوق
- نادرة - ومين قالك إنى هوافق عليه دا واد شايف نفسه كدا وعامل نفسه لمونة فى بلد قرفانة ...وأنا بقى النوع ده من الشبان ميعجبنيش ولا يدخل دماغى من أصله
- أم نعيم - طب بس فكرى
- نادرة - فكرت وقررت أنا عايزة واحد لسة مشفتش زيه واحد رسماه فى خيالى وبس
- أم نعيم - ربنا ينولك اللى فى بالك يا حبيبتي إنتى تستهلى كل خير
- نادرة - طب أسيبك وأطير أجيب فرخة والا أرنب والحق أعمل لقمة لأم نادرة السلام عليكم
- أم نعيم - وعليكم السلام ورحمة الله سلمى على أمك
- نادرة - يوصل يا خالتي
- (نادرة أشترت الطلبات اللازمة وفى طريقها شاب يستقل دراجة بخارية أوقع شنتط المشتريات من يد نادرة)
- نادرة - مش تفتح يا أخ
- السائق - أنا أسف جدا أنا كنت بتفادى العربية ... غصب عنى
- (إنحنوا ليرفعوا الشنتط وفجأة ألتقت عيناها)
- السائق - مين.... نادرة
- نادرة - أحمد عونى

- أحمد - يا بنت الأيه إنتى فىن من زمان
- نادرة - أنا فى الدنيا
- أحمد - دخلتى كلية أيه
- نادرة - دخلت كلية الحياه..وأنت
- أحمد - دخلت هندسة
- نادرة - هههه طول عمرك شاطر
- أحمد - بس خسارة إنك مكملتيش تعليمك ..مع إنك كنتى شاطرة
- نادرة - كنت وكان فعل ماضى
- أحمد - إنتى لسة ساكنة فى بيت أم صلاح
- نادرة - هروح فىن أم صلاح دى قدرى ومكتوبى
- أحمد - ههههه ولسة لسانها طويل زى ماهى
- نادرة - لما الهرم يتنقل من مكانه أم جلمبو تتغير
- أحمد - وطنط عاملة أيه
- نادرة - والله تعبانة شوية
- أحمد - لا ألف سلامة ...سلميلى عليها على أبقى ما أشوفها
- نادرة - يوصل يا أحمد...سلام
- أحمد - سلام تحبى أوصلك
- نادرة - أركب وراك الموتوسىكل أنت عايز أم صلاح تنشرها فى الأخبار
- أحمد - أنا بس بعرض خدماتى
- نادرة - لا شكرا سلام
- (نادرة وصلت المنزل ودخلت على والدتها)

- نادرة - السلام عليكم يا قمر
- أم نادرة - وعليكم السلاميعنى رجعتى بدرى يا نادرة
- نادرة - ياااه دانا جبرت من بدرى ياما كله ببركة دعاكى
- أم نادرة - ربنا يوقفلك ولاد الحلال ويحبب فيكى خلقه يا نادرة يا بنت زينات
- نادرة - أه بمناسبة الحب مش أنا جاتى عريس النهاردة
- زينات - والنبي يانادرة عريس منين
- نادرة تعرفى الواد فايز ابن المعلم أنور تاجر المواشى
- زينات - أه عارفاه..ماله
- نادرة - هو ده العريس ياما.. النهاردة لقيت خالتى أم نعيم بتقولى إنه طلب إيدى منها
- زينات - وماله إحنا فى ديك النهار لما فايز أنور يطلب إيدك دا هيبسطك وهينغغك
- نادرة - متقوليش كدا يا ما إنتى عارفة إن أنا آخر حاجة بفكر فيها هى الفلوس
- زينات - طب وهو فايز عيبه أيه
- نادرة - عيبه إنه مغرور وشايف نفسه حبتين وفكر إن بفلوسه يشتري الغلابة اللى زينا وأنا بقى محدش يشترينى بفلوسه حتى ولو تقلنى بالذهب
- فاهمة ياما أنا مهما يكون نادرة بنت المعلم حسان الراضى على سن ورمح والا علشان ما مات وفاتنا يقوم كل من هب ودب يفكر إنه يشترينا بفلوسه...لا ورحمة أبويا ما يحصل أبدا
- زينات - طيب بس إهدى يا بنتى أنا قولت أهو ينشلك من

- العيشة اللى إنتى عايشاها دى
- نادرة - ومالها ياما العيشة بقى واكله شاربه نايمة
 - لابسة مصلية فرضى وكفاية إنى بحط راسى ع المخذة
 - حامدة ربنا وضميرى مرتاح لا حد ماسك لى ذلة ولا عليا
 - دين لمخلوق وسمعتى زى الجنيه الذهب لا ناقصنى إيد
 - ولا رجل وربنا مدينى م الحلاوة اللى تتمناه كل بنت
 - عيشة أيه اللى مش عاجباكى دى ياما
 - زينات - ونعم بالله يا بنتى حقك عليا أنا بس نفسى
 - أشوفك أسعد مخلوقة فى الدنيا
 - نادرة - أنا سعيدة يا أمى طول مانا شيفاكى بخير
 -وبعدين سببى بقى أقوم أجهدك لقمة تاكلها
 - (بعد ما أعدت نادرة الغداء)
 - نادرة - يالا بقى يا ست زينات علشان نتغدى...خليكى
 - مرتاحة أنا هحط الصنية أ قعد جنبك ع السرير...بسم الله
 - يا ما ..م الحق حذرى قابلت مين النهاردة؟
 - زينات - مين يا حبيبتي
 - نادرة - الواد أحمد
 - زينات - أحمد ..أحمد مين؟
 - نادرة - أحمد عونى زميلى فى المدرسة إنتى مش فاكراه
 - والا أيه؟
 - زينات - قصدك أحمد بليلة
 - نادرة - أيوااا أحمد بليلة هههههه مانتي لسة فاكراه أهو
 - زينات - والنبي وعامل أيه يا نادرة
 - نادرة - عامل أيه...دا الواد بقى زى القمر...لا وأيّه

دخل كلية الهندسة وهييقى مهندس قد الدنيا
- زينات - والله بركة هو واد محترم ومؤدب ويستاهل
أحسن كلية فى الدنيا
(زينات تتنهد)

- نادرة - أيه ياما مالك بتتنهدى كدا ليه
- زينات - أفكرت إنك بسبب مرضى مكمليتيش تعليمك يا
حبيبتي سامحيني يا نادرة
- نادرة - يا لهوى أسامحك أسامحك دا أيه ياما هوفيه
شهادة أحسن من رضاكى عليا...محبش أسمع منك
الكلام دا لو بتحبينى متقوليش كدا تانى
- زينات - حاضر يا نادرة ربنا مايحرمينش منك
(جرس الباب)

- نادرة - مين خالتى أم سعيد ..إتفضلى يا مرحب
- (أم سعيد دخلت تتلصص وتشمشم
- أم سعيد - إزيك يا نادرة عاملة أيه
- نادرة - أنا بخير يا خالتى أم سعيد
- زينات - تعالى يا أم سعيد..حماتك بتحبك
- أم سعيد - ههههه مع إنى محبش ابنها
- نادرة - ليه بس كدا
- أم سعيد - أهو كدا وخلاص
- نادرة - طب أقعدى هجيبلك طبق تاكلى معانا لقمة
- أم سعيد - أكل نهار عدلك يا رب
- أم سعيد - أنا شايفة ندورة حبيبتي راجعة بدرى باين
عليها جبرت

- زينات - لا أبدا دى حتى سابت باقى الخضار عند أم نعيم
- ورجعت بسرعة علشان تغدنى وتدينى الدوا
- أم سعيد - لا حول الله يا ربى هو إنتوا عاملين الملوخية
- أورديحى والا أيه
- نادرة - لا على أرانب وجبتك حتة أرنب يا خالتى
- أم سعيد - أرانب يا حلاوة دانا بقالى كتير قوى مأكلتهاش
- نادرة - طب دوقياها بألف هنا وشفا
- أم سعيد الله.. تسلم إيدك يا نادرة يبتلاها بنصيبة عزة
- مرات إبنى طبيخها يسد النفس لا نفس ولا ريحة
- شفتى أم صلاح إتحانقت معايا النهاردة أل ايه شمت
- ريحة الرنجة والفسيح بتاعة الغدا نفسها غمت عليها
- شوفى الوليه الناقصة
- نادرة - أعمك معايا شأى يا خالتى أم سعيد
- أم سعيد - يا ريت يا حبيبتي عقبال ما أشرب شربات
- فرحك يا نادرة يا بنت زينات
- (بعد ما شربوا الشأى)
- نادرة - أنا داخلة أريح شوية يا ما على ما المسلسل
- يشتغل والنبي يا خالتى أم سعيد لما تيجى نازلة إبقى
- خدى الباب فى إيدك
- أم سعيد - لا أنا هقعد لحد ما أسمع التمثيلية معاكوا
- نادرة - كدا طب عن إنكم
- (الساعة الخامسة ، أستيقظت نادرة من النوم ووجدت أم
- سعيد جالسة
- أم سعيد - صح النوم يا ندورة

- نادرة - هو المسلسل لسة مجاش
- أم سعيد - لسة يا قمر على ما تغسلى وشك وتعملينا
- كوبايتين شاي يكون جه
- نادرة - من عنيا يا أم سعيد

(جرس الباب)

- أم سعيد - خليكى إنتى وأنا هفتح يا ندورة
- الطارق - السلام عليكم
- أم سعيد - وعليكم السلام إنت مين يا بنى؟
- الطارق - الست زينات موجودة؟ .
- أم سعيد - أيوة يا إبنى نقولها مين
- الطارق - مختار ..مختار الراضى
- أم سعيد - ياست زينات ..يا ست زينات
- زينات - أيوة يا أم سعيد
- أم سعيد - واحد بيقول إنه إسمه مختار الراضى هل
- أسمح له بالدخول
- زينات - مختار الراضى ! خليه يدخل يا أم سعيد
- أم سعيد -أدخل يا بنى يا ألف أهلا وسهلا
- (دخل ومن خلفه شخص يحمل كثير من اللعب والهدايا)
- مختار - السلام عليكم ورحمة الله وبركاته إزيك يا مرات
- عمى
- زينات - مختار محمود الراضى هنا فى بيتنا يا أهلا
- وسهلا يا أبنى
- مختار - تعالى يا حسين حط الحاجات دى ع الترابيزة
- وإستناتى فى العربية

- زينات - -إتفضل يا بنى ولو إن البيت مش قد المقام
- مختار - متقوليش كدا يا مرات عمى
- دا بيتى اللى بحبه إنتى ناسية إنى كنت دايمًا أجى هنا مع
- والدى الله يرحمه وكنت بلعب وأكل من إيدك أحلى قرص
- بالملمن
- زينات - هههه أنت لسة فاكِر الله يرحم أبوك يا مختار
- مختار - الله يرحمهم جميعًا يا مرات عمى
- زينات - والنبي ليك وحشة يا مختار
- مختار - وأنتوا كمان يا مرات عمى إمال فين نونا
- (نادرة داخلة بالشاى بابتسامَة)
- نادرة - موجودة يا مخ موجودة يا بنى عمى يا غالى
- هروح فين يعنى.. بسم الله ما شاء الله أنا شايفة الكينج
- مختار..إزيك يا بن عمى
- (وقف مختار وهو مذهول)
- مختار - بسم الله ما شاء الله مش معقول إنتى نادرة؟ أيه
- الحلاوة دى يا بنت الأيه أنا مشفتكيش من أربع سنين
- بس معقول الكام سنة دى تخليكى برنسيس بالشكل ده؟
- نادرة - هههههه الله يجبر بخاطرك شوفت بقى الدنيا
- بتغير أزاى
- مختار - أه والله بقى إنتى نادرة اللى كنت كل منتقابل
- لازم نتخانىق
- نادرة - أه فاكِر يا مختار كل ماتيجى عندنا لازم تروح يا
- متخربش يا مفتوح دماغك هههههه
- مختار - يا سلام ياختى وإنتى مش فاكِر لما طلعت

- نادرة - بتقولى حاجة يا خالتى أم سعيد
- أم سعيد - ها ههههه لا أبدا عن إنكم أسيبكم مع
الضيف الفاخر الفخم ده
- مختار - نعم هى تقصد أيه يعنى؟
- نادرة - ههههه ماتخدش فى بالك هى تقصد تمجد فيك أو
بمعنى أصح مبهورة بيبك
- مختار - دا تعبير ؟ ست غريبة
- نادرة - سيبك منها هى كدا فضولية وعلى نياتها
ماتحطش فى دماغك إكيلي بقى ألمانيا بلد حلوة؟
- مختار - ألمانيا بلد تحفة بس مهما تكون مش أجمل من
بلدنا يا نادرة
- نادرة - ها وأنت جاي أجازة بقى كبيرة كدا والا زى كل
مرة أسبوعين وتخلع
- مختار - أخلع... مش هتبطلى الألفاظ البلدى دى
- نادرة - لا دا طبع يا بنى
- مختار - طبع لازم يتغير لازم يكون كلامك منمق ومنسق
وعموما أنا يا ستى قاعد على قلوبكم مش راجع تانى
- نادرة - والله العظيم يعنى هنشوفك كثير
- مختار - أنا جاي النهاردة يا مرات عمى علشان أخدمكم
معيا فى البرج اللى إشتريته
- أنا إشتريت برج بس أيه هيعجبكم جدا
- نادرة - مبروك عليك يا بن عمى
- مختار - قصدك مبروك علينا كلنا
- نادرة - لا يا عم مبروك على أصحابه إحنا مبسوطين أنا

- وأم نادرة فى شقتنا
- مختار - لا مفيش كلام من دا ..أنا قررت ألم شمل العيلة
 - بنت عمى حسان وولاد عمى إبراهيم أنس وراضى ورحمة وأخويا باسم ووالدتى ومرات عمى إحنا مكرناش على بعض أحنا عيلة صغيرة ولازم نكبر وأنا ربنا إدانى ووسعها عليه وزى ما وصانى والدى وقالى يا مختار يا بنى لما ربنا يدىك تلم شمل العيلة واللى إحنا مقدرناش نعمله أعمله أنت يا بنى
 - نادرة - عمى محمود ده كان طيب جدا الله يرحمه
 - زينات - كل عيلة الراضى طيبين يا ولاد بس أنت مجبتش سيرة عمك محسن
 - مختار - عمى محسن دايمًا بعيد عن العيلة وربنا مديله ومبيفكرش يسأل علينا ولو عرضت عليه عرض زى ده أكيد هيرفض
 - نادرة - أعملك كوباية كاكافو
 - مختار - لأ خليها الزيارة اللي جاية أنا عندي ميعاد مهم ولازم أستأذن
 - نادرة - أيه العلب دى كلها
 - مختار - العلب دى ليكى إنتى ومرات عمى دى حاجة بسيطة ويا رب ذوقى يعجبكم
 - نادرة - كل دى هدايا أنت كلفت نفسك كتير أوى يا ابن عمى
 - مختار - يا نونا متقلش كدا دانتى بنت عمى حسان أقرب عمامى لقلبى الله يرحمه

- زينات - تعيش وتفتكر يا بنى
- مختار - السلام عليكم
- الجميع - وعليكم السلام ورحمة الله وبركاته
- (نادرة بتقفل الباب لقت أم سعيد بتزق الباب
- أم سعيد - إستى يا ندورة متقفليش أنا جبتلك الكوباية
- إما كانوا شوية شأى عدلوا دماغى صحيح هو الضيف
- مشى والا أيه
- نادرة - إدخلى يا خالتى أه مشى
- أم سعيد - يالهوى يا زينات يا أختى لو شفتى العربية
- اللى جاى فيها بالسواق بتاعها سدا الشارع والناس
- واقفة فى البلكونات عمالين يسألوا عربية مين دى وإنتى
- عارفة أنا متوصاش عرفتهم إن دى عربية ابن عم نادرة
- والبت زهيرة بقت هتموت كانت فاكراه عريس
- نادرة - عريس أيه يا خالتى دا زى أخويا
- أم سعيد - أخوكى دا أيه يا هبله دا كان هيكلك بعنيه
- وأقطع دراعى من هنا إن ما طلب إيدك عن قريب
- زينات - إطفيلي نور الأوضة يا نادرة عايزة أنام
- أم سعيد - إهى . تنامى دا أيه يا زينات مش تشوفى أيه
- اللى فى العلب إفتحي يا ندورة إفتحي
- نادرة - حاضر يا خالتى أنا عارفة إن مش هيجيلك نوم
- الا لو عرفتى العلب فيها أيه
- أم سعيد - هههههههه شوفي العسل طول عمرك ذوق
- ياندورة يا حبيبتى... إفتحي العلبه الكبيرة دي الأول
- نادرة - حاضر وادى العلبه ياستى

- أم سعيد - اللهم صلى ع النبي أيه الحلاوة دى دا فرو
- تغلب إنما أيه محصلش
- زينات - آاه
- نادرة - أيه يأمأ مالك
- زينات - مش عارفة تعبانة أوى حاجة طبقة على نفسى
- أم سعيد - يا ساتر أستر يا رب مالك يا زينات
- زينات - ناولينى كوباية مية يا نادرة
- نادرة - حالا يأمأ
- (نادرة سريعا أحضرت المياه)
- نادرة - إشرى يأمأ...ها أيه الأخبار
- زينات - الحمد لله يا بنتى
- أم سعيد - ياختى حد يزوره ضيف زى الأستاذ مختار
- ويجيله الهدايا اللى ترد الروح دى ونفسه يتكتم أما
- عجيبه
- زينات - نادرة إطفى النور...وسبينى أستريح يا بنتى .
- أوف يا ساتر يا رب
- أم سعيد - طيب مش نشوف العلبة الرابعة فيها أيه
- يعنى النوم حبك
- زينات - يالا يا نادرة إعملى اللى بقولك عليه
- نادرة - حاضر يأمأ
- (جرس الباب)
- أم سعيد - خليكى إنتى يا نادرة أنا اللى هفتح إنتى
- عارفانى وشى حلو وإيدى فيها البركة وادى إنتى جربتى
- الطارق - السلام عليكم

- أم سعيد - وعليكم السلام ..أيوة يا بنى أيتها خدمة
- الولد - الست نادرة موجودة
- أم سعيد - أيوة يا بنى نقولها مين
- الولد - قوليلها مسعد ابن أم نعيم
- الولد - يا نادرة ...يا نادرة مسعد من طرف أم نعيم
- نادرة - خير يا مسعد فيه حاجة ؟ أدخل
- مسعد - إلحقينى يا ست نادرة ..فايز أنور ماسك فى خناق أمى وعمال يكسر لها فى المحل والترابيزات اللى فيه
- نادرة - أيه ، طيب ليه؟
- مسعد - الحقيقة ..بسببك يا ست نادرة
- نادرة - بسببى أنا ليه؟
- مسعد - أصله كان جاى ياخذ الرد من أمى ..ولما عرف إنك مش عايزة تتجوزيه إتجنن
- نادرة - جن لما يلخبطوا هو الجواز بالعافية والا أيه ..أستنى أنا نازلة معاك
- (وضعت الشال على كتفها وذهبت معه)
- نادرة - والنبى يا خالتى أم سعيد تاخدى بالك من أمى على أما أرجع
- أم سعيد - فى عنيا يا ندورة ماتخافيش أنا قاعدة قدام التلفزيون فى الصالة وهاخد بحسها ربنا يطمنا عليها
- وعليكى يا بنتى
- (عندما وصلت نادرة الى الدكان)
- نادرة - فيه أيه يا خالتى أم نعيم

- فايز - أهلا بالسنيورة إنتى شرفتى
- نادرة - فيه آيه يا أبى الحاج أنور مالك ومال الست أم نعيم
- فايز - مالى ... مانتيش عارفة مالى يا أبلة..أما عجائب ..يعملوها ويخيلوا
- نادرة - هما مين دول وعملوا آيه ماتوضح كلامك قدام الخلق يا فايز يا أنور
- فايز - بقى إنتى بترفصينى أنا...إنتى
- نادرة - أه أنا وأرفض اللى أتخن منك ما دام مش محترم
- فايز - أنا مش محترم الكلام دا ليا يا نادرة يا بنت زينات
- نادرة - أيوة الكلام دا ليك يا فايز يا بن عيوشة
- فايز - ابن عيوشة هى حصلت تندهيلى بأسم أمى يا بت
- نادرة - بته لما تبتك أنت هتضربنى والا آيه بالمثل يا فايز أنت مش أحسن منى أوعى تكون فاكر أنى ضعيفة والا لقمة طريه لا زى ما أنت أبى الحاج أنور أنا نادرة بنت الحاج حسان الراضى اللى طول عمره فضله عليكوا والا نسيت إن كنت ناسى أفكرك
- فايز - إحترمى نفسك ولمى لسانك أحسن أقطعهمولك..وأكسرلك دماغك الناشفة دى
- (رفع العصايا وإذا بوالده)
- أنور - نزل إيدك يا بغل
- فايز - أأااابويا
- أنور - أيوة أبوك يا بقف...تقدر تقولى واقف تتخانق مع مين يا سبع البرمبة.. إثنين حريم يا جبان إبنى أنا يقف

البيت

- أنور - الست زينات لا ألف سلامة مالها؟
- نادرة - أمى تعبانة بقالها أكثر من 6 شهور
- أنور - وأنا معرفش لالالا لأزاي محدش عرفنى
- نادرة - الحمد لله على كل شىء... كل اللى يجيبه ربنا خير المهم دلوقتى يا معلم الحاجات اللى كسرها أبناك فى دكان الست أم نعيم أنت عارف أن كل اللى شاييل عربيات فرش وترايبزات البضاعة عندها هيصبح يطلبها
- أنور - بس كدا.... واد يا عزوز
- عزوز - أيوة يا معلم
- أنور - طيران على بيت نغاعة النجار قوله يجيب عدته ويجى عندى ف لمح البصر
- عزوز - من عنيا يا معلم
- أنور - وادى يا ستى تعويض عن البضاعة اللى إتبهدت وإنتى اللى تعرفى قيمة بضاعة كل واحد كان عاينها عندك وتقدرى تعوضيه عنها بمعرفتك ولو عوزتى حاجة تانى رقبتي يا ست أم نعيم
- أم نعيم - تسلم رقبتيك يا سيد الرجالة
- أنور - ها مبسوطه يا ست الكل
- نادرة - كتر خيرك يا معلم يدوم الكرم والشهامة.... صحيح الراجل الصح ساعة الشدة يبان... عن إذنك يا معلم
- أنور - ودا اسمه كلام هاتمشى لوحداك فى ساعة متأخرة زى دى

- أستنى هوصلك
- نادرة - متتعيش نفسك يا معلم وماتخفش عليه محسبوتك
بعشر رجالة
- أنور - لا مهوبايين بس مهما يكون حد يتعرضلك كدا والا
كدا تبقى وحشة فى حقى
- نادرة - خلاص اللى تشوفه يا معلم
(عند المنزل نزلت نادرة)
- نادرة - أتفضل يا معلم أشرب حاجة
- أنور - لا مرة تانية يكون بدرى شوية بس دلوقتى أطلعى
وشاوريللى م البلكونة علشان أمشى وأنا مطمئن
- نادرة - ماشى يا معلم ..تصبح على خير
- أنور - وأنتى من أهل الخير
(فى سره)
- حنة فرسة إنما أيه أصيلة
- (نادرة دقت الباب و فتحت لها أم سعيد..وجرت على الشرفة
- أم سعيد - يوه مالك يا ندورة بتجرى ليه
(نادرة تشاور من الشرفة)
- نادرة - تصبح عل خير يا معلم
(أم سعيد من خلفها)
- أم سعيد - مين اللى بتشاوريله دا يا ندورة؟
- نادرة - دا المعلم أنور الصاحى
- أم سعيد - أنور الصاحى تاجر المواشى
- نادرة - أيوة أنتى تعرفي
- أم سعيد - إلا أعرفه دا كان شغال عند المرحوم أبوكى

كان كلاف وفجأة فتحها عليه الفتاح متعريفش منين و
عنها الحال إنقلب أبوكى نزل فى السوق وهو بقى حاجة
تانية

- نادرة - غريبة
- أم سعيد - ما غريب إلا الشيطان
- إحنا مش هنفتح الرابعة بقى والا أيه
- نادرة - رابعة .. رابعة أيه؟
- أم سعيد - يعنى رابعة العدوية ... العلبة الرابعة
- نادرة - ااااه بكرة بقى يا خالتى أم سعيد أحسن أنا تعبانة
وعايزة أناااااا
- أم سعيد - وأنا اللي مستنياكى يا ريتنى فتحتها
(فى سرها)
- جتكم البلا عيلة هم
- طيب اسيبك ترتاحى يا حبيبتى تصبى على خير
- نادرة - وأنتى من أهله
- (فتحت الباب على والدتها وجدتها نائمة)
- نادرة - يا حبيبتى يا أما كان نفسى أحكيك ع اللي حصل
- زينات - تعالى يا نادرة
- نادرة - أنتى صاحية ياما
- زينات - أيوة يا بنتى أنا مانمتش بس بهرب من أم سعيد
الحشرية يا ساتر
- نادرة - ههههه للدرجة دى بتخافى منها
- زينات - أنا بحبها هى ست طيبة وخدمة بس يا خسارة
حشرية ورغاية وقرارة....ها كنتى عايزة تقوللى أيه

- نادرة - أه مانا هحكلك أهوه بعد ما نيمتك وقفلت النور الباب خبط
- نادرة - بس يا ستي هو ده اللي حصل
- زينات - شوفى يا ختى الواد وبجachte...هو الجواز بالعافية
- نادرة - بس بنتك أیه أدیتهم له صح ماتخافيش
- زينات - ربنا يحرصك يا حبيبتي طيب وهنعمل أیه فى طلب مختار
- نادرة - يعنى أیه هنعمل أیه دى مش محتاجة تفكير طبعا
- مش هنسب بيتنا ونروح ضيوف عند أى حد حتى لو كان ابن عمى
- زينات - أنا بس مش عايزة يكون نفسك فى حاجة ومش عايزة يجى يوم وتلومى نفسك إن الفرصة جتلك علشان تعيش عيشة مرتاحة وانتى اللي ضيعتها
- نادرة - لا طبعا عمرى ما هندم مينفعش أسيب المكان اللي إتربيت فيه إزاي نسب جذورنا ونتطوح فى الدنيا بمزاجنا .. لا يا أمى
- زينات - خلاص يا نادرة اللي تشوفيه
- نادرة - سيبك إنتى قوليلى بقى معاكى كام؟
- زينات - إن شاء الله هيتما 55 ألف جنيه والبركة فى القرش اللي سبهولنا أبوكى ألف رحمة تروح له ماكنتش الاقى أتعالج عايشين على خيرته حتى وهو مش معانا
- زى اللي كان حاسس إنى همرض بعد موته
- الله يرحمك يا حاج حسان

- كان راجل ولا كل الرجالة
- نادرة - أه م الحق ياما ..خالتى أم سعيد قالتلى إن المعلم أنور الصاحى كان شغال عند أبويا كلاف.. الكلام دا صحيح ياما؟
- زينات - ياااه دا كان زمان
- نادرة - طب وأيه اللى خلاه فى الأملة دى كلها
- زينات - والله يابنتى ما أعرف إحنا بين ليلة ومساها بصينا ملقناش أنور الكلاف ومعرفناش هو مشى ليه لكن فجأة ظهر تانى مع الحاج الفترة الأخيرة لقيناه طلع فى السوق وأسمه لعلع بعد وفاة الحاج متعرفيش ليه
- نادرة - حاجة غريبة... ومسألتيس أبويا عن سر غيابه ورجوعه والتغيير الغريب فى علاقتهم
- زينات - يوووه غلبت أسأله لكن الله يرحمه مكنش بيعرفنى أى شىء عنه أو عن شغله أبوكى كان كتوم وكلامه قليل وأنا زى مانتى عارفة مليش فى حاجة غيرك إنتى وشغل البيت
- نادرة - أيوة يعنى عمره ما قال لك حاجة كدا ولا كدا وصى بحاجة حلفك على حاجة إستتمك على حاجة يعنى
- زينات - من ناحية الأمانة أهو سابلك معايا ال60 ألف جنيه وقالى يومها خدى يا زينات المبلغ ده عنيه فى سفر الغفارىت بين جلدك ولحمك ده علشان بنتنا ومتطلعيهوش إلا لما تحتاجى له فى غير وجودى زى اللى كان قلبه حاسس إنه عمره قصير يا حبيبى
- نادرة - بس كدا؟

- زينات - أيوة كدا ههههههههه
- نادرة - طيب وأيه اللي بيضحك فى الكلام دا؟
- زينات - أصل أبوكى يومها وصانى وصية تانية لما إفتكرتها ضحكت
- نادرة - وصاكى بأيه
- زينات - قالى يا زينات وصيتى ليكى منين متتنقلى وتروحي فى أى مكان تاخدى صورتى وصورة أمى نادرة الكبار المتعلقين فى الصالة أوعى تفرطى فيهم
- نادرة - ههههههههه وصية زى العسل يا حبيبى يا بابا أد كدا كان عندك ولاء لجدتى
- زينات - يااااه آمال أيه دا أنا عمرى ماشفت حد بيحب أمه زى أبوكى الله يرحمه آمال سماكى على إسمها ليه والشهادة لله الحاجة نادرة كانت تتحب دى كانت ست الستات شطارة أيه وطيبة أيه وفوق كل ده حقانية وتعرف ربنا وكانت دايمًا توصينى على حاجات وتعلمنى حاجات وكانت دايمًا تقولى
- انتى طيبة يا بت يا زينات وغلبانة خلى بالك من حسان وأوعى تتخلى عنه مهما بان لكى منه..أصل حسان إبنى على قد طيبته لكنه زى البحر اللي ملوش قرار الله يرحمك يا أما نادرة
- نادرة - يااااه هى كانت بتقول ليه كدا على بابا؟
- زينات - مش عارفة بس أقولك الحق يا بت يا نادرة...أبوكى صحيح زى ما جدتك قالت كدا متعرفيش له راس من رجلين...وتعرفى كمان أنا شكة إن الخير اللي

- فيه الحاج أنور دا من مال أبوكى الله يرحمه
- نادرة - أيه اللى خلاكى تقولى كدا؟
- زينات - أقولكأنا فى يوم كنت راجعة من السوق
- حرانة وعطشانة دخلت من الباب ع المطبخ أشرب
- ومكنتش أعرف إن أبوكى فى البيت وساعتها سمعت
- كلامه هو وأنور الكلاف من غير قصد والله
- نادرة - ها..كانوا بيقولوا أيه
- زينات - أقولك
- حسان - يعنى مشفتش منك قرش أبيض بقالى فوق ال4
- شهور يا أنور
- أنور - والله يا حاج أنا مستنى شحنة البقر الفريزيان
- وأول ما توصل هابيعها وأرجلك فلوسك وعليهم مكسب
- الصفقة بالنص زى ما إتفقنا
- حسان - إنت عارف إن ربع ثروتى حطيتها فى الصفقة
- دى ولو مت قبل ما نتحاسب فيها تدى المبلغ بمكسبه
- لمراتى وبنتى ومتنساش إن فيه بينا إتفاق على
- ورق..موت من حيا
- أنور - ألف بعد الشر عليك متقولش كدا يا معلمى
- وبعدها بيومين الحاج حسان قابل وجه كريم
- كدا يا نادرة خلّيتنى أحكى كلام سمعته من غير قصد
- سامحنى يا رب أنا ما بحبش الفتنة
- نادرة - فتنة أيه ياما اللى بتتكلّمى عنها دا كلام تسكتى
- عليه لحد دلوقتى معنى إن أبويا مات بعد الحوار ده
- بيومين يعنى ملحقتش شحنة البقر تيحى وحتى لو جت

- ميلحقش أنور الزفت دا يسوقها...وأنتى محاولتىش
تسألنى الحاج أنور عن الشحنة دى ولو من بعيد؟
- زينات - يا نهار إنتى عايزاه يقول إنى كنت بتصنت عليهم لا يا بنتى لا
 - نادرة - ياما ياما متفرسينيش باللا موبالاه اللى إنتى فيها دى
 - زينات - يعنى آيه اللا آيه دى اللى بتقولها
 - نادرة - أقصد الطيبة اللى إنتى فيها دى بتضيع الحقوق . معنى كلامك إن إحنا لينا فلوس وفلوس كتير كمان أحنا أصحاب الشحنة وأنور ملوش غير نص مكسبها بس وتقوللى أنور طلع وأبوكى نزل ماهو طلع على كتف أبويا وماله
 - زينات - تصدقى أنا كنت حسة
 - نادرة - كنتى حسة يا فرحتى ...إستنى إستنى على حسب ما سمعت صفقة البقر الفريزيان دى أبويا حط فيها ربع ثروته ...معنى كدا إن أبويا عنده ثروة كبيرة ...بس هى فين يا ترى
 - أنا مش هنام الا لما أنكت البيت وأدور على أوراقه أنا لازم أوصل لمال أبويا ومش هتنازل عن إنى أعرف جراب أبويا لسنة فيه آيه . قومى ياما قومى متخليناش نضيع وقت
 - زينات - يالاي بنتى
 - نادرة - يالا آيه.. خليكى إنتى مستريحة يا حبيبتى أنا اللى هدور بس تعالى أما أقعدك ع الكنبة فى الصالة قدام

- التليفزيون وسيبينى مع نفسى فى أوضتك
- زينات - ولو إنى عارفة أنك مش هتلاقى حاجة بس انا هسيبك علشان تتأكدى بنفسك
- (دخلت نادرة تقلب كل شىء وتبحث فى كل ركن)
- نادرة - يا ترى يا حاج حسان مخبى أوراقك فين....
- يمكن ورا الدولاب..أبدا...طب أما أحسس ع المراتب
- يمكن تكون جوا القطن...أبدا وادى التسريحة وادى
- الكومدينات...دى حاجة تجنن مفيش غير إنى أدور فى
- جيبه..أه تعبت وبرضوا مالقيتش حاجة.. مش فاضل
- غير الجلابية القديمة دى...يعنى معقول ملاقيتش فى كل
- ده ألاقى فيكى إنتى يا ماهرة يا دايبة
- (نادرة مسكت الجلابية ورمتها ع الكنبه اللى فى
- الأوضة..إنتى بقى مالكىش لازمة فى الدولاب مصيرك
- المطبخ)
- نادرة - أما أرجع كل حاجة مكانها
- وفضلت نادرة ترجع كل حاجة لمكانها وبالمرة تكنس
- الأوضة وتمسحها
- (جرس الباب)
- نادرة - ودا مين اللى جايلنا الساعة دى
- مين؟
- أم سعيد - أنا يا ندورة
- نادرة - خالتى أم سعيد..خير فيه حاجة والا أيه
- أم سعيد - خير يا حبيبتى كل خير أصلى سمعت خبط
- ورقع عندكم إفتكرتكم عايزين حاجة

- نادرة - لا مفيش حاجة يا خالتي
- أم سعيد - إهى آمال أيه الخطب دا كله... زينات أيه اللي قومك من سريرك وقعدك فى الصالة أنا مش سايباكي نايمة؟
- زينات - أبدا يا أم سعيد إحنا زى اللي سمعنا خرفشة فى الأوضة
- نادرة حلفت لتخرجنى منها وتقلبها ليكون فيه فار والا حاجة
- أم سعيد - أأاه قولتيلى ولقيتى حاجة يا ندورة؟
- نادرة - ها... أبدا يا خالتي يظهر إنها تهينات مش كذا والا أيه يالما
- أم سعيد - ها وأخبار الرابعة أيه
- نادرة - رابعة.. أيه الرابعة دى
- أم سعيد - هههههه يعنى هتكون الزوجة الرابعة العلبة الرابعة طبعا
- نادرة - يااه تصدقى أنا مافتحتهاش
- أم سعيد - مافتحتهاش والا عايزين تداروا عليا
- نادرة - نдарى أيه يا خالتي العلبة عندك ع الكنبه إفتحيتها بنفسك وشوفيهيا
- أم سعيد - كذا طب أنا هدخل أجيبها
- نادرة - طيب أستنى أسندى معايا أمى الأول تدخل تستريح فى سريرها ياخالتي
- أم سعيد - من عنيا قومى يا زينات يا أختي
- نادرة - إستريحي يا أمى

- أم سعيد - أمال العلبة فين؟
- نادرة - فى مكانها عندك ع الكنبه يا خالتى
- أم سعيد - أيه دى جلبية الحاج أيه اللى حطها هنا؟
- نادرة - ها لا أبدا أصلها قديمة ودايبة وكنت مخرجها
- علشان أنفض بيها البيت
- أم سعيد - لالالا يا زينات ماتنفضيش بالليل دا مش
- كويس وكمان ماتنفضيش بجلبية المرحوم
- خدى طبقها فى الدولار زى ما كانت
- نادرة - هاتى يا خالتى وأنا أطبقها وأشيّلها
- (وهى بتطبق حسّ بورقة مطبقة حطتها من سكّات فى
- كمها ووضعت الجلابية فى الدولار
- نادرة بإرتباك - تتشربى شاى يا خالتى أم سعيد
- أم سعيد - طب مش لما نفتح العلبة
- نادرة - طب هعلق ع الشاى على ماتفتحوها
- (فى المطبخ فتحت نادرة الورقة وظهرت عليها علامات
- الذهول)
- نادرة - أيه دا مش معقول
- وإذا بأمر سعيد
- تعالى يا ندورة شوفى العلبة الصغيرة فيها أيه تعالى..
- تعالى
- نادرة - فيها أيه يا خالتى
- أم سعيد - حتة إسورة ذهب إنما أيه مشفتش فى
- حلاوتها
- خدى قسيها كدايا ندورة... ما شاء الله هتاكل من إيدك

- حتى شوفى ..بصى يا زينات جميلة فى إديها أراى
- والله أنا لو مكانه وليا قرايب معفنة كدا كنت جبتلهم إثنين
كيلوا لحمه وكيلينوا فاكهة مش أسورة دهب هههههه
- نادرة - إتفضليلها يا خالتي ..ماتغلاش عليكى
- أم سعيد - تعيشلى يا قمر البسى وإتهنى وعقبال أسورة
العريس
- نادرة - لسة بدرى يا خالتي أم سعيد
- أم سعيد - لا بدرى ولا حاجة مفيش أقرب من الأيام
- نادرة - طيب هتعوزوا حاجة أنا داخلة أنام
- أم سعيد - امال فين الشاى اللى قولتى عليه يا ندورة
- نادرة - ها أنا معلقتش عليه أصلى لقيت الأنوبة بتشطب
معلش يا خالتي
- أم سعيد - لا يا حبيبتي وأنا غريبة ..تعالى بقى قبل
ماتتدخلنى تنامى إقفلى ورايا الباب بالمفتاح
- نادرة - إنتى مستعجلة ليه يا خالتي
- أم سعيد - مش فتحت العلبة أسيبكم ترتاحوا بقى وأنزل
أنا كمان أنام وأرتاح...تصبحوا على خير
- نادرة - وأنتى من أهله يا خالتي نادرة - عايزة حاجة
ياما أنا داخلة أنام
- زينات - تعالى يا حبيبتي أقولك...مالك يا نادرة متغيرة
كدة ليه
- نادرة - أبدا أصلى لقيت ورقة فى جلبية أبويا القديمة
- زينات - ورقة أيه؟
- نادرة - ورقة يظهر إنها وصل بحواله كان باعتها أبويا

- لواحد إسمه نادر حسان أحمد الراضى
- زينات - نادر حسان احمد الراضى ودا معناه ايه؟
 - معناه ايه ...معناه إنى ليا أخ يا أم نادرة
 - زينات - أخ ..أخ الإزاي يعنى؟
 - نادرة - هو ده اللى هتحقق منه قريب ومش هرتاح الا لما أعرفه
 - تصبحى على خير زينات
 - زينات - أخ يا حاج.. أخ وولد كمان
 - نادرة - إهدى ياما لعله خير
 - زينات - خير يا نادرة ؟ اللهم أجعله خير يابنتى
 - ويا ترى يا حسان كنت متجوز قبل منى ..والا بعد منى؟
 - نادرة - ودى تفرق فى أيه ياما
 - زينات - لو قبل منى هزعل علشان مقاليش.. ولو بعد منى هزعل برضوا علشان مقاليش .. طب والحل مهو لو كان عايش كنت طلبت الطلاق.. والا يمكن كان يصعب عليا ومطلبش الطلاق.. ويا ترى بقى اللى إتجوزها دى حلوة.. والا أنا أحلى ؟.. طيب إتجوزها إمتى وفين؟...
 - الغريبة أنه مكانش باين عليه الجواز طب ما الحاجة نادرة كانت عايشة معايا .. محستش برضوا بأبنها دا كان طول الوقت فى حضنها.. لا بقة بيتشال من على ودنها ..ولا الودودة بتبطل ما بينهم معقول .. يا حاجة نادر ة مقاليش؟ وأنا أيه .. كنت رجل كرسى فى البيت ...طيب عملت أيه أستاهل المكافأة دى عليه.. هى دى الجائزة اللى بتدهالى بعد خدمتى فيك وف أمك ...يا

- لهوى ع الكف اللى أخذته على وشى وأنا مش داريانة
- ياسوادى ع الناس اللى بتعيش بميت وش وبميت قلب
- ...يااااه أد كدا أنا كنت هبله وعبيطة
- نادرة - كفاية ياما إنتى كدا هتتعبى .. ماتخلنيش أندم إنى
- قولتلك
- وبعدين هو أحنا لسة أتأكدنا ما يمكن أحنا بيتهىء لنا
- زينات - لا يا نادرة دى مش تهينات طب شوفى العنوان
- اللى رايحة عليه الحوالة فين
- نادرة - رايحة قنا
- زينات - الصعيد يعنى.. بلد أبوكى
- نادرة - عموما أنا من النجمة هنزل على العنوان ده
- ومش راجعة غير لما أعرف الحكاية جايز أوصل لحاجة
- طيب لو أبويا على ذمته واحدة تانية هى فين وعائشة
- والا ميتة ولو عائشة أزاي ماتحضرش دفنة جوزها
- وأزاي لحد دلوقتى لا حس ولا خبر
- زينات - أنا عارفة يا بنتى إنتى قولتى الواد أسمه نادر
- نادرة - أيوة يا ما أسمه نادر
- زينات - تصدقى يا نادرة إنها حضرت دفنة أبوكى
- نادرة - حضرت الدفنة إزاي ياما
- زينات - صدقيني يا نادرة كان فيه واحدة قلبها محروق
- أوى على أبوكى وأغمى عليها أكثر من مرة ويفوقوها
- وكانوا بيقولولها
- إهدى يا أم نادر ماتعمليش فى روحك كدا...أيوة أكيد هى
- يومها جت مع عربية مليانة ناس من أهل أبوكى م البلد

دفنوا وحضروا العزا ومشىوا يومئذ أنا قلت تلاقيها
قريبته من البلد وتجمال أثارها مراته
(تلطم خدها)

- مراته... يا خبيبتك يا زينات... يا خبيبتك يا زينات
- اهىء اهىء اهىء اهىء
- نادارة - إهدى ياأما إنتى هاتكفرى والا آيه إنتى مش
عارفة إن لطم الوش حرام صلى ع النبى ياأما وأستغفرى
ربنا مش يمكن خير ويبقالى أخ حنين أتسند عليه اللى
المفروض تزعلى منه قابل وجه كريم فامعدش له لزوم
اللى بتعمله ده ..قومى قومى تعالى لما أوضيكى وصلى
ركعتين ندم واستغفار على اللى عملتیه ده
- زينات - عندك حق يا بنتى العايط فى الفايث نقصان فى
العقل
- (توضأت زينات وجلست فوق السرير وصلت وأستغفرت
ربها)

- زينات - أستغفر الله العظيم سامحنى يا رب
- وأهدينى وبرد لى قلبى أنت العالم بحالى وغنى عن
سؤالى يا كريم
- نادرة - يالا بقى يا ست الكل إشرى كوابية اللبن الدافية
دى وأعطيكى وتنامى
- زينات - ماليش نفس يا بنتى
- نادرة - تعدمينى لو
- (زينات مقاطعة)
- زينات - بعد الشر عليكى إن شالله عدوينك أنا هشرب

بس حسك عينك تدعى على نفسك هو أنا ليا غيرك فى
الدنيا دى

- نادرة - بس كدا من عنيا يا أم نادرة يا غاليه
- تصبى على خير وأدعى ربنا يوفى فى مشوار بكرة
- زينات - وأنتى من أهله يا حبيبتي ربنا يهديك العاصى
- ويكفىكى شر المستخبي يا نادرة يا بنتى
- نادرة - الله أحلى دعوة سمعتها ربنا مايحرمنيش منك يا
أمى

(دخلت نادرة حجرتها ونامت على سريرها وهى تقول
لنفسها

- يا ترى أيه اللي هيحصل بكرة؟

(وفى الصباح)

تناولت نادرة الأفطار مع والدتها وودعتها وخرجت فوجدت
أم إدور التى تسكن فى الشقة المقابلة وهى تضع القمامة
فى جردل جانب باب شقتها)

- نادرة - صباح الخير يا خالتي أم إدور
- أم إدور - صباح النور يا نادرة يا بنتى على فين بدرى
كدا فيه حاجة يا بنتى أقدر أقدمها لك؟
- نادرة - أيوة يا خالتي معلش أنا هتاقل عليكى دا مفتاح
الشقة يا ريت تبقى تشقرى على أمى من وقت للتانى
على ما تصحى خالتي أم سعيد
- أم إدور - بس كدا من عنيا يا نادرة روحى أنتى
مشوارك وماتشليش هم الست زينات أنا هخلى بالى منها
(ام سعيد تفتح الباب)

- أم سعيد - مين نادرة أيه اللي مخرجك بدرى دا لسة النهار بيشقشق الست زينات جرالها حاجة
- نادرة - لا أبدا أوى بخير وأنا سبتك المفتاح عند خالتى أم إدور علشان تبقى تبصى عليها
- أم سعيد - ماتشليش هم يا حبيبتي أنا قاعدة معاها لحد ماتيجى إنما أنتى ماقولتليش رايحة على فين
- نادرة - أبدا مشوار لحد بلد أبويا
- أم سعيد - بلد أبوكى.. ليه؟ خير يا حبيبتي؟
- نادرة - أبدا بخلص شوية أوراق مهمين
- أم سعيد - طيب يا حبيبتي طريق السلامة
- نادرة - السلام عليكم
- أم سعيد - وعليكم السلام يا ندورة تروحي وتيجى بالسلامة
- (وفى المحطة وقفت نادرة على شباك التذاكر)
- نادرة - سلام عليكم
- الموظف - وعليكم السلام
- نادرة - من فضلك عايزة تذكرة لقنا
- الموظف - إتفضللى يا بنتى
- (فى نفس الوقت ..دخل شاب محترم)
- الشاب - من فضلك تذكرة لقنا
- (لفت نظره إن عشرين جنيها وقعت من يد نادرة وهى تاخذ الباقي من موظف التذاكر)
- الموظف - أتفضل يا أفندى بس بسرعة أحسن القطر فاضل له دقايق ويطلع

(إنحنى الشاب يلتقط العشرون جنيها)

- الشاب - أنسة يا أنسة
- نادرة - أفندم
- الشاب - العشرين جنيه دى وقعت من أيدك وأنتى بتاخدى التذكرة

(أبتسمت نادرة)

- نادرة - أنا متشكرة جدا
- الشاب - لا شكر على واجب ...هو حضرتك رائحة قنا
- نادرة - أيوة
- الشاب - طيب يالا بسرعة أحسن القطر بيزمر
- نادرة - يا خبر طب يالا نلحقه
- الشاب - إجرى
- نادرة - يا خبر دا بيمشى
- الشاب - هاتى أيدك متخافيش أطلعى
- نادرة - الحمد لله لحقناه على آخر لحظة
- الشاب - رقم الكرسي بتاعك أيه
- نادرة - 70

- الشاب - عال نبقى جيران أنا 71 أتفضلنى

- نادرة - متشكرة
- الشاب - أحلى حاجة إننا هنبقى جنب الشباك مش أنتى برضوا بتحبى تقعدى جنب الشباك؟
- معاكى شنطة أحطها لك ع الشبكة؟ ...طيب أفتحك الستارة علشان تتفرجى ع الطريق؟... هو أنتى مابتريش ليه يا أنسة؟

- أنسة .. أنسة أنتى مابتريديش ليه؟
- أنتى بتبصيلى كدا ليه ؟ هو أى نعم أنا أمور بس مش لدرجة أنك تفقدى النطق يعنى هههههه
- أمال إشمعنى سمعت صوتك لما لقيتك العشرين جنيه أد كدا القرش بيغير النفوس والا كل اللى عنيهم حلوة مابيردوش على حد كدا
- نادرة - ماحدش قلقك أنك رغاى وغلباوى قبل كدا
- الشاب - هو هو كثير.. أنا بقدم مساعداتى
- نادرة - يا سيدى أنا ما طلبتش مساعدات من حد
- وبعدين أنا ليا أيد ورجل وعنين ولو عايزة حاجة هاعملها بنفسى تقدر تريخ نفسك
- الشاب - خلاص على كيفك
- أنتى أصلا من قنا؟
- نادرة - شىء ميخصكش
- الشاب - يا ستى أدى أحنا بنتسلى لسة الطريق طويل
- معاكى كمال أبو الليف محاسب فى معالف الصاحى للمواشى
- نادرة - بتقول محاسب فى معالف الصاحى؟
- كمال - أيوة أيه غريبة دى؟
- نادرة - لا أبدا ماعدش فيه حاجة غريبة فى الزمن دا .
- ويا ترى بتشتغل من زمان عند الصاحى؟
- كمال - يعنى بقالى يجى سنة يعنى من أول ما (نادرة مقاطعة)
- نادرة - من أول ما جت شحنة البقر الفريزيان مش كدا؟

- كمال - مضبوط وعرفتي منين... إنتى تعرفى أنور الصاحى
- نادرة - معرفة بسيطة جدا أنور كان بيشتغل عند والدى
- كمال - تقصدى المعلم حسان الراضى؟
- نادرة - أيوة أنت تعرفه؟
- كمال - الحقيقة أنا ماشفتوش لكن أسمع عنه
- نادرة - ويا ترى سمعت عنه أيه بالضبط
- كمال - كلنا عارفين قصة الصاحى اللى كان شغال كلاف
- عند المعلم حسان الراضى أكبر تاجر مواشى فى الناحية
- كلها واللى أعرفه إن المعلم حسان كان موكل المعلم
- أنور بشحنة الفريزيان وإن لولا مساعدة المعلم حسان
- للمعلم أنور ماكنش يصبح معلم من بعد ما كان كلاف
- لكن فيه سؤال بيدور فى دماغى أزاى المعلم حسان
- يوافق أن يضم أرض معلم الصاحى الصغيرة على أرض
- معلمه ويصبح المعلمين بأسم الصاحى
- نادرة - يعنى أيه مش فاهمة؟
- كمال - ماهى المعالف دى كانت معالف الراضى للمواشى
- وفجأة لقينا يافطة الصاحى إتعلقت بدل يافطة الراضى
- وكل العمال أنور الصاحى بدلهم بعمال وموظفين جداد
- وأنا واحد منهم
- نادرة - طيب وليه غير الموظفين؟
- كمال - أعتقد علشان يمحق أسم الراضى ويبدأ عهد جديد
- للمعالف بأسم الصاحى
- نادرة - أبى اللاعبة
- كمال - نعم بتقولى أيه

- 43

- كمال - يا ريت لو مكنش يضايق حضرتك
- نادرة - مش مهم تعرف أسمى ..أى أسم مش هتفرق كثير ..سميها صدفة سعيدة
- كمال - ماشى يا أنسة صدفة سعيدة
- (هههههههه)
- (وصل القطار)
- كمال - أنسة صدفة سعيدة ..أنسة صدفة ..إنتى روحتى فى النوم والا أياه القطر وصل
- إتفضلنى
- نادرة - متشكرة جدا يا كمال
- كمال - أنتى أول مرة تيجى البلد؟
- نادرة - أيوة
- كمال - ما دام إنتى بنت حسان الراضى يبقى أكيد رايحة ناحية اليمين ..أما أنا ف ناحية الشمال
- نادرة - إشمعننى؟
- كمال - لأن يمين للعائلات والأعيان وشمال دا خط الغلابة اللى زى حالاتنا إنتى رايحة عند مين فيهم..هريدى الراضى والا عصران الراضى؟
- نادرة - أياه أياه ..أياه يا بنى الأسامى المكلكة دى يا ساتر يا رب
- كمال - أياه دا إنتى كمان مش عارفة أسامى العيلة طب أزاي بقى تبقى بنت حسان أذا ماكنتيش تعرفى ولاد عم أبوكى هريدى وعصران
- نادرة - يا أبنى دا شرحه يطول ، إنما قولى مين فيهم

أكبر؟

- كمال - الأكبر عصران وبعدين هريدى وبعدين مهران دا
- غير منيرة وشديدة الراضى
- نادرة - يا صلاة النبى طب متعرفش المقابلة بتاعتهم
- حلوة والا زى أساميههم كدا
- كمال - لا الشهادة لله كل عيلة الراضى طيبين ومحترمين
- ..بس هما شداد شوية
- نادرة - والله طمنتنى ربنا يطمئن قلبك
- كمال - تحبى أجى أوصلك
- نادرة - لا خليك لتعرض للمسألة القانونية هههههه وأنا
- يا سيدى هسأل واللى يسأل مايتوهش
- كمال - كدا ..طب سلام
- نادرة - سلام ورحمة الله وبركاته
- (وفى الطريق قابلت رجل بسيط يركب حمار)
- نادرة - من فضلك يا باشمهندس
- (إلتفت الرجل حوله ونظر لنفسه)
- الرجل - إنتى تجصودينى أنى يا ست
- نادرة - أيوة من فضلك فىن بيت عصران الراضى
- الرجل - جصدك سراية عصران بيه
- نادرة - سراية بيت مش مهم المهم هى من أنهى طريق
- الرجل - دى لسة بعيد شوية يجى إثنين كيلو
- نادرة - يا خبر ومفيش مواصلات؟
- الرجل - لا لسة يا ست ع العموم دنك ماشية فى وشك
- على طول بعد مايخلص هتلاجى طريق إجبارى على أيدك

- اليمين داخل ع الصرايا عدل
- نادرة - متشكرة جدا
 - الرجل - العفو يا ست هانم شرفتى البلد
 - نادرة - الله يحفظك
- ومشت نادرة إلى أن وصلت أمام السرايا وهناك أستقبلها
(الغفر)
- الغفير - إيوة يا ست هانم أيتها خدمة
 - نادرة - من فضلك عايزة أقابل الحاج عصران الراضى
 - الغفير - نجوله مين
 - نادرة - قوله نادرة حسان الراضى
 - الغفير - حاضر يا ست هانم
- (فى لمح البصر جاءت حاشية من الرجال يتوسطهم رجل له
مهابة
- عصران - نادرة بنت الغالى إتفضلى يا بت الغالى واد يا
زغلول
 - زغلول - أوامرك يا سى عصران
 - عصران - دخل شنط الأبله لحد جوا
 - زغلول - من عنيه يا حاج
 - عصران - أدخلى يا نادرة يا بنتى
- (دخلت نادرة السرايا وهى تتلفت حولها من فرط جمال المكان
رغم أنه يميل الى التراز القديم إلى أنه فى منتهى الروعة
- عصران - إتفضلى إستريحى لحد أما أنا دم أم مهران
 - عصران - يا أم مهران ... أم مهران
- نادرة تحدث نفسها سرا)

- استقبال مكنتش متوقعاه بداية موفقة جدا)
- (فوق السلم تنزل من الطابق التانى إمراة لها هيبة بيدوعلى وجهها ملامح قاسية وصارمة انخلع قلب نادرة عند رؤيتها من بعيد (قالت لنفسها)
- نادرة - أيه دا دى ست ملامحها مرعبة جدا
- ربنا يستر
- أم مهران - أهلا
- نادرة - أهلا بيكى يا مرات عمى
- أم مهران - إنتى بت الحاج حسان إېصح؟
- نادرة - أيوة أنا بنته
- أم مهران - إمعاكى اثبات
- نادرة - يعنى أيه مش فاهمة
- أم مهران - مفهماش كيف يعنى عتكلم عنزليجى إياك.. بجولك إثبات إنك بته يعنى بطاجة أو بزبورت أو جسيمة جوازه من الست أمك
- نادرة - أه طبعا معايا بطاقة إتفضلى
- أم مهران - بت يا جواهر إنتى يا بت
- جواهر - إيوة يا ست أم مهران
- أم مهران - إجريللى الأسم اللى فى البطاجة دى
- جواهر - نادرة حسان احمد الراضى
- أم مهران - إكده طيب لافيهما للسنيورة ،أورحى جيبى لها كوباية عصير إترد روحها أوجهزى لجمة بسرعة ومتنسيش كوباية الشاى بتاعتى
- يالا يا بت عتفرجى على أيه مشوفتيش بنته حلوة جبل

- إكده
- نادرة - الله يحفظك يا مرات عمى
 - عصران - ها أيه رأيك يا حاجة فى بت حسان الراضى
 - أم مهران - مليحة جوى ما شالله عليها سنيورة كيف
 - اللى عيطلعوا فى التفزليون
 - متجعدى يا نضرى واجفة ليه؟
 - نادرة - حاضر يا مرات عمى ، أنا أسفة جيت من غير
 - ميعاد
 - أم مهران - ميعاد إيه ومدرک إيه اللى عتحدثى عنيه
 - أحنا منعرفوش الحديث ده عاد ، وبت ما يجيلك نفس
 - تيجى إتشرفى فى أى وبت
 - عصران - ميعاد إيه يا نادرة يا بت أخوى إنتى تنورى
 - بيت عمك عصران فى أى وبت من غير إستاذان ده بيتك
 - يا حبيبتي
 - نادرة - ربنا مايحرمينش منكم
 - عصران - طب عن إذنكم أروح لجلسة الصلح اللى فى
 - المنذرة ولما تخلص هعاود على طول علشان أجعد مع
 - بت أخوى
 - نادرة - أتفضل يا عمى ماتعطلش نفسك
 - أم مهران - جوليلى يا بتى إنتى مجبتيش الست والدتك
 - معاكى والا إيه
 - نادرة - لا أنا جاية لوحدى
 - أم مهران - كيف يعنى تسبيك تجى لحالك إكده
 - نادرة - والدتى راقدة فى السرير مريضة ليه ست شهور

- أم مهران - وى وى وى زينات راجدة فى السرير.. كيف ده دى طول عمرها شديدة إيه اللى جرالها
- نادرة - من يوم وفاة والدى وهى صحتها فى النازل
- أم مهران - لا حول ولا جوة الا بالله الله يلعن الغربة اللى مبعدة بناتنا ومخلتناش نجرب من بعضينا بس والله يابتنى ما أحنأ السبب فى إكده السبب كان من حسان
- نادرة - أبويا.. طيب ليه؟
- أم مهران - هالاه دى جصة طويلة جوى وأدى إنتى جاعدة معانا ومسيرك توعى لكل حاجة
- جواهر - الوكل يا ست هانم
- أم مهران - حطى يا مضروبة وروحي ، إستنى يا بت انتى جايبة الوكل ناجص ليه
- جواهر - ناجص إيه
- أم مهران - يعنى ما واعياش...مجبتيش جوز حمام من اللى محمراه جوة ليه
- جواهر - أنى فكرتك عملاه للحاج علشان إكده جبت بط
- أم مهران - أبأى عليكى عتفضلى مخك تخين كيف حواجبينك، يابت ماهو كتير ، إخفى جيبى جوز والا تنين جك خابط
- نادرة - يا خبر حمام أيه تانى دا كدا كتير أوى يا مرات عمى
- أم مهران - لا كتير ولا حاجة دانتي نورتيانا يا بتى والله (دخل شاب مبتسم بخفة دم)
- الشاب - الله أكبر أنا يا مرزج جوى يا حماتى عتحنى

جوى

- (يمد يده ياخذ قطعة من لحم البط ويضعها فى فمه واذا
- عينه تاتى فى عين نادرة فأنزلها وهو مبهور
- الشاب - إيه دا أحنا حدانا ضيوف أنا متأسف ماكنتش
- خابر إن حدانا ضيوف حلوين جوى إكده
- أم مهران - إتحشم يا ولد والزم الأدب يا جليل الأدب
- ...معلش يا نادرة يا بتى الولد ده طول عمره أهوج
- أوتور إكده...مد يدك سلم على بت عمك يا حزين
- الشاب - بت عمى
- أم مهران - إيوة دى نادرة بت عمك حسان الراضى سلم
- يا ولد سلم
- يمد يده
- الشاب - أهلايا بت عمى منورة منورة منورة
- أم مهران - يه يه يه بكفياك بجى لحسن النور إيفج فى
- وشك
- نادرة مبتسمة - أهلا يا
- الشاب - عمر..عمر عصران الراضى
- نادرة - هههه أهلا يا عمر
- أم مهران - أجعدى يا بتى إتفضللى كلى خدى راحتك
- ماتتكسفيش
- نادرة - حاضر يا مرات عمى
- عمر - آمال فين وهبى ومريم يا أما
- أم مهران - مريم عتاخذ الدرس هى وعزيزة صاحبته
- فى أوضة المسافرين ووهبى راح يطل ع الأرض

- ..وأنت بجى إيه اللي رجعت بدري من كليتك
- عمر - كان عندي سكشن واحد حضرته وجيت
 - أم مهران - طب أطلع على أوضتك غير خلجاتك وإتسبح وانزل لأخوك رؤف كان عايزك
 - عمر - نعم وعايزنى ليه سى رؤف
 - أم مهران - كان عايزك تجراله كتاب أبصر إيه إكده
 - عمر - لا بجى مليش دعوة أنتوا ماوراكوش غيرى والا إيه
 - أم مهران - عتبرطم تجول إيه يا ولد
 - عمر - عجول إنى معحبش المذاكرة ولا الجرايا وبعدين إبنك بيربطنى جنبه بال3 ساعات وأنى مش فاضى
 - أم مهران - أخوك برضيك يا ولدى
 - عمر - أنى طالع أغير هدى وأعملى حسابك ورايا مذاكرة
 - أم مهران - ربنا يهديك يا والدى
 - نادرة - مين رؤف يا مرات عمى؟
 - أم مهران - رؤف ده يبجى ولدى
 - نادرة - وعايز حد يقراله ليه؟
 - أم مهران - أصله بعيد عنك عاجز النظر
 - نادرة - يا عينى طيب خلاص لو ماحدش رضى يقراله أنا ممكن أقراله يا مرات عمى
 - أم مهران - يا حبيبتي زينة البننة والله يا نادرة يا بتى كملى واكلك يا حبيبتي
 - نادرة - شبعت يا مرات عمى

- أم مهران - إهى أيه الوكل اللى معيوكلش زرزور ده
- نادرة - لا والله شبعث تسلم إيدك
- أم مهران - طب تعالى إم أعرفك الأوضة اللى عتجعدى فيها ، دى أوضة مريم بتى وإنتى عتنوريها لها
- نادرة - ربنا يخليكى يا مرات عمى
- أم مهران - أفوتك ترتاحى وبعد إكده تتعرفى على بجية العيلة ، ونجد نتحدث سوى ، بالأذن يا بتى
- نادرة - اذنك معاكى يا مرات عمى إتفضلى
- (بدلت نادرة ملابسها ودخلت البلكونة وهى بتفكر فيما سمعته عن والدها وقالت لنفسها
- نادرة - يا ترى يا نادرة تبتدى منين.. و الدنيا وخداكى على فين ..ويا ترى يا حاج حسان بحرك قراره لفين؟ والدوامة اللى سبتنى فيها هتاخذنى لحد فين؟
- (صوت أغنية الأطلال لأم كلثوم أخرج نادرة من تفكيرها العميق فأتجهت بعينها ناحية الصوت.. وإذا بشاب
- يجلس ويستمع مندمجا مع الأغنية يرتدى نظارة سوداء تغطى عينيه أصدرت نادرة صوتا تنبيهيا لوجودها انتبه الشاب وقام بخفض صوت الأغنية
- الشاب - مين؟ ...إنتى هنا يا حبيبتى ؟..خلصتى الدرس ؟
- نادرة - أنا مش مريم يا أستاذ رؤف
- رؤف - مش مريم ..أمال مين حضرتك
- نادرة - ضيفة أرجو ماكنش ثقيلة عليكم
- رؤف - لا متجوليش إكده يا فندم أجدر أعرف الضيفة

- تبجي مين ؟
- نادرة - أنا نادرة .. نادرة حسان أحمد الراضى
 - رؤف - بتجولى مين نادرة بنت عمى حسان الراضى
!على إكده إنتى جاية من مصر؟
 - نادرة - لسة واصله طازة
 - رؤف - يا مرحب يا مرحب بريحة الغاليين ، لكن إنتى
عرفتى إسمى منين؟
 - نادرة - من الست والدتك أنا أصلى وصلت من حوالى
ساعتين ، وعرفت أسمك من والدتك لأنها طلبت من عمر
أخوك يدخلك علشان يقرألك
 - رؤف - وأكيد طلعت زرابينه وجالها لا
 - نادرة - ههههه وعرفت منين
 - رؤف - لسبب بسيط أصله أخويا من زمان وأعرفه أكثر
من روحى ، وكلها شوية وتلاجه جاي يجولى ، أول
ماجالولى إنك عاوزنى جيت على طول
(فى نفس اللحظة دخل عمر)
 - عمر - أخوى حبيبى أول ما جالولى إنك عاوزنى جيت
على طول
 - (وفجأة تبادلوا رؤف ونادرة الضحكات)
 - عمر - أيه يا أخوانا أنى جولت نكتة والا إيه
 - رؤف - لا أبدا يا حبيبى الحجيبة إنى من شوية كنت
عاوزك تجرالى كتاب ، لكن غيرت رأى وجررت أسمع
الست أم كلثوم
 - عمر - يعنى عزفت عن فكرة الجرايا النهاردة

- رؤف - ايوووووا شيلتها من دماغى النهاردة نهائى
- عمر - طب عن إذنكم معاى تلفون ..إيوة يا سامح يا حبيبى وحشتنى جوى
- (خرج عمر من الحجرة وهو يتحدث فى التليفون
- نادرة - أستاذ رؤف إذا ماكنش يضايقك أنا ممكن أقرالك اللى أنت عاوزه
- رؤف - بجولك إيه بلاش تعرضى خدماتك أحسن أنى مابصدج
- نادرة - هههههه وأنا تحت أمرك مش عزومة مراكية والله بالعكس أصل انا بحب القرايا فعلا ومبملش منها
- رؤف - على إكده إنتى مثجفة
- نادرة - يعنى على أدى كدا أنا أصلى مكملتش بعد الثانوية
- رؤف - طب ليه بجى ماكملتش مش خسارة
- نادرة - هى خسارة فعلا بس أنا ماكنش قدامى غير كدا والدتى تعبت بعد وفاة والدى وماكنش ينفع أكمل تعليمى ونزلت اشتغل
- رؤف بغضب - تشتغلى ، تشتغلى إيه وليه؟
- نادرة - أشتغل فى السوق علشان مانتجش لحد أنا وأمى
- رؤف - وأيه اللى يحوجك.. بجى بنت حسان الراضى تنزل السوج وكنتى عتبعى إيه فى السوج؟
- نادرة - كنت بفرش بطماطم وخضار
- رؤف - طماطم إيه وخضار إيه ليه إكده يا بت عمى

- بجى بعد العز اللي كنتى فيه تنزلى السوج
- نادرة - عز .. عز أية ؟ أنت بتتكلم عن أية؟
- رؤف - عتكلم عن أية عن مال أبوكى حسان الراضى
- نادرة - هو فعلا ساب لنا 60 ألف جنيه لكن صرفنا منهم على مرض والدتى والباقى كنت بكمل عليه علشان أفتح دكان
- رؤف - دكان له إنتى كنتى بتفرشى فى السوج من غير دكان أنى مامصدجش اللي بسمعه ده
- نادرة - مالك كدة كل ما أقولك على حاجة تستغرب ليه؟
- رؤف - بستغرب علشان اللي أعرفه إن مال عمى حسان لو فضلتى تاكلى فيه ليل مع نهار ميعخلصش أبدا
- نادرة - معقول اللي انت بتقوله ده يا رؤف
- رؤف - بجى بنت عيلة الراضى تشتغل علشان محتاجة لفلوس .. طب ع الفرض إن عمى سابكم من غير فلوس إزاي متجوليلناش إزاي متعرفناش دى وحشة فى حق إسم الراضى الناس إيجولوا إيه بنات عيلة الراضى متمرطين ف الأسواج بيوكلوا روحهم
- نادرة - رؤف أنا لولا الصدفة ماكنتش وصلت لهذا صدقتى
- رؤف - عموما اللي فات كان إمبارح.. و من النهاردة الحال لازم يتغير ... من النهاردة مفيش شغل مفيش واجفة فى السوج
- نادرة - إيدى على كتفك و بعدين تعالى هنا قولى أنت كنت عايز تقرا أية

- رؤف - كنت عايز أجرى الكتاب ده ..تعرفيه؟
- نادرة - أوديب الا أعرفه دى قصة روعة أنا شخصيا
- بحب كتب توفيق الحكيم
- رؤف - برافوا عليكى ..تعرفى يا نادرة الكتاب بيمثل
- بالنسبالى الصديج اللى عينصحنى عند اللزوم
- الجنديل اللى عينورلى طريقى فعلا مكديش اللى جال
- الكتاب صديج ..أنى كل اللى مضايجنى من عماى مش
- العمى نفسه لا اللى مزعلنى إنى تاغب اللى حوالين منى
- نادرة - فين التعب ده؟
- رؤف - أنى ماضحكش على نفسى ذنبه إيه عمر والا
- وهبى والا مريم فى صلبتهم جارى لجل يجرولى ، أنى
- ببجي محرج جدا منيهم
- نادرة - متبقاش حساس كدا أمال ، أنتوا مهما يكون
- إخوات

(دخلت مريم)

- مريم - أؤفا حبيبى أنى جيت
- رؤف - تعالى يا مريومة
- مريم - أيه دا أنا أسفة ماكنتش أعرف إن معاك ضيوف
- رؤف - ضيوف مين يا بنتى دى نادرة بت عمنا حسان
- الراضى
- مريم - بت عمى حسان اللى فى مصر؟
- رؤف - إيوة يا ستى اللى فى مصر..
- مريم - أهلا بيكى فى الحجيجة أنى كنت أسمع عنك كتير
- لكن ماكنتش أتصور إنك بالجمال ده كله منورة يا بت

- عمى
- نادرة - دا نورك يا حبيبتي معلش هشاركك فى أوضتك اليومين دول أرجوا إنى مضايكيش
 - مريم - تضايجينى تضايجنى كيف يعنى طب د ا أنا كل حلمى إن ييجالى أخت بنتة زى حلاتى ويظهر ربنا إستجاب لدعائى داحنا هنرغى رغى
 - نادرة - إن شاء الله يا حبيبتي الأيام جاية كتير وأكد هنعرف بعض أكثر ومش هنبطل رغى
 - مريم - طيب أنى داخله أوضتى معايزينش أى خدمة جبل أما أدخل
 - رؤف - لا يا أختى أنتى شرفتينا الشوية دول
 - مريم - كدا كدا ماشى يا سى رؤف من لجى أحبابه نسى أصحابه
 - (دخلت جواهر - ست نادرة ... الست الكبيرة عايزاكى فى الصالون)
 - نادرة - حالا جاية وراكى
 - نادرة - رؤف أنا فيه كلام كتير لازم أقوله وأسأل عنه..
 - تفكر إن عمى عصران ومرات عمى هيفيدونى
 - رؤف - اللى متعرفيهوش إن بيت عصران الراضى مفيش حد يحتاج لمساعدتهم ويردوه خايب
 - نادرة - أنا أسفة.. إنى هتعبكم معايا لكن بجد محتاجة لمساعدتكم
 - رؤف - وأحنا كلنا تحت أمرك
 - نادرة - طب عن إذك زمان الكبيرة مستنيانى

- نادرة - لا أبداً أصلى شوفته فى البلكونة وأتكلت معاه ومن غير قصد ، الكلام دخل فى اللى أنا جاية علشاناه علشان كدا عايزاه يحضر
- أم مهران - إبتعرفى يا نادرة إنتى بنتة عتفهى جوى
- نادرة - أنا إشمعنى
- أم مهران - علشان فهمتى إن ولدى رؤف عيفهم إويعجل الأمور
- نادرة - ههههه فعلا يا مرات عمى أنا حاسة إن الأستاذ رؤف رغم أنه
- أم مهران - مالك يا بتى سكتى ليه كملى رغم انه معيشوفش يعنى
- نادرة - أنا أسفة
- أم مهران - بتتأسفى على إيه عايزة أعرف .. هو أنتى جولتى حاجة غلط ، أجولك أنى إنتى تجصدى إيه تجصدى أنه رغم معيشوفش لكن عيفهم وعاجل وحكيم مش إكده . ودى حجيجة يا بتى أنى ماعخدش جرار فى أيتها مشكل إلا لما أشور عليه ، وتعرفى ليه بالأكثر؟ لأنه كان عيبجى مهندس يعنى واعى جوى
- نادرة - مهندس
- أم مهران - إيوة ... رؤف خريج هندسة ولولا الحادثة اللى جراتله كان زمانه حاجة كبيرة جوى كان طالع الألفة ع الدفعة كلتها ، وهو جايب النتيجة وراجع إتكسرت فرحته يا نضرى وإنجلبت بيه العربية ، وإتحاش نظره يا جلب امه ، ومن يوميا وهو حابس

- نفسه إكده مع التسجيل والكتب
- نادرة - يا خبر بس دى حاجة صعبة جدا إن حد يفقد نظره بعد ما شاف الدنيا وحلاوتها
 - أم مهران - هاللاه نعمل إيه يا بتى ، مجرد إومكتوب لكن جوليلى عجبك بلدنا
 - نادرة - هو أنا لسة شفتها؟
 - أم مهران - يعنى وإنتى جاية بالعربية إكده ملفتيش وإتفرجتى إياك
 - نادرة - عربية أيه ؟ أنا جاية مشى
 - أم مهران - جاية مشى كيف يعنى؟
 - نادرة - ههههه لا يعنى جاية من عند المحطة لهننا مشى
 - أم مهران - محطة ، لهو إنتى جاية فى الجطر
 - نادرة - أيوة يا مرات عمى جاية فى القطر
 - أم مهران - وليه مجبكيش عكاشة؟
 - نادرة - عكاشة ..مين عكاشة؟
 - أم مهران - سواج المرحوم حسان ، حد يكون عنده ركوبة خصوصى بسواج ، ويجى فى الجطر
 - نادرة - ركوبة خصوصى بسواق ...غريبة دى
 - أم مهران - إيه الغريب ف إكده عاد ، مالك يا بتى زى ماتكونى تايهة إكده
- (فى هذا الوقت دخل عصران)
- عصران - معلش إتأخرت عليكم لسة المجلس منفض دلوكيت
 - أم مهران - هاه ويا ترى إنفض على إيه.. حليت المشكل

- يا عصران
- عصران - الحمد لله إنفضت على خير الأخوات إتصالحو والكبير وافق يدفع للصغير ميت ألف جنية فرج أرضه من أرض أخوه
 - أم مهران - يا بوووووى 100 ألف جنيه حته واحده
 - عصران - دا الفرج أكثر بكثير ، بس هما ربنا هداهم لبعضيهم ماتنسيش إن موجه الأرض يفرج فى التمن ، و إنتى بجى ست العارفين
 - أم مهران - عندك حج والله ، اللى عنشوفه الأيام دى بيحصل بين الأخوات ع الورث عيخلى الواحد يعرف كل واحد حجه جبل ما يموت علشان العراك الواعر ده
 - عصران - هههههههه يا ستى خليها على الله . وربنا يجدرنا ونخليهم إحبوا بعضيهم أحسن لأنهم لما يحبوا بعضيهم عمرهم ما عيتعاركوا ، وإحنا مانطرش نجسم أموالنا على حياة عينا ، علشان منتعرضش لسؤال ربنا ، جايز واحد إيزيد عن التانى غصب ،نروح إحنا النار والا إيه
 - أم مهران - عندك حج يا حاج والله... ربنا ينورك مخك كمان وكمان
 - نادرة - هو حضرتك متعلم يا عمى؟
 - عصران - أهو يدوبك عفك الخط ..بتسألنى ليه
 - نادرة - لا أبدا ، فعلا تدبير الأمور مش محتاج تعليم حضرتك ما شاء الله مخك زى ما بيقولوا يوزن بلد
 - عصران - ههههههه الله يجازيكى يا بت أخوى ...طب

- والله إنتى منورانا
- نادرة - عشت ياعمى الله يحفظك
 - عصران - خبر إيه يا حاجة مفيش حاجة نتسلوا فيها وإحنا جاعدين
 - أم مهران - كيف يعنى ؟ البيت مليون إوخير ربنا كتير..جواهر بت يا جواهر
 - جواهر - إيوة يا ست الحاجة
 - أم مهران - جوام هاتى شوية فاكهة على حبة عصاير إوحلويات يعنى شكلى صنية معتبرة إكده ، وبالمرة إدى خبر لسيديك رؤف يجى حدانا دلوكيت
 - جواهر - من عنية يا ست الحاجة
 - عصران - ولزومه إيه ،إتشحطتى الولد إهنة ، وإنتى عارفة إنه تعبان
 - أم مهران - تعبان ده إيه ده عيعرف البيت أكثر منى ومنك ولدنا ما شاء الله عليه فطن اوناصح ، وبعدين نادرة هى اللى طلبت إنه يكون معانا علشان بدها تتحدث إمعانا
 - عصران - إن كان إكده ، يبجى يجى وينور، طلبات نادرة بت أخوى أوامر
 - (طرق بالباب ثم دخول رؤف)
 - رؤف - ها بعثلى يا أمى
 - أم مهران - إيوة تعالى يا والدى هات يدك ...أجد يا حبيبى
 - رؤف - خير يا حاجة

- أم مهران - خير يا ولدى كل خير ، ماتنشعفش إكده أمال
- نادرة - ماتتخضش يا أستاذ رؤف ، أنا اللي حبيت أتكلم معاكوا شوية ويكون الكلام فى حضورك ،لانى حسيت انك زعلت لما قولتلك أنى بشتغل
- رؤف - أنى مش معترض ع الشغل نفسه يا نادرة ، أنى بس إستغربت من نوعية الشغل وإستغربت أكثر إزاي واحدة زيك من عيلة تلجأ للعمل من أصله
- نادرة - تمام...كلكم عمالين تقولوا العيلة العيلة العيلة هى فين العيلة دى؟ وإشمعنى معرفتهاش غير لما جيت الصعيد . كانت فين العيلة دى وأنا طول عمرى ساكنة فى شقة أوضتين وصالة بالأيجار، كانت فين العيلة لما أبويا مات وأمى تعبت منى وشيلتها لوحدى فى مرضها ؟. كانت فين العيلة وأنا بحافظ على أد ما أقدر على ال60 ألف اللي سابها لنا أبويا ، واللى صرفت منها على مرض أمى ورجعت أعافر وأكملهم تانى ، كانت فين العيلة لما إتسدت الدنيا فى وشى لحد ماقررت أنزل للسوق وأبيع وأشتري ، كانت فين العيلة لما سبت دراستى بعد ما كنت من المتفوقات ، كانت فين العيلة وأنا شائلة كل ده على أكتافى ف سن صغير زى ده ، رد ياعمى أيه يا ابن عمى حد يفهمنى يا حاجة؟
- رؤف - إيه الكلام اللي عتجوليه ده يا نادرة ، الكلام ده أحنا أول مرة نعرفه
- عصران - والله يا بتى البعد ده ما كانش إبكيفنا ، حسان ولد عمى هو السبب

- نادرة - السبب فى آيه يا عمى؟
- عصران - السبب فى إننا منسألش عنكم كان دايمًا يجول معايزش حد من العيلة إهنة يدهس بيتى فى مصر ، ومعايزش حد يعرف عنوانى ، أنى مرتى وبتى نادرة عايشين أحسن عيشة ولو حد من إهنا نزل هاي هاي
- نادرة - هاي آيه يا عمى ، كمل...هيكشف جواره مش كدا؟

(باستغراب)

- عصران - عرفتى كيف ؟ ومين اللى جالك؟
- نادرة - عرفت من دى.. الورقة دى لقيتها إمبراح فى جيب جلبية قديمة فى دولاب أبويا بالصدفة ، وفوجئت بالعيلة الكبيرة والصريات والمزارع وأسم الراضى اللى بيهز الصعيد هز، وسألت على كبير العيلة والناس دلونى على هنا
- رؤف - يعنى إيه شجة إيجار و60 ألف جنيه ده مبلغ معيجيش نقطة فى بحر أموال عمى حسان وأملاكه وأطيانه
- نادرة - أملاكه وأطيانه ...طب لما فيه فلوس وأملاك وأطيان ، عمل فينا كدا ليه أنا وأمى ، هو أى نعم محرمناش من حاجة وعمرى ماطلبت طلب إلا وجابهولى لا أنا ولا أمى ، بس كنا بنطلب فى حدود اللى شايفينه وفاهمينه ، يعنى مثلاً كان ممكن يبقانا بيت ملك بدل ما أحنّا ساكنين أو ع الأقل نسكن فى شقة فى برج مش حى شعبى ، طيب مين اللى يقدر يفهمنى هو عمل كدا ليه

- ويقصد أيه من كدا
- رؤف - حاجة غريبة فعلا
 - عصران - والله يا بتى إحنا مافهمينش حاجة
 - أم مهران - أنى أجولك مين اللى عيجيبك جدر الموضوع ده
 - نادرة - مين يا مرات عمى
 - أم مهران - مفيش غير حبيبة مرته
 - عصران - صح أكيد الست أم نادر تعرف ليه حسان عمل معاكوا إكده؟
 - نادرة - طيب وهى بعيد عن هنا
 - عصران - لع بس عنركب لها معدية علشان هى فى البر التانى
 - نادرة - طيب كنت عايزة أسأل ، هى الست أم نادر الزوجة الأولى والا الثانية
 - عصران - لع تبجى أول بخته
 - نادرة - طيب أمال إتجوز أمى ليه؟
 - عصران - متستعجلش يا بتى ، أصبرى لما تسمعى الحديث ده منيها
 - نادرة - طيب أقدر أروح لها أمتى
 - عصران - أديكى جاعدة عندينا يومين ، وبعدين روحيلها
 - نادرة - يومين أيه يا عمى مقدرش ، أنا سايبه والدتى لوحدها
 - أم مهران - لوحدتها كيف مفيش حد يراعيها؟

- نادرة - لا جارتنا بتبات معاها وبتخلى بالها منها
- عصران - خلاص يبجي نبعث لها العربية بالسواج يجيبها
- نادرة - لا أنا لازم أرجع يا عمى فيه حاجات كتير لازم أعملها ، ومش هرتاح غير لما أعرف ليه الحاج حسان عمل فينا كدا ؟ أبويا طول عمره حقانى وبيصلى ويعرف ربنا ، أيه اللى خلاه ميعملش حسابنا فى أمواله دى كلها
- عصران - يبجي خلاص تبيتى مع مريم وبكرة بالمشينة نوصلك لحد باب أم نادر وربنا معاكى يا بتى
- أم مهران - ربنا يريح جلبك يا نضرى
- نادرة - عن أذنكم هدخل أستريح شوية
- رؤف - إستنى خدى بيدى بما إننا جيران فى الحجرات يعنى ، يا ريت توصلينى لحد أوضتى
- نادرة - بس كدا هات إيدك
- رؤف - بعد إذنك يا حاج تعوزى حاجة يا حاجة
- أم مهران - أعوزك طيب يا ولدى على مهلك
- (عند باب الحجرة)
- نادرة - وأدى الأوضة إتفضل يا أستاذ رؤف
- رؤف - يااااه إحنا وصلنا بسرعة إكده؟
- نادرة - هو أحنا جايين من مشوار دا يادوب من أوضة لأوضة
- رؤف - لا بصحيح يا نادرة ، أنى بحس الوجت بيجرى معاكى بسرعة
- نادرة - طيب سيب إيدى وأتفضل أدخل

- [illegible]

عمرها ماتاخذ جرار فى أيتها موضوع إلا لما ترجع له
وكذلك عمر ووهبى

- نادرة - ياه للدرجة دى رأيه مهم
- مريم - جدا ..أصل رغم أنه فجد نظره ، إلا إن نظرته
للأمور جوهريه مش من الوش إكدة وخلص ، ياه لو
ربنا يوعدنى بزواج زى أخويا رؤف ده ، أبجى أسعد
إنسانة فى الدنيا

- نادرة - ياه كل ده حب بتحببيه لرؤف
- مريم - وأكثر من إكده يا نادرة والله ، أنى يظهر دوشنت
دماغك أسيبك تستريحى منى لمدة ساعة وربع
- نادرة - هههههه إشمعنا ساعة وربع

- مريم - أصل مدرس الكيميا على وصول وأنى يستنظر
عشر دجايج على ما يجى ، والدرس ساعة بالظبط
والخمس دجايج على ما أجيلك من الأوضة الثانية

- نادرة - ههههههه يا واد إنت يا يالى ظابطها بالدقيقة
- مريم - آمال إيه يا بنتى إنتى عايزة الكبيرة تحاكمنى
والا إيه

- نادرة - أنا بقى هحاول أنام الساعة دى ، ولو جيتى
لقتينى نايمة ، إبقى صحنى لأنى وعدت رؤف هقراله
شوية

- مريم - ماشى يا جمر
(عندما خرجت مريم أخذت نادرة الى نوم عميق من أثر
متاعب السفر ومن الجهة الأخرى الحاجة أم مهران والحاج
عصران يحتسوا الشامعا)

- أم مهران - إيه رأيك يا عصران فى الحديث اللي عتجوله
بت حسان ده
- عصران - والله ما أنى عارف يا حاجة أنى مستغرب
من الحديث اللي سمعته ده..كيف يعنى حسان إيسيب
مرته وبته ع الحديدة إكده ؟ وهو انه بيلعب بالفلوس
لعب
- أم مهران - أجولك الجج يا عصران ، أنى شاكاة إن فيه
سر فى الموضوع
- عصران - تجصدى من ناحية نادرة
- أم مهران - لع مش من ناحية نادرة بالعكس ، نادرة دى
مسكينة وصغيرة لسة معتعرفش لؤم دى رجيحة كيف
النسمة أجولك على سر يا عصران ، أنى من أول ما
شفت نادرة وإتمنيت تكون من نصيب ولد من أولادى
معرفاش ليه أصلها حلوة إكده ، وتخش الجلب من أوسع
أبوابه
- عصران - والله هى البننة حلوة إصبح ومؤدبة...جرى
إيه يا أم مهران ده وجته إنتى حودتى عن الموضوع
اللى عنتحدث فيه ، دلوكيت لما نادرة تروح لأم نادر ، يا
ترى عتجابلها كيف؟ الخوف لتزعطها ، والا تكش فيها
وإنتى عارفة إن المرة دى شديدة وجوية ولسانها عايز
جطعه ومحدث يعرف يمسك لجامها غير حسان ولد
عمى
- أم مهران - ربنا يستر بجولك إيه يا عصران ، وإنت
عتوصل نادرة ماتفوتهاش حداها لحالها إكده ، وتخلى

- بالك منيها زين
- عصران - ماتخافيش يا أم مهران على أنى عارف هعمل إيه
 - أم مهران - ماتطولش هناك مانجسينش لسينت الناس دى مهما يكون أرملة ومن غير راجل
 - عصران - إنتى عتغيرى على منيها والا إيه يا حاجة
 - أم مهران - واه أنى أم مهران النادى أغير من حبيبة الهبلة، إنت ناسى والا إيه
 - عصران - هبلة، هبلة مين ، هى الهبلة تجدر تحافظ ع الملايين دى كلتها؟
 - أم مهران - سبحان الله أنى ماجولتش أى حاجة عنيه نادرة
 - عصران - أحسن يا أم مهران وأحنا مالنا خليها لما تستكشف كل حاجة لحالها .. بعدى عن الشر وغنى له
 - أم مهران - عندك حج يا ترى إيه اللى عيجرى بكرة (إنتهت مريم من الدرس ودخلت الحجرة)
 - مريم - ياااه إنتى لساكى نايمة يا نادرة ...دى الساعة وربع عدت من بدرى
 - نادرة - ياااه أنا فعلا كنت ف غيبوبة مش نايمة ، أصلى بقالى يومين مامنتش
 - مريم - بجولك إيه.. إيه رايك فى كوباية شاي صعيدى شحط محط
 - نادرة - هههههه يا ريت بس خليهم إثنين
 - مريم - عتشرى كوبايتين ، كد اكده خرمانة؟

- نادرة - أيه ..يعنى أيه خرمانه؟
- مريم - يعنى دماغك مش عمران ، ونفسك تعمريه
بكوبايتين شاى معتبرين
- نادرة - لالالالالا أنا عايزة كوبايتين ليا ولرؤف لأنى
داخله له البلكونة بس لو سمحتى شوفيه صاحى ومستعد
والالا
- مريم - حاضر هدخله من البلكونة أسهل
(دخلت وطرقت الباب
- رؤف - أيوة مين؟
- مريم - أنا يا أؤفا
- رؤف - أدخلى يا مريم
- مريم - إنت جاهز ومستعد علشان نادرة عايزة تيجى
تجراك
- رؤف - نادرة ، أه طبعا روحى جوليلها أنى جاعد فى
البلكونة من بدرى
- مريم - ياااه ..--مالك فطيت إكده
- رؤف - وإنتى مالك يا لمضة روحى يالا
- مريم - وكمان عتتطر هي إيه الحكاية
- رؤف - مالك يا بت واجفالى ع الواحدة إكده
- مريم - لا ولا حاجة أنى رائحة أديها خبر
(تطرق باب نادرة)
- نادرة - أدخلى يا مريم إنتى هتستأذنى فى أؤضتك يا
حبيبتى
- مريم - إنتى مش محتاجة زواج يا نادرة

- نادرة - أنا مش بتزوق أنا بلم شعري وأهندم لبسي
- مريم - وعتتطري
- نادرة - تمام عتطر ههههه
- مريم - أنتو آيه حكايتكم إنتي عتتطري ورؤف عيطعطر
- أنتوا رايحين تجابلوا الوزير والا إيه
- نادرة - ههههههه إنتي ، أخ منك...فين الشاي يا لمضة
- مريم - روي أجدى مع رؤف في البلكونة وأنى
- عبتلكم الشاي متجلبش
- نادرة - طيب ما تيجي تقعدى معانا
- مريم - لا يا ستى أنى ورايا مذاكرة ، وعموما أنى جاركم
- في الأوضة لو إحتجتوا منى حاجة نادموا عليا
- نادرة - ههههه ماشى يا ستى لو عوزنا حاجة هنادم
- عليكى
- (دخلت نادرة البلكونة...وجدت رؤف يجلس وأمامه
- مجموعة من الكتب فوق المنضدة
- نادرة - إحم إحم
- رؤف - نادرة تعالى إتفضلى
- نادرة - ههههههه
- رؤف - بتضحكى على إيه
- نادرة - أصل شكلك زى ما يكون طالب مستنى المدرسة
- بتاعته
- رؤف - مادي حبيجة ، أنى فعلا مستنى مدرستى مش
- إنتى اللى هتجريلى
- نادرة - طيب يا سيدى...أنا شايفة كتب كتير قدامك إنت

عايز تقرا ده كله؟

- رؤف - لا مش كله طبعا ، بس جايز اللي عايز أجراه
- مايعجبكيش ، فتجربلي اللي إنتي عايزاه
- نادرة - لا يا سيدى اللي تحبه أنا هقراهولك ها تحب أوديب والا أيه؟
- رؤف - لا أنى غيرت رأيى
- نادرة - آمال عايز أيه؟
- رؤف - عايز أنجضع ع الكرسي إكده ، وأشطح بخيالى مع فاروج جويده
- نادرة - أممم ، فاروق جويده ، الله أنا بحبه جدا
- رؤف - إكده طيب عندك كتاب بحبه جوى أسمه شئى سيبجى بيننا يا ريت تجربلي منه
- نادرة - طيب ولو قريتلك من تأليف نادرة حسان تقول أيه
- رؤف - مين نادرة حس نادرة حسان يعنى انتى؟
- نادرة - أيوة
- رؤف - يعنى بتكتبى شعر
- نادرة - يعنى على قدى
- رؤف - طيب سمعيني
- نادرة - خليها بعد فاروق جويده إنت عارف لا يفتى ومالك فى المدينة
- (اريحنى على صدرك)
- لأنى متعب مثلك
- دعى إسمى وعنوانى وماذا كنت

سنين العمر تخنقها دروب الصمت

وجئت إليك لا أدري لماذا جئت

- جواهر - الشأى يا سى رؤف
- رؤف - أوف خرجتيني من شرودى وخيالى يا جواهر الله يجازيكى
- نادرة - يا سيدى نقول من تانى مجراش حاجةشكرا يا جواهر
- جواهر - العفو يا ست نادرة أيتها خدمة تانية؟
- نادرة - لا شكرا يا جواهر ها تحب نكمل؟
- رؤف - لا أحب أسمع نادرة حسان
- نادرة - بقولك أيه ماتعلقش
- رؤف - لا أنى بجى بعليج وبشبط زى العيال أيه رأيك بجى
- نادرة - مش هيعجبك صدقنى
- رؤف - يا ستى مالكيش دعوة الحكم آخر الجصيدة يالا بجى جولى لأنى مش هتنازل
- نادرة - مسر يعنى؟
- رؤف - جدا
- نادرة - إنت حر
- من انت
- رؤف - أيه إنتى توهتى والا إيه
- نادرة - ههههه لا دا أسم الخاطرة
- رؤف - ااااا
- نادرة - من أنت

- من أنت حتى تحطم مرأتى؟
 من أنت لتخط لى حياتى؟
 من أنت؟....أجب
 أنت الذكرى؟
 سوف أمزق كل أوراقى
 وأقضم قلمى الذى دون ذكرياتى
 أنت الحب؟
 ألعن الحب الذى أوهمك أنك إلهى
 أو أن بيدك موتى و حياتى
 أنت القلب؟
 أنا إمراة تمسك بسيف الرجال
 أستعد لغرسه بقلبى
 إذا ظننت أنى أعشق سجانى
 - لا تنتظر حبنى
 فقد فقدت بغرورك حنانى
 - لا تظن أنى إمراة
 أسجد لغير من خلقتى وسوانى
 - رؤف مصفقا - الله أيه الجمال ده...بجد إنتى اللى كاتبة
 الكلام ده
 - نادرة - أه والله أنا
 - رؤف - إنتى كلماتك جامدة جدا
 - نادرة - يعنى عجبتك
 - رؤف - لو جولتلك إنها عجبتنى أكثر من الشعر اللى أنتى

- لسة جرياه هتصدجيني
- نادرة - هههه أنت كدا هتخلينى أتغر
 - رؤف - إنتى مين؟
 - نادرة - نعم؟
 - رؤف - إنتى مين؟ صوتك زى ما يكون فى ودانى من زمان إسلوبك ريحتك إحساس جوايا بيجولى إنك... إنك
 - نادرة - إنى أيه
 - رؤف - لا بلاش مش هينفع
 - نادرة - أيه هو اللى مش هينفع؟
 - رؤف - نادرة متاخدش فى بالك كائى مجولتكش حاجة
 - نادرة - رؤف كن صريح وأتكلم على طبيعتك
 - رؤف - خايف
 - نادرة - خايف ، من أيه؟
 - رؤف - خايف أكون طماع وعايز حاجة مش من حجبى
 - نادرة - إتكلم وعلى فكرة أنا كمان عندى نفس الأحساس
 - رؤف - إزاي يعنى
 - نادرة - يعنى أنا كمان أول ما شفتك حسيت إن فيه شىء بيربطنى ببك مش عارفة .. شىء من عند ربنا مليش يد فيه مش بأيدي أتحكم فيه.. كنت راسمة فى خيالى شخص مفيش زيه ، شخصيته قويه و عاقل رغم سنه الصغير له هيبة حتى عند الأكبر منه مش تافه زى شباب كتير فى نفس الوقت رغم القوة دى حنين ورقيق وعنده إحساس ويحببنى زى ما أنا ، لشخصى أنا ، أنا عايزة حد مش زى أى حد والحد ده ميتهيئلى إنى لقيته

- رؤف - والحد ده موجود هنا
- نادرة - هم هم
- رؤف - يعنى إنتى عارفة مش كدا
- نادرة - هم هم
- رؤف - نادرة اللى أنا حسوا وفهمته مضبوط؟
- نادرة - أيوة يا رؤف ..أنا اخدت عهد على نفسى يوم ما
الاقى شخص فيه مواصفات فارس أحلامى ، مش هتردد
إنى أقوله...وأنا اللى بقولها لك يا بن عمى ..إنت فارس
أحلامى
- رؤف - حجيجى يا نادرة؟
- نادرة - حقيقى يا رؤف
- رؤف - يعنى توافجى إنك تكملى حياتك مع واحد
(وضعت يدها على فمه)
- نادرة - أرجوك يا رؤف ماتكلمش ..ياما فيه ناس
بتشوف لكن ماعندهاش نظر
- رؤف - يعنى موافقة تكملى حياتك معايا؟
- نادرة - وأكون أسعد مخلوقة فى الدنيا
(أمسك رؤف يدها ووضعت هى الأخرى يدها على يده
بحرارة)
- رؤف - أنى مش مصدج نفسى أنى أسعد مخلوج فى
الدنيا
- نادرة - وأنا كمان يا بن عمى ، أسعد منك بمراحل أنا
قلت كتير لنفسى صعب الاقى مواصفات فارس أحلامى ،
لكن ماكنتش أعرف إنى هلاقيه بالسرعة دى

- رؤف - وأنى عمرى ماكنت أتخيل إنى الاجى نصى الثانى
زى مانا عاوزه بالظبط جد إيه ربنا بيحبنى إنه حطك فى
طريجى
- نادرة - تعرف يا رؤف لو معرفتش اللى أنا جاية علشانه
أنا مش هزعل لأنى هكون طلعت بأعلى حاجة عندى بيبك
يا رؤف
- رؤف - أنى لازم أفتح الحاجة أم مهران علشان تكلم
والدتك ونتمم الجواز
- نادرة - لا أرجوك نستنى شوية ، على مانشوف مشوار
بكرة هيحصل فيه أيه مش عايزين نشغل عمى ومرات
عمى بميت موضوع مرة واحدة
- رؤف - عندك حج اللى تشوفيه يا حبيبتى
- نادرة بخجل - يا نهار أبيض حد يسمعك
- رؤف - ما اللى يسمعنى يسمعنى
- نادرة - أنا مش مصدقة إننا إرتباطنا بالسرعة دى دا أحنأ
لسة عارفين بعض من ساعات
- رؤف - مش بيجولوا الحب يصنع المعجزات
- نادرة - هههه عندك حق والله سبحانه الله...ياااه الوقت
إتأخر أنا هقوم أنام علشان أصحى بدرى بكرة اللقاء
الصعب بينى وبين مرات أبويا
- رؤف - أنا متوجع خير
- نادرة - يسمع من بقك ربنا...تصبح على خير
- رؤف - وإنتى من أهل الخير
- (دخلت نادرة للحجرة وجدت مريم نائمة ، فأخلدت هى

- الأخرى للنوم وقلبها سعيد حتى الصباح)
- ودخل شعاع الشمس ليوقظ نادرة قامت ودخلت الشرفة لتتأمل منظر شروق الشمس مع الغيطان يا له من منظر جميل وممتع ..تراه نادرة لأول مرة ، قالت لنفسها
 - نادرة -الله أد أيه منظر الشروق جميل ..سبحان الله
 - فى الناحية الأخرى يجلس رؤف فرد عليها
 - رؤف - أكيد أول مرة تشوفى الشمس وهى حاضنة الغيطان الخضرا
 - إتخضت نادرة - رؤف خضتنى إنت أيه اللى مصحيك بدري
 - رؤف - أنا مانمتش من أصله
 - نادرة - يا خبر مانمتش يعنى إنت قاعد القعدة دى من إمبارح؟
 - رؤف - يا دوب صليت الفجر وجلت أسمع شوية قرآن
 - نادرة - طيب وأيه اللى مانيمكش
 - رؤف - الفرحة
 - نادرة - ههههههه فرحة أيه يا مجنون
 - رؤف - فرحتى بيكى يا نادرة ، تعرفى وأنا بصلى لجيتنى ساجد وبشكر ربنا على رضاه عنى وع النعمة اللى من عليا بيها ، نعمة حبك ليا يا نادرة
 - نادرة - دا أنا اللى أول مرة أنام وأنا سعيدة مش مصدقة أن الإنسان اللى قلبى مال له من أول نظرة الاقيه بيبادلنى نفس الإحساس ..دى فى حد ذاتها نعمة كبيرة ..أنا كمان بحمد ربنا أنه من عليا بحبك ليا يا رؤف ،

مش عارفة فيه سعادة فى قلبى من نوع غريب ، مش
عارفة أوصفها أزاى

- رؤف - سبحان الله نفس اللى جوايا
- نادرة - هههههه وده اللى مانيمكش ..طب إتفضل يا
أستاذ ، أدخل أستريح وناملك شوية
- رؤف - أنا مش هنام جبل ما أطمئن عليكى وأعرف
نتيجة مجابلتك مع الست أم نادر
- نادرة - أه فكرتنى تفتكر أروح لها ع الساعة كام كدا؟.
- رؤف - فى اى وجت متجلبش الناس هنا بتصحى كلها
بدرى

- نادرة - لا طبعا أنا مش هروح لها على غيار الريق كدا
أيه رأيك أروح على الساعة عشرة
- رؤف - اللى يريحك يا حبيبتي ...تحبى أجى معاكى
- نادرة - لا ماتتعبش نفسك يا ح
- رؤف - ها سكتى ليه كملى ، أنتى مستخسرة تقوليها
(بكسوف)

- نادرة - وبعدين معاك يا رؤف أنت غاوى تخرجنى
وخلص

- رؤف - هو أنى لما أكون عايز أسمع منك كلمة حبيبى
يبجى بحرجك
- نادرة - أرجوك يا رؤف
- رؤف - يا سلام عليكى برغم جراتك وصراحتك الا إنك
برضوا خدودك بتحمر من الخجل
- نادرة - أيه ده أنت شايفها

- رؤف - أه طبعاً بجلبى ههههههه
- نادرة - ههههههه خضتنى يا شيخ
- (دخلت مريم عليهم)
- مريم - الله الله انتوا جاعدين إهنة ومسامعينش الهيصه
- اللى بره
- نادرة - هيصه هيصه أيه؟
- مريم - الهجوم على البيض المسلوج ومتحمر فى السمن
- البلدى ، وطبج الفول بالزيت واللمون ، والبطاطس
- المتحمرة ، والمش بتاع الحاجة أم مهران مع العيش
- المخبوز الساخن وغمر الفجل والجرجير ، يالا جوام
- مستنين أيه تعالوا نلحج لنا لجمة جبل وهبى وعمر اللى
- عاملين كيف وحوش نمم ما يمسخوا الأطباج
- رؤف - يا خبر طب خدى يدى جوام يا نادرة
- مريم - هات يا خوى يدك
- رؤف - بجول نادرة
- مريم - وهه مانى ونادرة واحد
- رؤف - وعيلك وأنتى إبتغمزيلها
- مريم - باه وعرفت كيف أوعى تكون عتشوف وإحنا
- مدريانينش
- رؤف - طبعاً بشوف بجلبى يا لميضة يالا بينا يا نادرة
- مريم - يالا يا نادرة إكده أنى غلطانة اللى بنادم عليك
- تلحج الفطور جبل ما الهكسوس يخلصوا عليه
- رؤف - صباح الخير
- أم مهران - صباح النور يا رؤف

- نادرة - صباح الخير
- عمر - صباح الفل يا بت عمى
- نادرة - إتفضل أقعد هنا يا رؤف..صباح الخير يا مرات عمى
- أم مهران - صباح الهنا عليكى يا نادرة يا بتى أجعدى
- عمر - فيه كرسى جنبى اهنه يا بت عمى تعالى
- رؤف - عمر ..خليك فى فطارك ...نادرة هتجعد جارى
- (نظر عمر بتعجب لوهبى ومريم ونادرة)
- عمر - ماشى يا باشمهندس
- (أستعجبت أم مهران وملنت الفرحة قلبها)
- أم مهران - أجعدى يا نضرى فى الحتة اللى تريحك
- نادرة - أنا هقعد جنب رؤف
- (نظرت نادرة تجاه وهبى)
- نادرة - أنت وهبى مش كدا؟
- وهبى - إيوة مرحب يا بت عمى متأخذنيش أنى
- ماشفتكيش إمبارح رجعت م الغيط هلكان إتسبحت ونمت ،
- منورة يا نادرة
- نادرة - دا نورك....إمال فىن عمى عصران
- أم مهران - عمك عصران بيمر ع الغفر وع المخازن
- بتاعة المحصول علشان يفضى روحه بدرى لجل ما
- يروح معاكى مشوارك بس ماتعتليش همه هو فطر من
- بدرى يا حبيبتي
- نادرة - بالهنا والشفاف
- رؤف - ممكن تاكلى بجى و تلحجيك لجمة من الوحوش

الضارية دى

- أم مهران - يه يه يه متخافش يا ولدى الوكل كتير وخير ربنا كتير واللى عيخلص نجيب غيره ، مدى يدك يا نادرة يا بتى وما تتكسفيش ، البيت بيتك ودول خواتك
- نادرة - أنا باكل أهو يا مرات عمى مش مكسوفة ولا حاجة حد يتكسف من أخواته برضوا

(بعد الأكل)

- أم مهران - جواهر لى السفرة وهاتيلنا الشاى فى المندرة جوام
- جواهر - من عنية يا حاجة
- عمر - ماتعمليس حسابى فى الشاى يا جواهر
- وهبى - ولا أنا
- أم مهران - به ماعتشربوش معانا الشاى ليه عيانين والا إيه
- وهبى - لع أنى بدى الحج الوحدة الزراعية أول ما تفتح علشان الحج أستلم حصّة الكيماوى بنفسى
- أم مهران - وأنت يا معدول
- عمر - أنى عايز الحج الكلية عندى محاضرة مهمة جوى
- أم مهران - طب يا نضرى ربنا معاك
- رؤف - إجرى بسرعة أحسن زمان المحاضرة واجفة مستنية....أجصد واجفة على حضورك
- عمر - الله هى بجت إكده ماشى يا رؤف...كله سلف ودين
- أم مهران - عتخرف تجول آيه يا ولد عاد سلف إيه ودين

- إيه
- عمر - ولا حاجة ياما بهرج مع أخوى
 - أم مهران - طب يا ولدى ربنا يخليكم البعض إتوكل إنت لتتأخر على محاضراتك
 - وانتى يا مريم عتروحي المدرسة
 - مريم - لا إحنا جاعدين فى البيت ماعنروحش اليومين دول ، عنذاكر ونستعد للأمتحان ، وأنى هروح أذاكر فى أوضتى ، وأبجى إبعيتلى الشاى هناك يا أم مهران
 - أم مهران - من عنيا يا حبيبتى ربنا ينجح مجاصدك يا بتى ، يعنى الحكاية صفصفت عليه أنى وانت يارؤف ونادرة
 - رؤف - أحسن ..دى أحلى حاجة حصلت علشان كنت عايزك فى موضوع مهم يا حاجة
 - أم مهران - خير يا ولدى
 - نادرة - طيب عن إنكم هروح أستعد علشش....
 - رؤف - أجعدى يا نادرة الكلام لازم يكون جصادك
 - أم مهران - خير يا ولدى طببتلى جلبى
 - رؤف - خير يا حاجة ..الموضوع بأختصار ومن غير لف ولا دوران أنى ونادرة بنحب بعض وإتفقنا ع الجواز
 - أم مهران - عتجول إيه
 - رؤف - اللى سمعته يا حاجة بجولك أنى عجب نادرة وعاييز أتجوزها وهى موافجة
 - أم مهران - صحيح يا ولدى ...إبصح يا نادرة اللى عسمعه ده

- رؤف - هو إيه اللي إصبح عكذب عليكى ياما
- أم مهران - لع أنى بدى أسمعها من حنكها أسكت إنت..ها اموافجة يا نادرة صوح
- (بخجل)
- نادرة - طبعا موافقة يا مرات عمى أنا عمرى ما الاقى
- أحسن من رؤف فى الدنيا دى كلها
- أم مهران - يا ألف نهار أبيض يا ألف نهار مبروك أنا
- مش مصدجة روى
- رؤف - مش مصدجة روحك ليه إكمنى مبشوفش يعنى
- أم مهران - لع متجولش إكده يا ولدى دا أنت زينة
- الشباب كولاته ، أنى أصلى كنت لسة بجول لابوك أنى
- حببت نادرة كيف بتى وأتمنى لو أخدها لولد من ولادى ،
- علشان إكده انى مش مصدجة يا ألف مبروك يا ولاد ربنا
- يسعدكم
- رؤف - أفهم من كدا إن الحاج عصران هو كمان موافج
- أم مهران - موافج طب دا لو عرف الدنيا ماعتسعيهوش
- من الفرحة إنت ماعترفش هو عيشكر فى نادرة كد إيه
- ، المهم إتفجتوا على إيه يعنى عنروح نطلبها ونتمم
- الزفاف ميتا
- رؤف - لا الموضوع ده هناجله شوية لحد ما نادرة
- تعرف اللى جاية علشانها
- أم مهران - اللى تشوفوه يا ولدى ..دى حياتكم وترتبوها
- كيف ما أنتم رايديين
- جواهر - الشاى يا ستى

- أم مهران - شأى ، روحى هاتى شربات يا مضروبة
(دخل الحاج عصران
- عصران - أنى سامع كلمة شربات ..شربات إيه يا حاجة
- نادرة - بعد إذنك يا مرات عمى أنا داخلة لمريم
- أم مهران - يه البننة خجلانة
- عصران - من إيه ومالها خارجة تجرى إكده ليه
- أم مهران - مكسوفة منيك ، أصل رؤف طلب يدها منى ،
وإن شاء الله عنتم كل حاجة ، لما تعرف راسها من
رجليها مع حبيبة مرت أبوها
- عصران - إكده يا ألف مبروك يا رؤف يا ولدى ،
والحمدلله أهو ربنا حججك طلبك أهوه ، ونادرة عتبجى
مرت ولدك وف خضنك على طول
- أم مهران - إى والله يا حاج ربنا عيحبنى
- عصران - ألف مبروك يا باشمهندس ...عروستك حنة
جمر بسم الله ما شاء الله ربنا يتمملك بخير ويفرح جلبك
يا ولدى ، لافينى كوباية شأى من دول يا أم مهران
- أم مهران - من عينى يا حاج
- عصران - بت يا جواهر جولى لستك نادرة تجهز
بعد منشرب الشأى
- (وعند بيت ام نادر طرقت نادرة الباب
- فتحت زوجة أبيها
- نادرة - السلام عليكم
- حبيبة - وعليكم السلام ورحمة الله ، إنتى مين يا شابة
- نادرة - أنا نادرة بنت المرحوم حسان الراضى

- أم نادر - عتجولى مين ؟ نادرة بت حسان الراضى؟
- نادرة - أيوة يا ست أم نادر
- أم نادر - إتفضلى يا بتى إتفضلى .. معاكى حد
- نادرة - عمى عصران الراضى
- (فقامت بتغطية وجهها بطرحتها السوداء)
- أم نادر - عدم اللامأخذة يا حاج عصران مجرداش أجولك
- إتفضل إنت عتعرف سلو بلدنا عاد
- عصران - مأخذتك معاكى يا ست أم نادر ، إدخلوا أنتوا
- وسنكرو الباب . وأنى عجعمز إهنة ع المسطبة خدوا
- راحتكم
- أم نادر - عشت يا خوى دجيعة وعيكون واجبك إحداك
- ، يا مرحب يا مرحب
- (دخلت أغلقت الباب وأمسكت نادرة من كتفيها وأخذتها
- بين أحضانها وهى تقبلها من كتفيها
- أم نادر - أهلا أهلا ببت الغالى إتفضلى إجعدى
- ..إستريحى يا نادرة
- (تعجبت نادرة من لقاء زوجة أبيها)
- نادرة - إزيك يا أم نادر
- أم نادر - مليحة اللى شفتك يا بتى الحمدلله الحمدلله ،
- إهى إهى إهى إهى
- نادرة - إنتى بتعيطى ليه يا مرات أبويا
- أم نادر - من فرحتى يا بتى شفتك كنى شفت حسان الله
- يرحمه...إحم إحم إحم إحم
- نادرة - ياااه إنتى واخدة برد جامد يا أم نادر

- أم نادر - متاخذيش إف بالك يا بتي تشربى إيه والا أجولك ، تظطرى معاى فطير ساخن وعسل وعندى جبنة طازة وجشطة إنما يستاهلوا خشمك الحلو ده
- نادرة - لا والله أنا فطرت عند عمى عصران وجيتك على طول يعنى ما لحقتش أجوع
- أم نادر - والله مايحصل أبدا لازم تاكلى لجمة إوتشربى حاجة
- نادرة - خلاص يبقى هشرب شاى وأدينى قاعدة معاكى صدقيني لو حسيت بجوع هقولك هاتيلي أكل
- أم نادر - إيصوح؟
- نادرة - بصوح والله يا أم نادر
- أم نادر - عموما عدة الشاى والجهوة جدامى أهى ، عولع وأعمك شاى إنتى والحاج عصران . يا مرحب، يا مرحب
- نادرة - فى الحقيقة يا ست أم نادر أنا ما كنتش أتصور إنك تقابليني المقابلة الجميلة دى
- أم نادر - واه وعجابك شين ليه يا بتي دا إنتى من ريحة الغالى، لكن بدى اسألك سؤال
- نادرة - إسألنى يا حاجة أم نادر
- أم نادر - مين اللى جالك إن حسان متجوز . الحاج عصران والا مرته أم مهران
- نادرة - لا الحاج عصران ولا الحاجة أم مهران
- أم نادر - طب إمال كيف عرفتى المستخبى من أكثر من عشرين سنة فاتت ، دا أحنا مكتمين ومخرجين ع العيلة

- كولتها محدش يهوب نواحيكم لجل الخبر ميتعرفش
- نادرة - طب ليه يا مرات أبويا مخبيين عننا؟
- أم نادر - دى كانت رغبة أبوكى وأنى من بعد منه
- نادرة - طيب رغبة أبويا وأبويا الله يرحمه لكن رغبتك إنتى ليه؟
- أم نادر - ولجل كانت رغبته وهو عايش أنى لازما أحافظ عليها كرامة ليه ، وأنى معكسرش طلب لحسان حتى وهو ميت جولتى إيه
- نادرة - ياااه للدرجة دى كنتى بتحبيه؟
- أم نادر - وأكثر من إكده . ناضرة الفحرين الغامجين اللى على خدودى دول ، من كتر البكى على فراجة الله يرحمك يا حسان يا زينة الرجال يا أسد إومالك زى يا سابعى وإنت ميت كيف وإنت حى يا حساااان يا حساااان اهى اهى اهى
- نادرة - طب بس صلى ع النبى يا أم نادر ماتعمليش فى نفسك كدا.. أيه دا يا خبر داننى تتعبى ويجراك حاجة
- أم نادر - يا ريت..تعرفى لو مش حرام وخايفة من ربنا عاد كنت سميت نفسى وراه
- نادرة - أد كدا كنتى بتحبيه
- أم نادر - عحبه وبس ، جولى ده كان نضرى اللى عشوف بيه ، وكان جلبى اللى عيدج لجل ما أعيش ، وراجلى اللى شايفلى مصالحى ومحافظ لى على جرشى ومالى السحتوت جبل الجنيه عمره ما طمع فىا ، ولا جالى كلمة شينة أفكرها تزعلنى منه حسان حسان ده

حتة من جلبى من جوة

- نادرة - طب بس ماتعيطيش أرجوكى إنتى خلتينى أنا
كمان أعيط

- أم نادر - لا خلاص يابتنى مهعيطش تانى واصل بس
إنتى امتبكيش متبجيش ضيفتى ومنورانى وعسيبك
تبكى إكده ، إتفضلى الشاى وأنى هجوم أجيب طبج
جورص جنب الشاى والافيه للحاج عصران إبسرعة
وأعاود

- نادرة - على راحتك يا أم نادر

(نادرة تحدث نفسها)

- أيه دا مش ممكن اللى أنا شفته بعينى دا ، فيه حد يحب
إنسان للدرجة دى ؟ يا ترى يابابا أيه اللى مخلى مراتك
تحبك الحب ده كله ، يا ترى أنت اللى مالكش زى والا
هى اللى بتحبك زيادة ، ياااه على أد مانا مستغربة على
أد مانا سعيدة إنى بشوف نموذج حقيقى قدامى للحب
والوفاء

(عادت أم نادر)

- أم نادر - ساكتة ليه إشرى يا بتى الشاى ودوجى
الجرص دى عتجبك أنى لفاهها بالسمن البلدى واللبن
الجاموسى الصابح

- نادرة - حاضر يا أم نادر هذوق أهو ، بسم الله الرحمن
الرحيم ... الله تسلم إيدك يا أم نادر

- أم نادر - تسلميلى من كل رضى يا بت حسان ، لكن
برضك ماجولتليش مين اللى عرفك إنى مرت أبوكى

(نادرة تخرج ورقة من شنطتها)

- نادرة - اللي عرفنى دى
- أم نادر - وإيه دى يا بتى وصل نور
- نادرة - لا دى حوالة كان والدى بعثها بأسم نادر أخويا لقيتها فى جيب جلبية أبويا وأنا برتب الدولاب
- أم نادر - ورجة ...أكن ورجة صغيرة زى دى تكشف اللي خبناه عنكم العمر كله
- نادرة - أهو سبحانه لما يريد يفعل ما يريد
- أم نادر - ونعم بالله عندك حج يابتى والله
- نادرة - آمال فين نادر أخويا؟
- أم نادر - نادر هيببييه
- نادرة - مالك بتتنهدى ليه يا أم نادر
- أم نادر - لا أبدا ، بعدين يابتى هعرفك كل حاجة بس نجعد نتحدث لحالنا الاول ، وبعدين أبجى أصحيلك نادر
- نادرة - آاه يعنى هو لسة نايم لحد دلوقتى ؟ طيب سبيه مستريح لو إنى مشتاقة أشوفه
- أم نادر - عتشوفيه وعتشبعى منيه كمان ماتستعجلش ، جوليلى بعد ما جريتى الورجة دى إيه اللي حوصل ؟
- ورتيها للست زينات
- نادرة - فى الحقيقة ، أيوة
- أم نادر - وليه يا بتى تزعليها
- نادرة - ماهو ماكنش ينفع أجى الصعيد هنا وأبات ، من غير ما أقولها وبعدين زى ما بيقولوا الصراحة راحة
- أم نادر - ها ولما عرفت الست زينات جالت إيه

- نادرة - يا ااه دى زعلت وفضلت تكلم روحها يجى ساعة ، لدرجة إنها مش عارفة يا ترى هى الزوجة الأولى والا الثانية ، وتسال نفسها ، يا ترى جدتى نادرة عارفة والا لا وفضلت تندب وتلوم أبويا ع العملة دى
- أم نادر - تلوم مين ..تلوم حسان ، هى إيش تكون علشان إتلومه إتجنت دى والا إيه جطع لسانها
- نادرة - يا خبر إنتى زعلتى يا مرات أبويا
- أم نادر - لا والله عزغرد وأضربلها تعظيم سلام ، دا لا عاش ولا كان اللى عيتفوه بأى كلمة ع الحاج حسان
- نادرة - أيوا بس هى لها حق تزعل ، معذورة يعنى
- أم نادر - حج إيه جاك كسر حوجك يا بعيدة إنتى وهى ، إنتى عتخرفى تجولى إيه
- نادرة (بخوف) - أانا مقولتش حاجة تزعلك يا مرات أبويا
- أم نادر - بدك إتجولى إيه أكثر من إكده يا بت زينات ، وبعدين تلوم عليه ليه ده جزاته اللى لمها وعمل لها سعر الفجرية دى
- نادرة - أرجوكى متغلطيش يا مرات أبويا
- أم نادر - لحد حسان وتجفوا فاهمة والا لع ، ولما تروحي لها جوليلها ، أنى الجديدة يا زينات أنى الأصل وإنتى اللى واخذك شفجة يابت مبيض النحاس يا عويلة
- نادرة - أرجوكى يا ست أم نادر كفاية بقى (جلست نادرة فوق الأريكة ، وهى تبكى بشدة مما رأت من زوجة أبيها التى تحولت فى لحظة من النقيض الى النقيض

وعندما انتبهت أم نادر لبكاء نادرة إنتابها الهدوء وعادت لطبيعتها

- ومدت يدها إلى أبريق ماء موضوع على المنضدة ، وشربت ثم مدت يدها تعطيها لنادرة قائلة
- أم نادر - متبكيش يا بتي أعذريني ، أنى أصلى جدام أى حد يجيب سيرة حسان بالشين معجدرش أمسك نفسى إشربى يابتي إشربى لجل ما تهدي أستغفر الله العظيم...إستهدي بالله علشان خاطرى يا نادرة وحجك عليا يا بتي ماعتبكيش
- نادرة - خلاص يا مرات أبويا أنا مش زعلانة ، وهقوم أمشى ومش عايزة أعرف حاجة خلاص
- أم نادر - والله ما يكون أبدا ، تمشى لحالك وأنتى زعلانة من بيتى إكده ، أجدى يا بتي وأنى عريك وأريح جلك ، وعجاوبك على كل اللى إنتى تريدى تعرفيه..إتبسمى بجى خلى جلك أبيض...واه إتبسمى يا بتي خلى الجاعدة تروج آمال
- نادرة - مفيش حاجة يا أم نادر خلاص
- أم نادر - والله إنتى بت حلال إمصفى ، أدام روجتى على طول اكده ، تبجى جلك أبيض ونيتك خير
- نادرة - أه والله يا مرات أبويا ، أنا نيتى خير وربنا العالم كل اللى جانبى هنا كنت عايزة أعرف إجابة لسؤالى
- أم نادرة - إيه هو السؤال يا بتي
- نادرة - ليه أبويا حسان الراضى صاحب المال والجاه

والشهرة ، سايبنا عايشين فى الفقر، رغم فلوسه دى كلها

- أم نادر - كلام إيه اللى عتجوليه ده يا بتى ...كيف يعنى حسان ماكنش معيشتكم فى نعيم والا إيه؟

- نادرة - نعيم ...تعالى زورينا وشوفى النعيم اللى إنتى بتتكلمى عنه ، ابويا كل اللى سابهلونا أول عن آخر 60 ألف جنيه المفروض منهم تعليمى وكسوتى وأجرة الشقة اللى ساكنينها وشوارى

- أم نادر - يه يه يه كيف ده ...اللى عسمعه ده صوح؟ اللى أعرفه إن حسان كان معيشتكم أحسن عيشة

- نادرة - والله كل كلمة قلتهالك صح مكذبتش ولا فى حرف

- أم نادر - أنى معكديكش يا بتى أنى بس مستغربة م الحديث اللى عسمعه ده ، وبعدين عملتو إيه بعد ما مات حسان

- نادرة - أمى تعبت وأخذت من المبلغ اللى سابه وصرفت على علاجها ولما لقيت الفلوس نقصت ، إطريت أنزل للسوق أبيع وأشتري. وحاولت بقدر الإمكان إنى أكمل المبلغ زى ما كان . لكن مقدرتش لحد دلوقتى أكمله كله . إنتى عارفة العيشة غالية أد إيه

- أم نادر - ها.. وعرفتى تتاجرى وتحفى فى السوج إلحالك نادرة - أيوة آمال إيه ،عندك حل بديل؟

- أم نادر - لا أنى بس مستغربة عليكى والله أنى مامصدجاش . المسئولية اللى على اكتافك يا بتى ، واللى

مستغرباله أكثر إن حسان مسابش ليكم فلوس أمال على
إكده كان عيودي فلوسه فين؟ لا دى حاجة تمخول
إبصوح

- نادرة - برضوا، وأنا اللي قلت إنك عارفة عنه كل حاجة
وهتدلينى ع الحقيقة فين

- أم نادر - بس كيف إذا كان جبل ما يموت بشهر ملافينى
600 ألف جنيه وكان نصيبه 200 ألف واخدهم من يدى
دى وجالى هصبح أرميهم فى البنك؟ ييجوا راحوا فين
عاد؟

- نادرة - بما إنك صريحة معايا وناوية تقفى جنبى يا أم
نادر . أنا عارفة ربع ثروة أبويا راحت فين

- أم نادر - فين يا بتى؟

- نادرة - أمى حكّت لى حاجة صغيرة لكن لفتت نظرى

- أم نادر - إتكلّمى يا بتى حكّت لك إيه أمك

- نادرة - قالت إنها سمعت أبويا وأنور الصاحى بيتكلموا
وكان أبويا بيلوم على أنور إنه بقاله فترة مدلوش أى
فلوس

- وقاله إن شحنة البقر الفريزيان جاية فى الطريق يومها
والدى قاله إنت عارف إنى حطيت ربع ثروتى فى الشحنة
دى ووصاه لو جراه حاجة يبقى ياخذ مكسبه من
الشحنة بعد ما يسواقها بما يرضى الله والباقى مع
نصيبى إذا جralى حاجة أبقى إديهم لمراتى
وبنتى..ومعداش الأسبوع ، أتوفى والدى بعد الكلام ده
بيومين او ثلاثة وأديلنا سنة وشوية أهو ولا شوفنا قرش

- ولا عشرة ، أیه رأيك فى الكلام ده يا أم نادر بما إنك كنتى أقرب حد لأبویا وبينكم زى ما فهمت أعمال
- أم نادر - رأيى ..أنور الكلاف ده حرامى ، ولما الحاج حسان جالى ع الموضوع ده جولتله صحصح للراجل ده . ده مهما يكون حته كلاف لا راح ولا جه وخذ احتياطاتك أدام نويت إتساعده ...حاکم الحاج حسان كان فيه خير كتير وكانت فيه ميزة إنه يحب يساعد الغلبة لحد ماتجف على رجليها بس بشرط لما يتأكد ان اللى عايساعده ده مخه نظيف وكان الكلاف ده من ضمن الناس اللى عيساعدهم وبعدين انتى عتجولى ربع ثروة أبوكى فى الصفحة دى ، إنتى تعرفى ربع ثروته دى كد إيه دى كتير جوى يا بتى
- نادرة - كتير يعنى كام كدا يا أم نادر
- أم نادر - متعديش يا بتى أصلك هتتعبى إكده
- نادرة - للدرجة دى فلوس أبویا كتير
- أم نادر - فوج متتصورى يا بتى
- نادرة - طيب وليه إنتى تعرفى عن أبویا كل أسرارہ وأمواله وإحنا لا
- أم نادر - ماتزعلیش يا بتى . أنى جولتلك عريحك وأنى عند جولى ، بجى أنى كان إحدای مال كتير وجت ما أتجوزت الحاج حسان وبالعشرة والمحبة وثجت فيه وظلّبت منیه إنه يدور هالى فى السوج الكلام ده بعد ما ولدت نادر بسنتين أو ثلاثة يومها الدكتور منعنى من الخلفة وجالى إن بيت الولد عندى عكر وعمرى معخلف

- تانى وإذا خلفت كل خلفتى عتكون ملطوطة
- نادرة - ملطوطة يعنى أيه مش فاهمة؟
 - أم نادر - سيبك م الحديث ده عاد مش وجته بعدين أفهمك لما أتأكد من اللى أنى حساه ، خليكى معاى آمال
 - نادرة - معاكى يا أم نادر كملى
 - أم نادر - وجتها حسيت إن ولدى عيضيع فى الدنيا دى لأنه وحيد طلبت من حسان إنه يتجوز ، فى الأول كان مموافجش وزعطنى برة الجاعة ومبيتنيش جاره
 - وأنى وعياله من ورا الباب منامش ليليتها جاعد يفكر ويعفر سيجارة ورا الثانية ولما طلع النهار لجيته عينادم على ، ويحج نفسه ليا وجالى
 - حسان الراضى - حجك عليا يا أم نادر
 - أم نادر - على إيه يا حاج هو أنت عملت فيا حاجة
 - حسان - إيوة كشيت فيكى وزعطتك من الجاعة
 - أم نادر - لع ولا يهملك يا خوى كنت زعلان شوية وإيه اللى فيها واحد غيرك فى الحالة اللى كنت وعيالك فيها دى كان مد يده عليا، لكن إنت معتطلعش منك العيبة
- واصل
- حسان - ربنا معيحرمنيش منك يا أم نادر يا غالية
 - أم نادر - ولا يحرمنى من شخطك وناطرك وحنيتك يا حسان ، بجولك إيه يا حسان
 - حسان - جولى يا بت الأصول
 - أم نادر - دلوكيت أنى معخلفش غير نادر وبعد عمر طويل ليا وليك عنسيبه وحيد فى الدنيا محدش يراعيه

ويشيل همه

- حسان - بعد الشر عليكى ربنا يخليكى ليه
- أم نادر - ويخليك يا جلبى بس مهما يكون ، الموت علينا حج يا حسان إسمعنى يا ابن الناس وإذا الحديث اللى عجولها لك معجبكش إنساه وإمسحه بأستيكة وكنى مجولتوش
- حسان - إتكلّمى يا ست الناس وأنى مطرطجك ودانى أها بدك إتجولى إيه
- أم نادر - أنى بدى فى الأول تدورلى فلوسى اللى ورثتها عن أمى وأبوى فى تجارة رابحة ، تكون عتفهم فيها صوح. والمكسب اللى يطلع منها يتجسم على ثلاثة تلت ليك وتلت ليا وتلت لولدنا نادر..ده أولا
- حسان - تمام . وثانيا
- أم نادر - ثانيا أنى اللى عجولك تتجوز يا حسان إنت لساك صغير ولازم يبجالك عيال مهما يكون الولد عزوة ومن ناحية ثانية أنى عايزة يكون لولدى خوات يراعوه ويخلوا بالهم منه..إنت مليكش ذنب يا ولد الناس
- حسان - والله أنى فكرت فى اللى عتجوليه ده لجيت عندك حج ، لكن أنى خايف تكونى بتظلمى روحك علشانى وخايف من ناحية ثانية أكون انى اللى بظلمك إنتى عارفة انى عحبك كد إيه يا حبيبة وإنتى صح الحبيبة أنى أزعل ميت مرة وأنتى متجيش على نفسك هفوة
- أم نادر - ربنا يخليك ليا ولا يحرمنيش منك أبدا يا أبو

نادر

- حسان - طيب يا ستي إن كان على تدوير المال . أنى موافج لكن حكاية الجواز من غيرك دى صعب عليا جوى يا أم نادر
- أم نادر - ولا صعوبة ولا حاجة دى يمكن فى الأول نستصعبها ، لكن بعد إكده عنتعود عليها العيشة دى . صدجنى دى رغبتى وأنى بأذن لك وبرضاى يا حج هو أنت عتغصبنى على حاجة
- حسان - تعالى أحب على راسك يا حبيبة أنى لما ألف الدنيا كلتها معلجيش ضفرك يا غالية . ومادامت دى رغبتك يبجى تختارى إنتى المرة الجديدة
- أم نادر - لع إختار إنت اللى تلد عليك ، بس ليا عنديك طلبين يا حسان
- حسان - أطلبى يا عين حسان
- أم نادر - الطلب الأول ماتتجوزش من البلد ولا من الصعيد كولاته
- حسان - واه آمال عتجوز من فين
- أم نادر - - اجولك هاتها مصراوية
- حسان - مصراوية - والطلب التانى
- أم نادر - الطلب التانى تكون فجيرة بت واحد غلبان
- حسان - و إشمعنى إكده
- أم نادر - أولا تكون فجيرة علشان لما تعيشها عيشة تانية مهما تكون هتبجى احسن من عيشة ابوها وعتحس انها مبسوطه وتريحك وتطاوعك ، إنما عتجيبها غنية

- عتنتط عليك إوتتجلع ومتجدرش عليها وأبسط كلمة
تجولها لك إنت جاييني من بيت فلان وعلان وتبجي
عايش فى مشاكل إسألنى أنى ع المصراوية دول . مانت
عارف إنى عزور ولد عمى متجوز من إهناك وادى إنت
ناضر بنفسك المشاكل والبغدة بتعتها ..أنى رايدالك
راحة البال وبعدين الفجيرة عت حافظك على مالك
ومعتبدرش شمال ويمين وعت حافظ على عيالک إوتو عالهم
- حسان - طب مش يمكن تبجي شابعة بعد جوعة
وتبعتلى فى مالى شمال ويمين
 - أم نادر - لا مانت تنجي المتربية يا حسان اللى تحافظ
على مالك إومال ولادها أنى اللى علمك والا إيه
 - حسان - إى والله عندك حج يسلم مخك المنور ده يا أم
نادر يا غالية
 - أم نادر - ها إتفجنا
 - حسان - طب فوتينى أدورها فى دماغى وأفكر زين
وارد عليكى
 - أم نادر - لا ماعسيبكش ولا دجيعة إتوكل على الله يا
حسان وخير البر عاجله وأدى إنت شجتك اللى عتبيت
فيها فى مصر تنفع تتجوز فيها وأهو ع الأجل لما يكون
لك شغل هناك تلاجى اللى يخدمك ويونسك يا نضرى
 - وعنھا ونزل أبوكى على مصر وإتجوز أمك وجابك يا
ست البننة ، بننة صوح لكن كيف الجمر وبميت راجل
 - نادرة - وإيش عرفك إنى بميت راجل
 - أم نادر - البننة اللى تجف فى السوج وتتحمل مسؤولية

- بيت كيف الرجال تبجى بميت راجل واللى تدور على
حجها وتصمم تلاجية تبجى بألف راجل
- نادرة - ربنا يخليكى يا ست أم نادر كلك ذوق...لكن أنا
مستغرباكى أراى جالك قلب تتحايلى على جوزك يتجوز
غيرك
- أم نادر - لسبب بسيط جوى يابتنى ، لأنى عحبه
- نادرة - تحبيه تقومى تخلى واحدة تانية تقاسمك فيه
- أم نادر - لع عحبه أكثر من روحى ونفسى وعحب
يكون أسعد مخلوج وطالما النجص من عندى يكمله من
واحدة تانية لجل ملومش نفسى وأجول إنى سبب تعاسته
- نادرة - طب ماهو معاه الولد . يعنى كفاية. وبعدين
ماهو لما إتجوز خلف مرة واحدة . وبنت كمان يعنى
مش واد زى ما بتحبوا فى الصعيد
- أم نادر - الولاد دى رزج وهو رزجه إكده لما زينات
ولدتك جالها نزيف مرضيش يخف والدكاترة جرروا
يشيلولها بيت الولد ولما طلبت من حسان يتجوز تانى
حلف عليا مافتحش السيرة دى تانى وأنه عنده نادر
إننادرة بالدنيا كلتها
- نادرة - آيه أنا أمى شائلة الرحم
- أم نادر - واه من زمان يا بتى . إنتى مكنتيش تعرفى والا
إيه
- نادرة - أول مرة أعرف
- أم نادر - المهم يا بتى ناوية تعملى إيه
- نادرة - ناوية ماسبش حقى ولازم أوصله

- أم نادر - جبل ماتجوليلى ناوية على إيه عايزة أوريكى حاجة
- نادرة - خير يا مرات أبويا
- أم نادر - تعالى يا بتى أن الأوان إتشوفى نادر أخوكى (أمسكت يدها ودخلت حجرة نادر)
- نادرة - ده نادر أخويا
- أم نادر - إيوة يا نادرة هو ده خوكى يابتنى ، كيف مانتى وعياله مخه على كديه جالولى أسمه الولد أبصر إيه إكده
- نادرة - أيوة الطفل المنغولى
- أم نادر - إدخلى يا بتى ...تعالى يا نادر سلم يا ولدى على خيتك
- نادر - خخخختى
- أم نادر- إيوة يا ولدى خيتك ، فاكربوك حسان .. (يحرك رأسه بنعم مخرجاً لسانه)
- نادر - ببوى
- أم نادر - دى بجى تبجى بته يعنى خيتك سلم عليها دى عتحبك كثير
- (إقتربت نادرة منه وأمسكت يده)
- نادرة - أهلا يا نادر يا حبيبى أنا نادرة أختك أنت فاهمنى
- نادر يضحك - ههههه نادى نادى ههههه
- نادرة - أيوة يا حبيبى نادرة ونادر شفت بقى أسامينا أنا وأنت شبه بعض إزاي
- نادر - هههههاااه نادى نادى وقرب عليها بوس نادى

بوس نادية

- نادرة - يا حبيبى أنا أبوسك أنا يا نور عيني
- نادر - حب نادية أنا
- نادرة - وأنا كمان حبيتك أوى أوى يا نادر
- نادر - أقعد عانا إنا
- نادرة - أيوة هقعد معاك هنا النهاردة وهسافر وأجى تانى
- نادر - سيب نادى
- نادرة - مانا هرجع تانى ماتخفش
- نادر - عايا إلعب عايا
- نادرة - إن شاء الله هجى وأقعد ألعب معاك لحد ما تزهرق
- نادر - حبك نادية حبك نادية
- نادرة - وأنا كمان
- (نادرة متأثرة وعنيها امتلئت بالدموع)
- نادرة - أم نادر تعالى نقعد برة
- أم نادر - كيف ما تحبى يا بتى ، إنتى عتبكى يا بتى
- نادرة - غصب عنى يا أم نادر..أنا كنت متخيلة نادر أخويا الأكبر منى ، هيبقى سند ليا . مكنتش أتخيل إنى أنا اللى أكون سند ليه ، بس صدقيني أنا حبيته أوى يا أم نادر، وإنتى كان عندك حق تأمنى له مستقبله وأنا أوعدك . من النهاردة نادر أخويا فى عنية وقلبى ومش هخليه يحتاج لحد أبدا طول مانا عايشة
- أم نادر - يحتاج إيه يا بتى . من جهة المال ده لو داس على ماله يجيب السحاب . المهم فى اللى عيخلى باله منيه ميتجالش من حملة

- نادرة - أنا عمرى ما أتأقل من أخويا ولو محلتيهوش
حاجة ، ولو مش مصدقة خلى المال بأسمك أو إتبرعى
بيه للأيتام مش هيهمنى ، أنا كل اللى يهمنى هو أخويا
لحمى ودمى
- أم نادر - وأنى لو معارفاش إكده ، ماكنتش ريحتك ولا
جاوبتك على سؤالك ، أنى متأكدة وعارفة إنك إبعشر
رجالة شديدة وحنينة فى نفس الوجت كيف أبوكى الله
يرحمه وأنى عمرى معطن على نادر إلا معاكى وف
حضنك . لكن
- نادرة - لكن أيه يا أم نادر كملى
- أم نادر - أجصد يعنى لو حصل يعنى وإتجوزتى عيكون
مصير نادر إيه
- نادرة - متخافيش يا أم نادر ، أنا أول شرط هشطره ع
اللى عايز يتجوزنى إنه يتجوزنى ومعايا . أخويا ولازم
يفهم إنه مش أخويا وبس . لا دا أخويا وأبويا وإبنى وكل
شء ليا فى الدنيا ولو موافقش يبقى مش ضرورى منها
الجوازة من أصله حتى لو إترهينت عليه دا مهما كان
أخويا
- أم نادر - طمنتينى يا بتي ربنا يخليكى ويجازيكى كل خير
أهو أنى دلواكيت لو مت عموت وأنى مرتاحة
- نادرة - بعد الشر عليكى يا مرات أبويا وأم اخويا وست
الستات
- أم نادر - يعنى مزعلناش منى يا بتي
- نادرة - أزعل منك بالعكس دانا سعيدة اللى إتعرفت

- عليكى إنتى شخصية نادرة فى الزمن دا
- أم نادر - الله يحفظك يا بتى
- أم نادر - ها جوليلى بجى ناوية تعملى آيه فى فلوس أبوكى اللى لهفها منيكم الكلاف الحرامى اللى يندغد إف جلبه
- نادرة - والله ما أنا عارفة يا أم نادر . بس اللى أنا عارفاه كويس أوى إنى مش هسيب فلوس أبويا للكلب ده وهعرف أرجعها إزاي
- أم نادرة - أجولك يا نادرة حاولى معاه بالهوادة لو مدكيش حجك قوليلى وأنى عتصرف
- نادرة - هتعملى آيه يعنى
- أم نادر - اللى معيجيش بعصاية موسى ، يجى بعصاية فرعون
- نادرة - يعنى آيه مش فاهمة
- أم نادر - يعنى هأجر عليه اللى يخلوه ينطج ويرجع الفلوسات غصب عنيه
- نادرة - ربنا ميحرمنيش منك يا ست أم نادر
- أم نادر - إسمعى يا بتى . أنى معايزكيش إتشيلى هم طول مانى على وش الأرض
- نادرة - أنا مش عارفة أقولك آيه
- أم نادر - ماتجوليش حاجة ، دأنتى بت الغالى وأخت ولدى. ولو تجبلينى زى والدتك . تبجى بتى يا بتى
- نادرة - يا خبر وأنا أطول بيقالى ، أمين حنينين وطيبين كدة طب دا أنا ربنا بيحبنى

- أم نادر - إتعيشى يا بتى
- نادرة - طيب أستاذن أنا
- أم نادر - كيف ده تمشى كيف من غير مانتغدى وتببتى معاى ومع خوكى يومين
- نادرة - معلىش إنتى عارفة إن والدتى تعبانة . وأنا يادوب ألم شنتطى من عند عمى عصران والحق أول قطر الصبح
- أم نادر - جطر جطر إيه ده ، من النجمة يكون إعاشة عندك يوصلك ويفضل معاكى كمان وأى حنة تروحها يوصلك
- نادرة - يا خبر دا كدا كتير أوى يا أم نادر
- أم نادر - لا كتير ولا حاجة عبعتهولك من النجمة
- نادرة - ربنا يخليكى ليا وميحرمنش منك ، أبدا بعد إذنك أدخل أسلم على نادر قبل ما أسافر
- أم نادر - إتفضلى يا بتى بيتك ومترحك إتحركى فيه كيف ما تريد
- (دخلت نادرة)
- نادرة - أشوف وشك بخير يا نادر
- نادر - إنى روح فى نادية
- نادرة - أنا هسافر وهاجى تانى
- نادر - أنا عيط نادية
- نادرة - لا يا حبيبى متعيطش أوعدك أجى أشوفك وهجيب لك معايا حصان أحسن من اللى بتلعب بيه ده
- نادر - دد نادية

- نادرة - بجد يانادر أشوف وشك بخير يا حبيبي
- نادر - سلامة نادية سلامة
- نادرة - أشوفك على خير يا أم نادر
- أم نادر - مع ألف سلامة يا بتي متتأخريش علينا
- نادرة - ان شاء الله يا أم نادر
- أم نادر - بالسلامة يا بتي سلمى على اللي رايحة حداهم
- نادرة - الله يسلمك

(خرجت نادرة)

- نادرة - يالا بينا يا عمى؟
- عصران - يالا يابتي ..السلام عليكم يا أم نادر
- من وراء الباب
- أم نادر - وعليكم السلام يا حاج عصران

(فى الطريق)

- عصران - ها إتوفجتى للى جيتى له يا بتى؟
- نادرة - الحمد لله يا عمى أحلى حاجة وصلت لها هو أخويا

نادر

- عصران - آمال مشايفكيش رايجة إكده ليه ، أوعى تكوت
- الولية اللى إسمها حبيبة دى طولت لسانها عليكى والا
- زعلتك إف حاجة

- نادرة - لا أبدا يا عمى بالعكس دى ست كريمة وذوق جدا
- عصران - غريبة دى
- نادرة - إيه الغريب فى كدا؟

- عصران - لا أصلى أنى أول مرة أسمع من حد عيتحدث
- عليها حلو كيف ما بتحكى إكده دى حبيبة دى معروفة فى

- العيلة والبلد كلتها إنها شديدة ولسانها متبر منيها
- نادرة - حضرتك إتعاملت معاها قبل كدا يا عمى
 - عصران - الحجيجه ... لا
 - نادرة - الست من أول ما وقفت على بابها قابلتني أحسن
 - مقابلة ورحبت بيا وأكرمتني وجاوبتني على اللي أنا
 - عايزة أعرفه
 - عصران - يه يه يه يعنى مصدتكيش خالص ، إمال أنى
 - واعيئها وأنى جاعد ع الباب عتزعج اوصوتها خرج
 - إودانى
 - نادرة - ههههههه هى فيها حاجة مش عارفة دى عيب
 - والا ميزة ...الى يجيب سيرة أبويا بأى كلمة متعجبهاش
 - تطلع فيه زى ما سمعتها كدا بصراحة يا عمى أنا عمرى
 - ما شفت وفاء بالشكل ده
 - عصران - والله يا بتى طول عمرنا نعرفها شديدة،
 - وعتكرف الى عيجرب منيها
 - نادرة - هى فعلا شديدة لكن واضح إن شدتها دى فى
 - الأمور المهمة أو المصيريه ويمكن علشان ماحدث
 - يحاول يقرب منها ومن ابنها ويستغل ضعفها كونها ست
 - وأرملة ومعهاش حد ، حتى الولد الى ربنا رزقها بيه
 - زى مانت راسى معاق ذهنيًا
 - عصران - سبحان الله فيه مثل يا بتى بيجول (تعرف
 - فعلان ...أعرفه ...عاشرته لا ...يجب معرفتوش
 - نادرة - تماااا إنت جبت الخلاصة يا عمى
 - عصران - يعنى عرفتى مال بوكى فين

- نادرة - لا والله يا عمى بس إن شاء الله هعرف متقلتش
- عصران - ربنا معاكى يا بتى وعلى العموم إن كان ع
- الفلوس اللى إنتى عايزاه ومحتاجاله من جنيه لمليون
- جنيه رجبتى سداة
- نادرة - ربنا يخليك يا عمى وأنا أوعدك ، لو إحتجت لأى
- شء مش هميل غير عليك يا عمى
- عصران - طب جربى الا المعديّة بينها إنتلت وعتطلع
- ،أستنى يا ريس جربى يا بتى وهاتى يدك ، إكل على الله
- يا أسطى
- (عند باب السرايا)
- عصران - أدخلى إنتى يا نادرة لمرت عمك .وأنى عدخل
- المندرّة أحسن عواد ببشاورلى يظهر فيه حد مستننى
- دخلت نادرة ووجدت زوجة عمها تصفص شعرهاا)
- نادرة - السلام عليكم
- أم مهران - وعليكم السلام إنتى جيتى يا بتى
- نادرة - جيت يا مرات عمى إنما آيه الحلاوة دى
- أم مهران - يخليكى يا بتى لجيت نفسى فاضية جولت
- أتسبح وأجدل ضفايرى
- نادرة - بس ما شاء الله شعرك حلواوى يا جاجة
- أم مهران - ههههه هو عاد فيه حلاوة الحلاوة دى
- كانت زمان كنت عجلد الضفيرة متجدريش تطبجى يدك
- عليها
- أم مهران - المهم عملتى إيه
- نادرة - الحمد لله

- أم مهران - عرفتى طريق مال حسان
- نادرة - الحقيقة لا بس إتأكدت أن مال أبويا كتير وكثير
أوى كمان
- أم مهران - وأيه الجديد ما دى حاجة معروفة. إوكل
الدنيا تعرفها ...المهم راحت فين وفين طريقها ...مرت
أبوكى دلتك والال لع
- نادرة - هى قالتلى إن ماله كتير وهى كمان محتارة أبويا
ودا فلوسه فين ؟
- أم مهران - والله مانى مصدجة إن الفلوس دى خرجت
من تحت يد حبيبة
- نادرة - لا يا حاجة مظنش لأنى زى ما سمعت وفهمت إن
لها أد فلوس أبويا مرتين هى وأخويا نادر
- أم مهران - طيب إبذمتك جابلتك إبنادر خوكى
- نادرة - أيوة طبعا شفته وسلمت عليه
- أم مهران - إبصوح
- نادرة - أه والله وأيه الغريب فى كدا
- أم مهران - أصل الولية دى غويطة جوى ومحدث يعرف
عنيها حاجة لا هى ولا ولدها
- نادرة - بالعكس أنا إتكلمت معاها دى ست واضحة
وصريحة فوق ماتتصورى
- أم مهران - واه ..كيف ده يا بتي عمرنا ما سمعنا عنها
الكلام ده البلد كلتها تعرف عنيها إن نفسها تجصف
المسمار وإنها شديدة وحويطة ومحدث يجدر يهوب
ناحيته من إلسانها وجاتمتها

- نادرة - لا والله يا مرات عمى يمكن خوفها على مالها
وابنها بعد وفاة أبويا خلاها ترسم لنفسها وش تانى يبعد
عنها الناس ومايطمعش حد فيها
- أم مهران - عالم بيها ربنا يا بتى جايز برضك ليه لع ،
طيب إوبعدين ناويتى على إيه يا بتى
- نادرة - مش عارفة بس أكيد هرجع لأمى وأحاول أدور
على أى خيط وأمشى وراه
- أم مهران - خيط زى إيه يعنى
- نادرة - يعنى أكيد والدى معاه أوراق يثبت أمواله سواء
كان فى بنك أو مشارك بيها فى حاجة أو شارى بيها
عقارات أكيد فيه أوراق تثبت ، هدور عليها وربنا
يعطرنى فيها
- أم مهران - ربنا معاكى يا بتى
- نادرة - مريم فى أوضيتها
- أم مهران - جاعدة مع خوها معرفاش عيشرح لها إيه
- نادرة - طب عن إذنك هدخل أتوضى وأصلى العصر
وأدخل لهم
- أم مهران - إتفضلى يا حبيبتي حرما مجدما
- نادرة - جمعا إن شالله
- (توضحأت نادرة وصلت ودخلت للشرفة ووجدت رؤف
يقوم بشرح الدروس لمريم
- رؤف - عرفتي بجى يا حبيبتي النبط الجمالية فى النص كد
إيه وبكدا يبقى إنتى ألميتى بكل صغيرة وكبيرة . مواطن
الجمال معانى الكلمات زى ماشرحتها لك . وصلت

- مريم - وصلت يا جهبذ اللغة العربية
- رؤف - ههه طيب يا لميضة
- نادرة - إحم إحم
- مريم - نادرة إنتى جيتى
- نادرة - أيوة يا مريم
- مريم - حمد الله ع السلامة... عن إذكم أنى بجى
- نادرة - أنا جيت أومتك والا أيه؟
- مريم - لا داحنا كنا خلصنا وأنا كنت بلم كتبى وجايمة
- أجعدى يا حبيبتي وعن إذكم أنى بجى
- رؤف - إذك معاكى يا مريومة بجولك أيه
- مريم - خير يا خوى
- رؤف - خليههم يجهزولنا الغدا أنى أصلى جوعت أنى و
- نادرة - جوى
- مريم - من عنية يا خوى
- نادرة - وأيـه عرفك أنى جعانة
- رؤف - إحساس
- نادرة - لا صحيح
- رؤف - أولا أنى عارف إنك مش ممكن هتتغدى من
- غيرى ، ثانيا مش هتاكلى فى حطة تانية عمرك
- ثالثا أنى متأكد إن مرت أبوكى عزمت عليكى بالغدا وأكيد
- إنتى ما رضيتيش لجل الوجت مايضيعش ، وترجعى
- بسرعة لجل مانجد لحالنا جبل ما تسافرى
- نادرة - يا نهار أبيض إنت مش ممكن ، أيه الدماغ
- الجبارة دى

- رؤف - أمال إليه علشان تعرفى إنك إخترتى الراجل الصح
- نادرة - ههههه طيب بطل غرور وخلينا فى المهم
- رؤف - إيوة خلينا فى المهم هنتصل ببعض إزاي لما تسافرى
- نادرة - هيكون إزاي أكيد بالموبايلات
- رؤف - إنتى ناسية إنك مأخدش رقم تليفونى وأنى شرحه
- نادرة - اه صحيح طيب هات أسجلك رقمى
- رؤف - خدى يا ستى التليفون أهه
- نادرة - وأدى رقمى وهرن من تليفونك عليه علشان أسجل رقمك عندى
- رؤف - تمام أدى إحنا خلصنا من المهم نيجى بجى للأهم
- نادرة - وأيه هو الأهم؟
- رؤف - اللى كنتى رايحة لمرات أبوكى علشانه ،إحكيلى جابلتك كيف . إوشوفتى أخوكى وألا لا ؟ ويا ترى عرفتى منيها حاجة عن مال عمى حسان والا لا
- نادرة - أقولك يا سيدى اللى حصل بالهمسة ، شوف يا سيدى أول ماخبطت ع الباب
- بس يا سيدى هو ده اللى حصل من طقطق لسلام عليكم
- رؤف - يا سلام معجول ! الست اللى بيجولوا عليها جصايد فى شدتها وجاتمته وإنها بير ملوش جرار، تطلع ست زى باجى الستات كلها إحساس يمكن أرج من ستات كتير لا وفوج إكده عنديها إستعداد تجف جنبك وتساعدك وإرتاحتك بسهولة لدرجة إنها لو حصل لها حاجة

- هتستأمنك على ولدها وماله
- نادرة - هي دى غريبة فعلا
 - رؤف - لا مش غريبة ولا حاجة ، معاكى إنتى بالذات ده شىء عادى تعرفى ليه؟
 - نادرة - ليه يا دماغ
 - رؤف - لا بجد . أصل إنتى يا نادرة من نوع نادر تتحسى زى النسمة العليلة فى ليلة صيف شديدة ريشة بيضا فى سما كلها غيوم
 - نادرة - بس بس بس أيه دا كله أنت كدا هتخلينى اتغر
 - رؤف - لا إصبح إنتى صافية لكل الناس علشان إكدا كل اللى يشوفك يصفالك وصريحة وملكيش فى اللوم ربنا يديمك عليا نعمة
 - نادرة - أنت كمان يا رؤف صريح وواضح وذكى وراجل وفوق كل ده حنين وملكش زى
 - رؤف - يا بوى يا بت عمى أهو إنتى إكدا هتخلينى أنى اللى اتغر مش إنتى
 - نادرة - ربنا يكفيننا شر الغرور يا رؤف ويديم علينا نعمة الصراحة والوضوح ونفضل كدا على طول
- (دخلت جواهر)
- جواهر - الغدا جاهز يا سى رؤف
 - رؤف - فيه حد عياكل إمعانا
 - جواهر - لا الست أم مهران عتستنى الحاج والست مريم عتاخذ الدرس
 - وسى عمر وسى وهبى لسة ماجوش

- نادرة - تمام يعنى مفيش حد هياكل غيرنا
- جواهر - إيوة يا ست نادرة
- نادرة - خلاص ممكن تجييلنا صنية الأكل هنا؟
- جواهر - من عنيا يا ست
- رؤف - تصدجى نفس اللى فكرت فيه
- نادرة - مادام مفيش غيرنا هياكل نبقى ناكل هنا فى الجو الجميل ده وعلى راحتنا
- رؤف - إيوة احلى حاجة إننا نبجي على راحتنا
(بعد الغداء)
- نادرة - هات أنا أشيل الصنية وأوصى على كوبايتين شاي وأجى
- رؤف - على إيه ما تنادمى على جواهر وهى تيجى تشيلها
- نادرة - لا أهو بالمره أغسل إيدى
- رؤف - طيب أجى معاكى
- نادرة - لا خليك هبللك طرف الفوطه إبقى إمسح إيدك فيها
- رؤف - لالالا أنا مواخدش على الدلع ده
- نادرة - طول مانا معاك ماتشيلش هم حاجة أبدا
- رؤف - طب ولما متكونيش معايا أعمل إيه
- نادرة - يتولاك ربنا بقى هههههه عن إنك
- رؤف - من غيرك ...أه لو تعرفى يا نادرة انا بحبك كد إيه كنتى تعرفى أنى مجدرش أعيش من غيرك
- نادرة - هات إيدك يا سيدى حالا الشاي يكون قدامك

حاجة ثانية

- رؤف - لا يا حبيبتي ربنا يخليكى ليا
- نادرة - ويخليك ليا يا رؤف
- رؤف - ها وأم نادر عتبعتك العربية ميتا
- نادرة - فى الفجر
- رؤف - طيب ليه ماتنامى براحتك إوتصحى براحتك
- وتسافرى وخرى شوية
- نادرة - لا أصل بصراحة أمى وحشتنى أوى أوى
- رؤف - خلاص اللى يريحك
- (وعند الفجر استيقظت نادرة وصلت فرضها وأرتدت
ملابسها إستعدادا للسفر
طرقت جواهر الباب)
- جواهر - العربية وصلت يا ست نادرة
- نادرة - طيب خدى يا جواهر الشنطة حطيهها فى العربية ،
- أشوف وشك بخير يا مرات عمى
- أم مهران - مع ألف سلامة يا بتى
- نادرة - هتوحشينى يا مريم
- مريم - وإنتى أكثر والله يا نادرة
- نادرة - أشوفك على خير يا وهبى
- وهبى - فى رعاية الله يا بت عمى
- نادرة - سلام يا عمر
- عمر - مع ألف سلامة يا جمر
- نادرة - الله أmaal فىن رؤف
- أم مهران - فى أوضته متأخذيهاوش يا بتى أصله عيكره

الوداع

- نادرة - طيب أنا هدخل له يا مرات عمى
(رؤف يجلس ويبدو عليه علامات الحزن)
- نادرة - كدا يا رؤف مش هتسلم عليا قبل ما أمشى
(يدارى وجهه)
- رؤف - أنى أسف يا نادرة أصلى معحبش لحظات الوداع
(جلست تحت قدميه)
- نادرة - يعنى أنا اللي بحبها بس لو مكنتش شوفتك وأنا
مسافرة هحس إن حاجة كبيرة أوى نقصانى ، متزعش
يا رؤف أنا يوميا هكلمك فى التليفون وأقولك على يومى
كله من أول ماأصحى لحد ما أنام
(أمسك يدها وقبلها)
- رؤف - أعذرينى يا نادرة إحساس وحش جوى لما
الأجى الأنسانة اللي عحبها ، وفجأة تسيبنى وتبعد
- نادرة - أنا هبعد عنك ، أه لكن صدقنى قلبى وروحي بين
إديك
(أمسك برأسها بين يديه وقبلها من جبينها)
- رؤف - خلى بالك من نفسك يا نادرة
- نادرة - حاضر يا بابا رؤف ،حاجة تانية
- رؤف - لا تسلميلى توصلى بألف سلامة
- نادرة - الله يسلمك يا باشمهندس
- (خرجت نادرة عند السيارة لتجد الكثير من الشنط والهدايا)
- نادرة - أيه دا كله يا عمى
- عصران - ولا حاجة يا بتى ، دى حاجة بسيطة من

- الحاجة أم مهران للست الوالدة
- نادرة - جاهز يا عم عكاشة
 - عكاشة - تحت أمرك إتفضلى يا ست هانم
 - نادرة - أشوف وشك بخير يا عمى
 - عصران - مع ألف سلامة يا نادرة يا بتى
 - (ركبت نادرة السيارة وهى تقوم بالتحية والإشارة من الشباك)
 - نادرة - السلام عليكم
 - عصران - وعليكم السلام إبقى طمئينا لما توصلى يا بتى
 - نادرة - من عنيا يا عمى
 - (وفى الطريق دار حوار بينها وبين عكاشة السواق)
 - نادرة - إتوكل على الله يا عم عكاشة
 - عكاشة - توكلنا على الله
 - نادرة - سبحان الذى سخر لنا هذا وما كنا له مقرنين وإنا الى ربنا لمنقلبون
 - عكاشة - يا سلام يا هانم . سبحان الله . زى المرحوم والدك . كان أول ما يركب العربية يقول دعاء السفر ده بصوح اللى خلف ماماتش
 - نادرة - أنت بتسوق لوالدى من زمان يا عم عكاشة
 - عكاشة - يااااه دا عمر تانى يا ست هانم . أنى والحاج رفاجا من زمان
 - نادرة - على كدا تعرف عنه كل حاجة
 - عكاشة - مكدبش عليكى . مش كل حاجة . الحاج كان سره فى عبه . ومعيحبش حد يعرف عنه حاجة وكان لما

- يروح مشوار إكده والا إكده كان يحذرنى حد يعرف والا
يجطع عيشى فكنت لا أرى لا أسمع لا أتكلم
- نادرة - أفهم من كدا إن والدى كان شديد
 - عكاشة - والدك مكانش فيه أحن منيه ويعيب يساعد
الناس ويوجفهم على رجليهم لكن كانت أكثر حاجة تغيظه
إن اللى يساعده يبجى ناكر لجميله
 - نادرة - نفس الكلام ده سمعته من الحاجة أم نادر . بس
كنت مستغربة إزاي يساعد الناس من غير ما ياخذ عليهم
ورق
 - عكاشة - مين جال إكدهالحاج على كد ما كان يساعد
لكن ماكنش بيعتر فى ماله ده كان مخه يوزن بلد بزيها
وكان يحب ياخذ إحتياطاته فى كل صغيرة وكبيرة
 - نادرة - طيب أنا طالبة منك خدمة يا عم عكاشة
 - عكاشة - أومرى يا ست هانم
 - نادرة - لو طلبت منك تساعدنى إنى أوصل لفلوس أبويا
 - توافق؟
 - عكاشة - أ به إلا أوافق أنا أجدر أساعدك باللى أجدر
عليه ...بس ولا مواخذه كيف يعنى موصلتيش لمال
أبوكى لحد دلوكيت ده بجاله أكثر من سنة متوفى أيه
اللى مسكتك على حجك لحد دلوكيت يا بتى
 - نادرة - نصيبى يا عم عكاشة ...أسمع يا عم عكاشة أنا
هحكيك الموضوع كله بس توعدننى إنك تساعدنى
 - عكاشة - أوعدك يا بت الغالى بكل اللى أجدر عليه
 - نادرة - بقى الحكاية لما والدى

- زينات - ورقة ورقة ياختى أنا فى آيه والا فى آيه إنتى
كمان
- أم سعيد - شوفى يا ختى طول عمرى حويطة يا زينات
وماتسقىش عطشان يا ساتر علىكى
- زينات - بقولك آيه يا أم سعيد أقفلى النور والباب خلينى
أنام لى شوية الا دماغى زنت مش عارفة ليه
- أم سعيد - ماشى يا زينات
(الباب يطرق)
- أم سعيد - مين أنا جاية أهو ، أيوة مين
- أحمد - نادرة موجودة
- أم سعيد - لأ دى مسافرة
- أحمد - طيب الست أم نادرة موجودة
- أم سعيد - أيوة يا فندى نقولها مين؟
- أحمد - قوليلها أحمد ..أحمد بليلة
- أم سعيد - باللبن والا سادة
- أحمد - نعم
- أم سعيد - لا يا بنى متخدش فى بالك عن أذنك هديها
خبر وسع كدا أما أقفل الباب على ما أقول لها حد عارف
يمكن البليلة تبهدل الدنيا قال بليلة
- أم سعيد - أم نادرة
- أم سعيد - واحد أسمه أحمد مهلبية ..قصدى بليلة
عايزك
- زينات - أحمد بليلة خليه يدخل يا أم سعيد
- أم سعيد - إتفضل يا بنى

(دخل مبتسم وسعيد)

- أحمد - ماما زينات إزيك يا أم نادرة وحشتيني
- زينات - وأنت كمان يا حبيبي . أزيك يا حمادة والله وكبرت وشنبك طلع
- أحمد - ههههه أمال هفضل صغير والا أيه
- زينات - هاه أيام بتجرى يابنى بتعدنا وأحنا مبعدهاش
- أحمد - أمال نادرة فين وسايياكى لوحدك
- زينات - نادرة مسافرة الصعيد
- أحمد - الصعيد ليه؟
- زينات - عند أهل أبوها
- (بصت لأم سعيد لقيتها مطرقة ودانها)
- زينات - بتطلع شوية ورق يخصوصا أبوها الله يرحمه
- أحمد - أه وهتيجى أمتى
- زينات - والله يابنى هى قالت يومين وأدينا مستنين
- أحمد - متقلقيش ربنا يجيبها لك بالسلامة
- زينات - الله يسلمك يابنى تشرب أيه بقى؟ قهوة والا شاى والاحاجة ساقعة
- أحمد - متشكر يا ماما مليش نفس أشرب حاجة
- أحمد - لا ميصحش يا أحمد دا أنت بقالك زمن مدخلتش بيتنا
- أحمد - هو المطبخ بعيد عليا ما أنا لو عايز أشرب حاجة هقوم أجيبها بنفسى
- زينات - طبعا يا حبيبي دا بيتك
- أحمد - م الحق خدتينى فى دوكة أتفضلى يا ماما

- زينات - وتاعب نفسك ليه يا حبيبى
- أحمد - لا تعب ولا حاجة متقوليش كدا يا ماما
- مايلزمكيش حاجة بما إن نادرة مسافرة
- زينات - ربنا يخليك يا أبنى عندى كل حاجة فى البيت
- أحمد - يعنى مش لازمك حاجة كدا والاكدا أطلبى من
- جنيه لجنيه وربع
- زينات - ههههه يوه جتك أيه يا بليلة لسة دمك خفيف
- زى مانت متغيرتش
- أحمد - هههه طيب أستاذن أنا
- زينات - ما أنت قاعد شوية
- أحمد - معلى أصلى ورايا مصلحة كدا هخلصها وأروح
- لأنى ورايا مذاكرة كتير
- زينات - ربنا يوفقك يا حبيبى وينجح مقصودك
- أحمد - طيب سلام
- زينات - مع السلامة يا بنى
- أم سعيد - مع السلامة يا بليلة المرة اللى جاية هجهلك
- كيلو لبن
- أم سعيد - أيه الواد العسل ده يا زينات
- زينات - دا كان زميل نادرة فى المدرسة من الابتدائى
- لحد الثانوى دا بسم الله ما شاء الله عقبال ماتشوفى ولاد
- إبنك فى كلية الهندسة
- (وهى عينها من العلبة اللى جاييها)
- أم سعيد - يا ماشاء الله لا ماهو باين عليه الهندسة
- جاييلك زيارة آخر هندسة . تحبى أفتحها لك والا أعينها

- لحد ما ندورة تيجى
- زينات - على أيه إفتحها يا أم سعيد لتكون حاجة تخسر خسارة
 - (أم سعيد خطفت العلبة
 - أم سعيد - عندك حق والله يا زينات - جاتون يا حلاوة دانا بقالى كتير مشوفتوش ذوق أوى الباشمهندس بليلة دا
 - زينات - طيب هاتيك طبق و إتفضلى دوقيه يا حبيبتي بالهنا والشفا
 - أم سعيد - جبت طبقين ليا وليكى
 - زينات - لا أنا مش هقدر أنتى عارفة لسة واخدة الدوا دلوقتى إتفضلى إنتى بألف هنا
 - أم سعيد - الله أنا كدا إحترت أخذ أنهى شكل يا زينات ياختى
 - زينات - ههههه أى حاجة أنتى هتعملى زى العيال والا أيه يا أم سعيد
 - أم سعيد - أصل أنا عاجبنى اللى بالشيكولاتة
 - زينات - خلاص خديها
 - أم سعيد - وبرضوا عاجبنى اللى بالكريمة
 - زينات - خلاص خديها
 - أقولك يا أم سعيد خدى الأثنين
 - أم سعيد - الأثنين لالا لا ميصحش يا أم نادرة
 - زينات - يا ستى هاتى الطبقين والدسته دى ورينى كدا
 - أم سعيد - خدى ياختى

- زينات - أنا هاخذ ليا أنا ونادرة كل واحد حتتين وإنتى
خدى بقية العلبة ليكى إنتى وأبنك ومرات أبنك بالهنا
والشفا
- أم سعيد - أيه لالا لالا يا زينات كذا كتير
- زينات - لا كتير ولا حاجة كفاية ربطتك معايا هنا
وسيباهم خدى نزيلهم وتعالى تانى بس لو سمحتى
تغطى ع الطبقين فى المطبخ بس بحاجة عالية علشان
حتت الجاتوه متجرحش
- أم سعيد - من عنية يا أم الكرم والذوق أنا هدخلهم
المطبخ وأعطيك عليهم وأسيبك ترتاحى شوية وأبقى
أطلع لك
- زينات - تسلميلى يا حبيبتي
(فى السيارة)
- نادرة - هى دى كل الحكاية بكل صغيرة وكبيرة مخبيتش
عنك حرف يا عم عكاشة وطالبة مشورتك وأنا مؤمنة أن
ما خاب من إستشار وخصوصا أنك كاتم أسرار والدى
وهتفيدنى بحكمتك
- عكاشة - وأنا إن شاء الله معاكى يا بنتى لأخر نفس
- نادرة - متشكرة لك جدا يا عم عكاشة
- عكاشة - ماتشكرنيش يا بنتى . إنتى زى بنتى
- نادرة - ودا العشم برضوا يا عمى عكاشة
- عكاشة - شوفى يا بنتى من ناحية إن أبوكى عنده فلوس
فهو عنده وعنده كتير كمان وعلشان كذا حاططهم فى
أكثر من برك

- نادرة - وأنت تعرف البنوك اللى كان شايل فيها فلوسه
- عكاشة - أيوة يا بنتى ممكن أوريهاك وأنتى تسألنى وتشوفى أيه الأوراق اللازمة علشان تقدرى تاخدى من مالك اللى هو ورتك من أبوكى بما إنك بنته الوحيدة
- نادرة - عندك حق يا عم عكاشة ...ملينى بقى أسامى البنوك وعناوينهم
- نادرة - أيه دا كله دا أنت بقيت مملينى يجى أربع بنوك
- عكاشة - فعلا هما أربع بنوك ووقت ما تحبى تروحهم . أنا تحت أمرك و فى خدمتك بأمر من الست أم نادر ...أه على فكرة ده رقم تليفونها طلبت منى أديهولك لجل ما تطمنيتها عليكى وكمان بعثت معايا تلاجة من بتاعة الرحلات دى ومجطعالك خروف بالهنا والشفاء وعتجولك ده غداكى اللى مرضيتيش تاكليها عنديها
- وعتجولك لو عوزتى منيها حاجة إتصلى ومتتردديش
- نادرة - ياااه اد أيه أنا حبيت الست دى
- عكاشة - الست أم نادر حنينة جوى وبميت راجل تربية يد الحاج حسان
- نادرة - ههههه يظهر إن السبب فى قوة حريمه هو فعلا الحاج حسان
- (ومر الوقت سريعا)
- نادرة - الحمد لله وصلنا يا عم عكاشة
- عكاشة - حمدلله ع السلامة يا ست هانم
- نادرة - الله يسلمك يا عم عكاشة
- عكاشة - إطلعى إنتى يا بتى وأنا عحولك الحاجة

- نادرة - بس دا تعب عليك إدينى حاجة أشيلها وأنا طالعة
- عكاشة - طيب خدى الشنطة دى خفيفة عليكى لا
مواخذة يا بتى
- نادرة - ياه دى فيها حاجات سخنة
- وظلعت نادرة ودخلت - يا أم نادرة يا زيزى زينات يا
قمر
- زينات - دا صوت نادرة .. نادرة أنا فى الأوضة تعالى يا
حبيبتي تعالى
- نادرة - ماما وحشتيني أوى أوى يا ست الكل
- زينات - وإننى كمان تعالى فى حضن أمك يا حبيبتي
تعالى وحشتيني أوى يا نادرة البيت وحش من غيرك زى
ما يكون غايبة بقالك سنتين مش يومين
- نادرة - ههههه ربنا ميحرمناش من بعض أبدا يا ست
الكل
- عكاشة - ياهل الله ياللى هنا
- نادرة - يا خبر دا أنا نسيت أدخل يا عم عكاشة أتفضل
- عكاشة - أحط الحاجة دى فين
- نادرة - حطها هنا فى المطبخ تسلم أيدك يا عم عكاشة
أتفضل أستريح
- عكاشة - لا يا بتى لسة فيه التلاجة عجيبها وبعدين
نجد
- زينات - مش ده عكاشة سواق أبوكى
- نادرة - أنتى تعرفيه
- زينات - شفته بيوصل أبوكى لما يكون جاى م الصعيد

- نادرة - عندكوا غدا
- زينات - اه فيه محشى ونص فرخة فى المطبخ
- نادرة - طيب كويس ولو أغدى بيه عمى عكاشة . والا أقولك إستنى أما أفتح الشنطة السخنة دى أشوف فيها
- أيه بسم الله ما شاء الله ايه دا كله أكل مطبوخ برام بامية
- بالحم الضانى وصنية حمام بالفريك ودر بط ورز
- بالخلطة يا سلام على كرمك يا مرات عمى
- زينات - أيه يا بنتى دا كله هما هياكلوا الجيش البريطانى
- والا أيه . عموما هما الصعايدة كدا كلهم كرم
- ومايفتهومش واجب . مش هتقوليلى عملتى أيه هناك؟
- نادرة - هقولك كل حاجة بس لما نبقى لوحدين لأن أكيد
- أم سعيد هتطلع تتطقس عملت أيه وروحت ليه وجبت أيه
- زينات - أه طب يا بنتى حطى الزيارة دى فى أوضتك
- وأقفلى عليها مش ناقصين أر
- نادرة - حاضر يا أمى
- عكاشى - ها أدخل التلاجة دى كمان فىن يا بتى
- نادرة - هاتها فى الأوضة دى يا عم عكاشة
- عكاشة - يلزم خدمة تانية يا ست نادرة
- زينات - رايح فىن يا حاج عكاشة متسيبهبوش يا نادرة
- لازم تتغدى وتشرّب حاجة
- عكاشة - الست زينات كيفك يا ست أم نادرة عاملة إيه
- زينات - هعمل أيه إتكسحت بدرى يا عكاشة زى مانت
- شايف
- عكاشة - لا شدى حيلك أمال دا أنتى لسة صغيرة ع

التكثيف دى

- زينات - إتفضل أقعد يا عكاشة
- عكاشة - لا معلىش أنا عروح أبيت فى شجتى وإذا عوزتوا أيتها حاجة دى نمرتى يا ست البنات أهى أطلبينى وأنى فى دجاج أكون حداكى
- نادرة - أنت لك شقة هنا يا عم عكاشة
- عكاشة - إيوة مطرح وصالة بعديكوا بشارعين كنت واخدها علشان أبجى جريب من المرحوم لما يطلبينى فى أيتها وجت
- نادرة - برضوا مش هسيبك تمشى غير لما نتغدى سوا دا الحاجة أم مهران باعته معايا أكل كتير مستوى لازم ناكل سوا
- يا اما هتاخذ أكلك معاك
- عكاشة - لا وعلى إيه أكل معاكوا وأمرى لله (وهم يأكلون دخلت أم سعيد تشمشم)
- أم سعيد - الله الله الله أنا شمة ريحة حلوة أكيد ندورة جت أيوة هى أنا مناخيرى قصدى إحساسى ميخيبش أبدا . يوه إنتى معاكى ضيوف
- نادرة - إتفضلنى يا خالتى أم سعيد بسم الله معانا
- أم سعيد - لالا لالا أنا شبعانة لسة واكله جاتون دلوقتى
- نادرة - ههههه وجالك منين الجاتوه يا أم سعيد
- أم سعيد - من الباشمهندس بليلة
- نادرة - مين بليلة
- زينات - تقصد أحمد بليلة

- نادرة - هو جه
- زينات - أه من شوية صغيرة
- نادرة - ابن الأيه
- زينات - دا واد طيب وابن حلال فضل يقولى لوعايزة حاجة قوليلى
- أم سعيد - الشهادة لله بليلة إنما أيه زى العسل يا ندورة .
- أقوم أعملكم شأى
- نادرة - لا أنا خلصت أكل وهقوم أعمله بنفسى متتعبيش نفسك
- أم سعيد - تعبك راحة يا حبيبتي مش تعرفيني يا ندورة
- نادرة - أه دا عمى عكاشة
- أم سعيد - السواق
- نادرة - أيوة إنتى تعرفيه
- أم سعيد - أيوة دا كان تملى يوصل الحاج حسان بعربيته .
- إزيك يا عم عكاشة
- عكاشة - الحمد لله
- نادرة - إتفضل أغسل إيدك يا عم عكاشة
- (بعد قليل)
- نادرة - إتفضل الشأى يا عم عكاشة
- عكاشة - متشكر يا بتى
- أم سعيد - آمال أيه اللى لم الشامى ع المغربى عترتى
- فى الحاج فين ياندورة
- نادرة - فى الصعيد وأنا عند عمى
- أم سعيد - أااه قولتيلى عمك. مهو باين ع الأكل أهو

- صعیدی ع الآخر
- عكاشة - طب أستاذجز أنى وزى ما أتفجنا يا بتى
 - نادرة - ماشى يا عم عكاشة روح أنت إستريح لحسن تلاقىك هلكان م التعب المشوار فعلا طويل
 - عكاشة - وأنتى كمان لازم ترتاحى وراكى معركة كبيرة يا بتى
 - نادرة - مع السلامة يا عم عكاشة
 - (ذهبت نادرة الى المطبخ وأخذت تنادى لأم سعيد
 - أم سعيد - خير يا ندورة
 - نادرة - خدى يا خالتى بما إنك مأكلتيش معانا خدى الأكل ده كليه مع ولاد إبنك وهو ساخن
 - أم سعيد - وليه التعب ده ملوش لزوم والله يا ندورة
 - نادرة - أصله كتير والله يا أم سعيد ومش عايزة مقاوحة . أنا تعبانة وعايزة أنام
 - أم سعيد - طب يا حبيبتى أنا هنزل وأنتى أدخلى إرتاحى . بقولك آيه يا ندورة حطيطى حتة بط
 - نادرة - أيوة حطيتك من كل الأكل اللى شوفتیه واللى مشوفتيهوش
 - أم سعيد - تعيشى يا ندورة طول عمرك كريمة وحنينه عن إذنك
 - (أغلقت الباب و دخلت لوالدتها)
 - زينات - ها مشيت أم سعيد
 - نادرة - أيوة إديتها شوية من الأكل ونزلتها وقولتها إنى هنام علشان تعبانة

- زينات - أحسن خير ما عملتى يا بنتى إحكلى بقى
عملتى أیه من أول ما وصلتى الصعيد لحد ما قعدتى جنبى
- نادرة - إسمعى يا ستى
بس هو ده كل اللى حصل
- زينات - أیه اللى أنا بسمعه ده دا زى ما يكون بحلم بقى
الحاج غنى كدا وإتجوزنى بأمر من مراته
- وإبنه معوق لا حول ولا قوة الا بالله سبحانك يا رب .
بصى أنا معنتش هزعل ولا أفكر فى حاجة واللى فات
مات
- أهم حاجة يا بنتى اللى جاى
- نادرة - يعنى مش زعلانة صحيح يا أمى
- زينات - والزعل هيفيد بأیه يا بنتى المهم مستقبلك
وفلوسك وأعملى حسابك أبوكى عمره ما يفوت أى حاجة
ولو صغيرة من غير ما يكون وأخذ احتياطه بورق يحفظ
حقه ربنا يسامحك يا حاج حسان ع الدوخة اللى
هتدوخها لبنتك دى
- وهتعلمى أیه يا نادرة
- نادرة - هروح للمعلم أنور وأشوف مايتيه أیه . هقوم
أنام شوية وبعدين هروح له
- (دخلت نادرة حجرتها وتذكرت انها لم تكلم زوجة والدها
تطمئننها على الوصول فطلبتها
- نادرة - ألو أيوة يا أم نادر...أه وصلنا يجى من ساعة
لحقت أوحشك هههههه . وأنتى كمان والله وأزى نادر
...يا حبيبى طمنيه وقوليله إنى هجيله قريب

- ربنا يخليكى يا أم نادر بس أنتى تعبتى نفسك وبعثالى خروف بحاله أه مانا شفته متكيس وشيلته فى التلاجة كتر خيرك يا حبيبتي ربنا ميحرمنيش منك
- نويت أريح شوية وأقوم أروح له
- تفتكرى كدا ..أيوة عندك حق أدخل له مفاجأة وأطلب حقى من غير تمهيد ...نصيحتك وصلت وهعمل بيها يا أم نادر ... لا عايزة سلامتك

(بعد ما قفلت رؤف رن)

- نادرة - أيوة يا رؤف أزيك...وأنت كمان وحشتنى أوى ...أه وصلت من حوالى ساعة..معلش أصلى إنشغلت فى ماما والغدا ...بس فعلا كنت ناوية أكلمك لقيتك بترن ...فعلا من القلب للقلب رسول ..أه يا حبيبى
- قررت أنام لأنى تعبانة جدا...ماشى يا رؤف ..وأنت كمان..سلام بقى وأنا كمان إرتحت ههههه سلام
- (وعندما قامت نادرة من نومها ارتدت ملابسها وقررت الذهاب للحاج أنور)

- زينات - ها نويتى يا بنتى
- نادرة - أيوة إدعيلى يا أمى
- زينات - ربنا معاكى يا بنتى
- نادرة - أنا هتصل بعمى عكاشة يخذنى من على أول الشارع علشان أم سعيد متشفنيش وتقعد تستفسر
- زينات - اللى تشوفيه يا بنتى
- وعندما وصلت نادرة لمنزل أنور الصاحى
- نزلت من السيارة ودقت الجرس

- نادرة - سلامو عليكم
- الخادمة - عليكم السلام
- نادرة - الحاج أنور موجود؟
- الخادمة - أيوة نقوله مين
- نادرة - نادرة .. نادرة الراضى
- الخادمة - طيب إتفضلى يا هانم على ما أديله خبر
- أنور - مين نادرة الراضى هنا فى بيتى يا ألف أهلا وسهلا إتفضلى يا ست الكل
- نادرة - ممكن نتكلم لوحدنا يا معلم
- أنور - خير فيه حاجة؟
- نادرة - أتكلم هنا والا نقعد لوحدنا أحسن
- أنور - ها لا لا لا إتفضلى جوة زى ما أنتى عايزة
- دخل حجرة المكتب وأغلق الباب
- أنور - خير يا ست البنات فيه أيه
- نادرة - فيه إنى عايزة حقى يا معلم
- إتبرجل
- أنور - حق ححقق أيه
- نادرة - حقى فى صفقة البقر الفريزيان يا معلم واللى المعلم حسان وصاك لما تسوقها تدينا فلوسنا ونص المكسب اللى بقاله أكثر من سنة فى عبك وأنا مستتية
- لحد ما أتأكد أنك سوقتها لكن كدا كتير أوى يا معلم
- أنور - أه يعنى المعلم حسان كان قايلكم على كل حاجة
- طيب حيث كدا إنتى معاكى الوصل
- نادرة - وصل أيه؟

- أنور - الوصل اللي أخده عليا بالمبلغ . آمال إنتى جاية بناء على أيه
- نادرة - أاااه أه الوصل موجود يا معلم بس مش معايا دلوقتى
- أنور - طيب لما تجيبيلى الوصل يا حلوة أبقي أديكى حقك
- نادرة - بسيطة كلها كام يوم وأجيبلك الوصل لأن الوصل والدى عاينه فى الصعيد
- أنور - صعيد طيب وقت ماتجيبيلى الوصل تاخدى فلوسك
- نادرة - وهو كذلك يا معلم أستأذن أنا
- أنور - ليه ما لسة بدرى دا أنتى حتى مشربتيش حاجة
- نادرة - المرة الجاية بأذن الله
- أنور - مع ألف سلامة
- (فايز فى الصلاة)
- فايز - أيه ده أيه اللي جاب البت دى هنا يابا؟
- بتلفى بديك تانى ده بعينك أنا خلاص مغنتيش تلزمينى أنا لقيت عصفور تانى
- نادرة - بيقول أيه دا ..أنت بتقول أيه يا أخ أنت
- أنور - أخرس يا زفت الطين ...لا مواخذه يا نادرة يا بنتى . سيبك منه دا متخلف
- نادرة - سلاموا عليكم
- أنور - وعليكم السلام نورتى يا بنت الغالى
- نادرة - متشكرة يا معلم
- أنور - مع ألف سلامة

- نادرة - الله يسلمك
- وركبت نادرة السيارة
- أنور - عكاشة أزيك يا عكاشة
- عكاشة - الله يسلمك يا أبو فايز
- أنور - عاش من شافك
- عكاشة - عشت يا معلم
- أنور - أبقي خيلنا نشوفك
- عكاشة - إن شاء الله يا معلم
- أنور - بالسلامة .. طريق السلامة
- عكاشة - ها أيه الأخبار
- نادرة - عال الأخبار عال العال
- لحظة واحدة يا عم عكاشة
- (رنت على مرات ابوها

- نادرة - أيوة يا أم نادر .. الله يسلمك .. أنا بخير الحمد لله ..
 ..أه ما أنا بكلمك علشان كدا .. لسة خارجة من عنده
 دلوقتي ... دخلتلوا في وشه على طول زى مقولتيلي
 مدتلوش فرصة يفكر أو ينكر بس طلب منى الوصل اللي
 بابا أخده عليه وأنا معنديش أى أوراق . بس مرضيتش
 أقوله علشان مديش له فرصة يفكر ينهني فقتلوا إن
 الوصل فى الصعيد كام يوم على مبعث أجيبه أعمل أيه
 على ما أدور هههه تعليمك يا معلمة ماشى لو جد جديد
 هقولك مع السلامة

- عكاشة - الحمد لله يا بنتى اللي جر
- نادرة - مهو لولا أخذته على مشمه يمكن كان أنكر

- عكاشة - عليكي نور مش جولتك اللي خلف ماماتش
- نادرة - المهم الوصل بابا شاله فين
- عكاشة - على كل حال الحاج طول عمره سر نفسه
- ربنا يعترك فيه يا بتى
- نادرة - يا رب يا عم عكاشة بقولك أيه نزلنى على أول الشارع مش عايزة حد يسألنى عربية مين ورايحة فين وجاية منين وأنت عارف المناطق الشعبية وعيوبها
- عكاشة - والله يا ريت يا بتى تشوفيلك سكن فى حته راجية أحسن من هنا
- نادرة - ناوية إن شاء الله يا عم عكاشة بس لما أخلص من اللى أنا فيه . بس هنا شكرا سلاموا عليكم
- عكاشة - وعليكم السلام
- وصلت نادرة الشقة ودخلت وبحلقت
- نادرة - مش معقول
- نادرة - سلامو عليكم متجمعين عند النبى
- الجميع - عليه الصلاة والسلام
- مختار - أيه رأيك فى المفاجأة دى
- نادرة - فعلا مفاجئة يا مختار ومش أى مفاجأة . أنا مش مصدقة نفسى ولاد عمى متجمعين عندنا يا مرحبا يا مرحبا
- رحمة - فاكرانى يا نادرة
- نادرة - أه طبعا يا رحمة وأنت أنس وأنت راضى ولاد عمى إبراهيم
- رحمة - والله كويس أنك فكرانا

- أنس - دانتي ذاكرتك قوية أوى يا نادرة
- باسم - أيه يا بنتي الجمال ده كله إنتي إتغيرتي أوى
- نادرة - ويا ترى إتغيرت للأحلى بقى يا باسم والا
- باسم - والا والا أيه يا بنتي دانتي تقولى للقمر قوم وأنا أقعد مطرحك
- نادرة - ههههه مش أوى كدا يا باسم
- مختار - وبعدين معاك يا باسم متلم نفسك يا أخى أحسن نادرة تتضايق
- باسم - تتضايق من أيه فيه حد يتضايق من المدح
- نادرة - لا إمدح براحتك يا ابن عمى ولا يهمك
- رحمة - وبعدين أنا شايقة إنه مبيقولش حاجة غلط بنت عمى زى القمر
- نادرة - ربنا يخليكى يا رحمة
- زينات - منوريين يا ولاد
- الجميع - دا نورك يا مرات عمى
- مختار - الحقيقة أنا جاى أكرر العرض اللي قلتهولكم قبل كدا..يا ترى فكرتى يا نادرة
- نادرة - فكرت يا مختار وما زلت عند رأيى
- راضى - كلنا موافقين وهنتلم فى البرج سوى
- مختار - وبعدين إنتي مش موافقة ليه يا نادرة هاتيلى سبب مقتع
- أنس - نفسنا نتجمع سوا يا بنت عمى ع الأقل نشوف بعض ونظمن على بعض
- رحمة - أه والله يا نادرة وافقى علشان نبقى قريبين أنا

- وانتى لبعض أنتى عارفة مفيش بنات غيرى أنا وانتى
- باسم - سيبوها تفكر كمان يومين وبعدين ناخذ الرد الأخير وأنا أتمنى إنك تكونى معانا يا نونا
 - مختار - ها أيه رأيك فى الكلام دا أسيبك يومين تفكرى؟
 - نادرة - أنا مش عايزة نكون حمل عليك يا مختار
 - مختار - حمل أيه مانا قولتلك أنى هبقى سعيد لما أنفذ وصية المرحوم والدى
 - وبعدين يا ستى أحنا كل عيلة هتبقى فى شقة خاصة بيها وأهو نبقى عزوة مين عارف يمكن نقرب أكثر من بعضينا
 - نادرة - خلاص سيبونى يومين وارد عليكم
 - مختار - خلاص نجيلك كمان يومين . يالا بينا يا شباب بعد أذنك يا نادرة أصلنا بنفرش شقتنا وشقة ولاد عمى إبراهيم وعقبال مانفرش شقتكم
 - نادرة - أستنوا يا ولاد أنتوا مشربتوش حاجة
 - زينات - يا خبر الكلام خدنا ونسيت أقدم لكم حاجة
 - مختار - هو أحنا غرب يا مرات عمى
 - زينات - وهيجلنا أيه م الغرب يا مختار يا أبنى
 - رحمة - نشوف وشك على خير يا نونا
 - أنس - سلام يا بنت عمى
 - راضى - فكرى كويس يا نادرة نفسنا نبقى كلنا مع بعض فى الاتحاد قوة برضوا يا بنت عمى
 - باسم - طول ما أحنا مع بعض مش ممكن حد يكسرنا
 - مختار - فكرى وهما يومين وهرجعك تانى أعقلها

- كويس يا نادرة ومين عالم يمكن يكون ليكى شقتين فى
البرج سلام
(خرج الجميع بعد السلام على نادرة وقبل غلق الباب دخلت
أم سعيد
- أم سعيد - أيه دا كله الهكسوس نازلين ههههه ربنا يزيد
ويبارك
 - مين دول يا نادرة اللى أنا معرفش فيهم غير الأستاذ
الذوق أبو أربع علب..يا ترى جايب كام علبة المرة دى؟
 - نادرة - ولا علبة يا خالتي
 - زينات - جرى أيه يا أم سعيد هو لازم كل ما يجى يشيل
والا أيه
 - أم سعيد - هههههه يوه مقصدش . أنا بسأل بس ..أمال
إنتي كنتي فين يا نادرة من شوية شيفاكى وإنتي نازلة
 - نادرة - ها لا أبدا كنت بشوف هعرف أجيب قفصين
طماطم م الوكالة بس معجبتنيش أصلى كنت عايزة أنزل
السوق بكرة إنما يظهر مفيش نصيب
 - أم سعيد - ياختى ريحيلك يومين فى البيت
 - نادرة - وناكل منين يا خالتي
 - أم سعيد - ياختى دا أنتوا عندكم أكل يكفيكم أسبوع
 - زينات -هى العيشة أكل وشرب يا أم سعيد مش فيه دوا
ليا ودكاترة وإيجار ومية ونور وأنبوبة يا ريت الهم أكل
وشرب بس
 - أم سعيد - والله عندك حق يا زينات يا أختى طب خلاص
يمكن تتعدل بكرة

- نادرة - يارب يا خالتي ربنا يعدلها
- (رن جرس التليفون نادرة دخلت لحجرتها
- نادرة - ألو رؤف أزيك ...أنا تمام الحمدلله. وأنت عامل
- أيه ..وأنا كمان حياتي باردة من غيرك .. وأنا كمان
- محتاجك زى ماتت محتاجلى وأكثر ..أبدا أصلى روح
- للصاحي أسمع اللي حصل
- أم سعيد - هي يا ختي ندورة إتلهفت ع التليفون كدا ليه
- هو مين اللي بيكلمها
- زينات - مش عارفة
- أم سعيد - كدا طيب أما أروح أعرف . قصدى أشرب
- وأجى
- زينات - المية أهى يا أم سعيد خليكى قاعدة مستريحة
- أم سعيد - كدا طب يا حبيبتي أشرب نهار فرح حبيبك يا
- رب
- زينات - عشتى يا أختى
- أم سعيد - ها والجمع الغفير اللي كان عندكم ده سببه أيه
- (نادرة تكمل حديثها فى الهاتف)
- نادرة - بس يا سيدى هو ده كل اللي حصل أيه رأيك
- أه مانا شكرتها ع أفكارها واعية موت مش بقولك ست
- رغم بساطتها إنما ذكية وشورتها مهمة فى المشاكل
- المصيرية...لا متخفش عليا
- ولاد عمك أبراهيم ..وعمك محمود أه ...مين؟ أه كلهم
- راضى ورحمة وأنس وباسم ومختار...أه يومين بس
- رأيك أيه أوافق... يا سلام ع العموم أنا طول عمرى

- لوحدى مش محتاجة حراسة من حد
- خايف من أيه؟ ...مختار لامتخافش ...إحنا هنغير والا أيه
 - بقولك أيه مفيناش من غيرة...أيه اللي خلاك تحس بكدا؟ ...رؤف أنا عمرى ماحد يملى عيني وقلبي غيرك أنت أنت وبس ..أطمئن يا حبيبي
 - مانا لسة راجعة من عندكوا ...طب قول أسبوعين
 - إن كان عليا عايزة أفضل جنبك العمر كله
 - أيه نيحي حداكواهههههه والله فكرة وبعدين إن عاجلا أو أجلا هنيجي حداكم على طول ...ههههههه كفاية بقى أحسن عندنا جارة حشرية قاعدة مع أم نادرة زمانها هتموت وتعرف مين اللي بيكلمنى ...أيه يا خبر أقولها حبيبي دى كانت تنشرها فى الجرايد المسائية علشان الصباحية بعيد أوى ..ههه كفاية رعى بقى أنت مزهقتش ...ولا أنا عمرى أزهدق منك أبدا. لاإله إلا الله. سلام
 - (خرجت نادرة من حجرتها)
 - نادرة - ها تشربوا شاي؟
 - أم سعيد - يا ريت يا ندورة
 - نادرة - حالا يا خالتي
 - أم سعيد - آمال مين اللي كان بيكلمك يا ندورة؟
 - نادرة - ها لا أبدا دى دى أم نعيم كانت عايزانى أعدى عليها بكرة
 - أم سعيد - خير فيه عريس تانى والا أيه
 - نادرة - يظهر كدا
 - أم سعيد - ربنا يوعذك باللى يستهلك يا حبيبتي

- نادرة - اللهم امين يا خالتي هروح أعملك الشاى
- أم سعيد - طيبة نادرة ربنا يرزقها بابن الحلال اللي يستاهلها
- زينات - يسمع من بقك ربنا يا أم سعيد يا أختي
- نادرة - الشاى يا حبايبي
- أم سعيد - نشرب شربات فرحك . أحلى كوباية شاى بشربها من إيدك يا ندورة
- أم سعيد - مش عايزة تقوليلي التليفون اللي جالك وخالكي تجرى ع الأوضة تتكلمى فى الخفاء ده من مين
- نادرة - خفاء ولا خفاء ولا حاجة دا .. دا
- زينات - دا عمها يا حبيبتي كان قايل لها أنه هيكلمها يظمن عليها كل يوم
- أم سعيد - عمها والا أبن عمها
- نادرة - ابن عمى ... ابن عمى مين؟ ... أيه يا ماما
- (زينات تشاور لنادرة بأنها لم تقول شئ لأم سعيد)
- نادرة - تقصدى ابن عمى مين يا خالتي
- أم سعيد - هو فيه غيره مختار بصراحة يا ندورة واد زى العسل يقول للبدر قوم وأنا أقعد مكانك
- نادرة - يا خالتي ميت مرة أقولك إن مختار ده زى أخويا
- أم سعيد - أخوكى دا أيه يا خاوية . يابت متسيبهوش يفوت من تحت إيدك إسأليني أنا هتندمى ... طب دانا كنت فى شبابى قمر. وأبن عمى كان محامى وطلبني مرضيتش وأتبعدت عليه. قلت دا محامى على ماتفرج

ولما إتقدملى عمك وائل عجبني كان ممرض وكان يجي
عندنا ويدي أبويا الحقن بتاعته ولما شافني مات عليا .
وافقت عليه وسبت ابن عمي اللي صبح عقبال أمالك
أكبر محامي مرتشي في المنطقة وبيلعب بالفلوس لعب
وأديني خدت عمك وائل الممرض لما مبقاش بيمرض حد
غيرنا أحنا بس . وحتى لو ربنا كرمه وحد طلب منه
يديله حقنة والا حاجة يديهاله غلط من كام يوم عمك
أبوادور طلب منه يديله حقنة في العضل معادها الساعة
2 بالليل طلع وهو متلوه في النوم وبدل مايدهاله في
العضل أدهاله في قفاه وكانت ليلته سودا ما يعلم بيها الا
ربنا

- إسمعي نصيحتي قرد يسليني ولا غزال يبكيني يا ندورة
- أديني سبت حامد وأخذت وائل وأدى حالي الواد الحيلة
جوزته في الشقة معايا من قلة الفلوس
- نادرة - ياااه يا خالتي أم سعيد أنتي مبتتعيش من الكلام
في الموضوع ده أقولك . هريحك هفكر خلاص بقولكم أيه
أنا تعبانة وعاييزة أدخل أريح جسمي
- زينات - وأنا كمان يا نادرة هنام شوية يا بنتي أحسن
دماغى عمالة تزن
- أم سعيد - إهيه إنتوا أيه اللي جرالكم مبتشبعوش . نوم
أنا هاخذ الشاي وأنزل جتكوا الهم عيلة هتعفن من كتر
النوم يا ساتر روحوا ناموا. إن شالله تروحوا في غيبوبة
- إقفلى الباب ورايا يا تايهة يا بنتي
- نادرة - تايهة؟

- أم سعيد - أيوة إنتى كان أصولهم سموكى تايهة من كتر ما بتنامى عن أذنكم
- (أغلقت نادرة الباب ودخلت لوالدتها وهى تضحك)
- نادرة - ههههه خالتى أم سعيد دى مش ممكن رغم طولة لسانها بس دمها زى العسل وأنا بحبها
- زينات - ههههه يا حبيبتى ربنا يفرح قلبك
- تعالى تعالى جنبى وقوللى عملتى أيه عند أنور الصاحى
- نادرة - هقولك بس قوللى إنتى الأول أنتى جيبتى سيرة رؤف لأم سعيد
- زينات - أنا... أنتى أتجننتى أنتى عارفة أنى بصون سرى ولسانى منها إذا كنت مافتحتش الموضوع معاكى هقوله لأم سعيد الرطاطة إنما قوللى اللى كنتى بتكلميه دا مش رؤف برضوا؟
- نادرة - هو يا ماما كان بيظمن عليا وبيشوف أنا عملت أيه مع أنور الصاحى
- زينات - بيشوف هيبويه . ربنا ينورها له يا بنتى
- نادرة - ماما أرجوكى بلاش التلميحات دى علشان بتزعلى قولتلك قبل كدا رؤف ده هو الإنسان اللى حبيته وقلبى أختاره
- زينات - مقصدش يا بنتى بس صعبان عليه يكون بيتقدملك
- شباب كامل وزى الورد..و..
- نادرة - ماما أرجوكى متكلميش أنا بحب رؤف وأنا اللى أخترتة وأنتى بكرة لما تشوفيه وتقعدى معاه هتعرفى إنه

- أحسن من ناس كثير مفتحين والا أنتى مش واثقة فى
أختيار بنتك
- زينات - لا يا حبيبتي واثقة فى إختيارك وبدعيلك من كل
قلبي ربنا يسعدك يا بنتى ويفرح قلبك
- قوليلي بقى عملتى ايه مع الصاحى احكيلى؟
- نادرة - أقولك
- بس يا ستى المهم إن أنور أعترف أن ليا فلوس عنده
- زينات - طيب وهتجيبى الوصل منين دلوقتى؟
- نادرة - مش عارفة يا أمى . مفيش غير إنى أخذ شهادة
وفاة أبويا وألف ع البنوك جايز الاقيه شایل أوراقه فى
خزنة فى بنك أما أقوم أتصل بعمى عكاشة يجهز نفسه
للمشوار ده وربنا يسهل
- (تنظر أم نادرة لصورة حسان المعلقة على الحائط)
- زينات - يا ترى يا حسان شایل أوراقك فين وأيه اللى
خلاك تعمل فينا كدا
- نادرة - ممنوش فايده يا أمى أنا هقوم أجهز الأوراق
اللازمة وأحضر لبسى وأنام علشان بكرة ورايا يوم
طويل دعواتك يا أمى
- زينات - ربنا يعينك يا حبيبتي وينولك اللى فى بالك
- نادرة - تصبى على خير
- زينات - وأنتى من أهل الخير
- (فى الصباح قامت نادرة بأرتداء ملابسها ثم تحدثت فى
الهاتف)
- نادرة - ألو صباح النور يا عم عكاشةحالا هتلاقينى

- قدامك مع السلامة أنا نازلة يا ماما أحسن عمى عكاشة
مستنى
- زينات - مع السلامة يا بنتى... ربنا يجعلك فى كل خطوة
سلامة
 - نادرة - سلامو عليكم يا عم عكاشة
 - عكاشة - عليكم السلام يا نادرة يا بنتى كيف ما
أصبحتى؟
 - نادرة - الحمد لله ربنا يسهل يا عم عكاشة والاقى فى
خزنة بنك من البنوك أوراق أبويا
 - عكاشة - يا مسهل ربنا يبسرلك الأمور يا بنتى
 - نادرة - أيه وقفت ليه
 - عكاشة - ما ده أول بنك
 - نادرة - والله... قريب من عندنا خالص. عن إذك يا عم
عكاشة
 - عكاشة - طيب أنا راكن هنا
 - نادرة - ماشى
- (وفى البنك)
- نادرة - السلامو عليكم
 - الموظف - وعليك السلام أفندم سحب والا إيداع؟
 - نادرة - لا أنا كنت عايزة أستفسر عن حساب والدى
 - الموظف - طيب إتفضلى حضرتك مكتب الاستعلامات
 - أول مكتب ع الشمال
 - نادرة - شكرا
 - السلام عليكم

- الموظف - عليكم السلام . أفندم
- نادرة - من فضلك أنا كنت عايزة أستفسر عن حساب والدى هنا فى البنك
- الموظف - وهو فىن مجاش بنفسه ليه وبعدين ممنوع ندى معلومات لأى حد غير العميل أحنا متأسفين يا فندم
- نادرة - لا مانا فاهمة لكن والدى أتوفى وكنت عايزة أعرف الإجراءات اللى تخلىنى أستخدم الحساب
- الموظف - أه إذا كان كدا مفيش مانع يا ترى شهادة الوفاة مع حضرتك
- نادرة - أيوة أتفضل
- (إنتفض الموظف من مكانه)
- المعلم حسان الراضى ؟ وحضرتك تبقى بنته
- نادرة - أيوة فيه أيه
- الموظف - أبدا أهلا أهلا يا هانم البقاء لله يا هانم ده خبر مؤسف إتفضلى حضرتك فى مكتب المدير إتفضلى
- نادرة - إشمعنى هو فيه أيه
- الموظف - فيه أيه إنتى بنت حسان بيه الراضى أكبر عميل له حساب عندنا هنا فى البنك
- (عند باب مدير البنك)
- الموظف - إتفضلى إستريحى هنا يا أفندم لحظة واحدة أدى المدير خبر
- (جلست نادرة فى إستعجاب)
- نادرة - يااااه أد كدا الكل بيعملك حساب يا حاج حسان الله يرحمك

- الموظف - إتفضلى يا هانم
- وقف المدير لإستقبال نادرة
- المدير - أهلا أهلا نادرة هانم إتفضلى ...حاجة ساعة أوام يا فضل
- فضل - من عنية يا حضرة المدير
- نادرة - لا مفيش داعى أنا كنت بس جاية أبلغ عن وفاة والدى وجاية معايا كشف العيلة وشهادة وفاته وبطاقتى الشخصية وعايضة أعرف الإجراءات اللى تخلىنى أسحب من حسابه
- المدير - قصدك حسابك
- نادرة - حسابى أنا؟
- المدير - أيوة يا بنتى والدك الجاج حسان عامل الحساب بأسمك وبوصايته ومن بعده والدتك الست زينات صادق لحد ماتتمى 21 سنة
- نادرة - بطاقة والدتى أهى لكنها مريضة مبتخرجش يعنى مينفعش أسحب من حسابى ببطاقة والدتى
- المدير - لا مش ممكن لازم تيجى هى بنفسها
- نادرة - طيب والعمل؟
- المدير - أنا ممكن أساعدك يا بنتى وقت ماتعوزى تسحبى أى مبلغ أبعت معاكى موظف يمضيها ع الأستلام وبكدا تصرفى المبلغ اللى إنتى عايلاه بس أحنا عاداتنا ما بنعملش كدا لكن علشان والدك من أقدم العملاء المهمين فى البنك ووفاءا لذكراه مش عايزين نعدلك الأمور

- نادرة - طيب ممكن أعرف حساب والدى كام بالظبط؟
- المدير - أه طبعا .ثانية واحدة .ملف حسان الراضى
- ...حسان الراضى ..أهو
- حساب والدك . إثنين وخمسين مليون وخمسة وسبعين ألف جنيه
- (فقدت نادرة إترانها)
- نادرة - كام ! من فضلك ممكن كوباية ميه
- المدير - أبوة طبعا . يا سليمان
- سليمان - أفندم
- المدير - كوباية مية أوام إتفضلى يا هانم
- (بعد ما شربت)
- المدير - تحبى أبعث موظف معاكى للست الوالدة
- نادرة - لا لا مش وقته
- المدير - ع العموم دا الكارت بتاعى فيه رقم تليفونى
- وقت ما تحبى أتصلى بيا أبعثك الموظف بالأوراق
- والمبلغ اللى تحبيه
- نادرة - أنا متشكرة جدا واضح أن الخدمة فى البنك هنا مميزة
- المدير - بس مش لأى حد إنتى والدك من رجال الفى أى بى
- نادرة - أنا متشكرة جدا
- المدير - لو تحبى حد يوصلك يا أفندم
- نادرة - لا شكرا معايا العربية برة متشكرة سلاموا عليكم

- (خرجت نادرة وهى مذهولة
- عكاشة - ها وصلتى لحاجة
 - نادرة - أيوة يا عم عكاشة
 - فعلا والدى له حساب هنا بس لازم الست أم نادرة هى
 - اللى تيجى بنفسها وقت ماتكون عايزين نسحب فلوس
 - علشان أنا لسة قاصر
 - عكاشة - أه... تحبى نروح بنك تانى
 - نادرة - أه طبعا ودينى
- (وفى البنك التانى حصل نفس اللى حصل فى الأول وكان
- الحساب 20 مليون جنيه
- والبنك التالت نفس المبلغ 20 مليون جنيه
 - والبنك الربع كانت وديعة ب 5 كيلو من الذهب الخالص
 - خرجت نادرة ولم تحملها قدماها حتى وصلت لباب
 - السيارة بصعوبة
 - عكاشة - مالك يا بنتى
 - نادرة - أبدا تعبت من اللف يا عم عكاشة يا ترى لسة
 - فيه بنوك تانية؟
 - عكاشة - لا يا بنتى هى دى البنوك اللى كان بيتعامل
 - معاها والدك مش فاضل غير بنك واحد فى قنا
 - نادرة - طيب ودينى ع البيت يا عم عكاشة
 - عكاشة - مالك يا بنتى حزينة كدا ليه ؟ إنتى ملقتيش
 - حساب فى باقى البنوك والا آيه؟
 - نادرة - بالعكس لقيت ولقيت كتير كمان وكلها بأسمى
 - عكاشة - الله طب أمال مالك؟

- نادرة - مش مصدقة إن والدى كان عنده المال ده
- وسايينا فى شقة زى اللي إحنا عايشين فيها دى
- عكاشة - معلىش يا بنتى أكيد هو عامل الصح متزعلش
- نادرة - خير الحمد لله . ودينى ع البيت
- عكاشة - حاضر يا بنتى
- نادرة وصلت للمنزل ووصعدت لشقتها وهى سرحانة ومذهولة ووجدت أم سعيد جالسة مع والدتها
- أم سعيد - ندورة ..حمدلله ع السلامة
- وقعت نادرة فى وسط الحجرة
- زينات - بنتى إلحقيها يا أم سعيد . هاتيها جنبى بنتى
- حبيبتي نادرة إهى إهى إهى نادرة نادرة
- أم سعيد - ندورة . ندورة يا حبيبتي . مفيش إزازه
- ريحة والا بصله والا حاجة
- زينات - اهى جنبى ع الكوميدينو اهى
- أم سعيد - هاتى شمى يا حبيبتي شمى
- نادرة - اممممم....امممم أنا فين أيه يا جماعة فيه
- أيه
- أم سعيد - أيه اللي فيه أيه مالك يا ندورة يا حبيبتي
- راجعة داخه من برة ليه يظهر أنك مشيتي كثير
- زينات - نادرة حبيبتي الحمد لله إنك بخير يا بنتى مالك يا
- نور عيني
- نادرة - مفيش حاجة أنا كويسة متتخضوش يا جماعة
- أم سعيد - إنتى أكيد مأكلتيش علشان كدا دوختى
- نادرة - أه فعلا

- أم سعيد - طيب أعمك سندوتش بيض والاجبنة تاكليه
وأعمك كوباية شاي تظبط دماغك
- نادرة - ربنا يخليكى يا خالتى أم سعيد
- زينات - أيه يا نادرة أنتى ملقتيش لأبوكى حساب والا
أيه؟
- نادرة - بالعكس يا ماما دانا لقيت ولقيت كتير فوق ما
تتصورى ويمكن هو دا اللى خلانى فقدت الوعى أنا
مذهولة يا ماما مذهولة
- زينات - ليه يكنش معاه مليون جنيه بحاله
- نادرة - هههههه مليون
- زينات - عندك حق كتير انا عارفة الواحد كدا ساعات
بيسرح بخياله لبعيد
- نادرة - أنا لقيت أبويا معاه 92 مليون وسبعومية خمسة
وسبعين ألف جنيه ده غير خمسة كيلو ذهب يا أمى
- زينات - أيه أنتى قولتى كام هيا هيا هيا
- نادرة - ماما ماما الحقيقى يا خالتى أم سعيد
- أم سعيد - أيه يا نادرة فيه أيه مالك يا زينات يالهوى
إتصلى بالدكتور قوام يا نادرة
- والا إستنى رشيها ميه وشمميه ريحة
- زينات - امممم .. امممم
- أم سعيد - أمم أيه سيبتى ركبنا يا زينات فيه أيه أنتوا
مالكوا النهاردة
- نادرة - يا حبيبتى يا ماما أنا خفت لتكونى إهىء إهىء
إهىء

- زينات - لكون أیه مت یعنی
- نادرة - بعد الشر علیکی یا أمی
- أم سعید - لا یا ختی متخفیش تموت ده أیه دی مش هتموت إلا لما تموتنا ههههه . أما أروح أصب الشای وأجیب السندوتش
- بعد خروج أم سعید
- نادرة - أیه یا أمی
- زينات - أیه أیه یا نادرة یا بنتی دی عاملة يعملها أبوکى (فی المطبخ أم سعید تحدث نفسها)
- أم سعید سرا - أیه یا أختی اللی جرى للولية وبنتها البت یغمی علیها وتکلم أمها کلمتین یغمی علیها هی کمان لا الحکایة فیها إنا وأنا مش هرتاح إلا لما أعرفها
- أما أروح أودیلها الشای والسندوتش وأحاول أسمع بیقولوا أیه
- (اتسحبت ام سعید وهی تحاول أن تستمع لكلام نادرة ووالدتها
- نادرة - اصبری یا أمی إنسى إن فیه فلوس لازم أجیب فلوسی اللی برة . حد عارف هما کام یا ما دا غیر أرض المعلق اللی حط أیده علیها أنا مش هسیب جنیه من حقی لحد ..حتى لو كان معایا مال قارون
- هش إستنى یا ما
- واتسحبت نادرة ونظرت جانب باب الحجرة - خالتی أم سعید
- أم سعید مرتبکة - ها ااااه یا حبیبتی عملتک الشای

- وجبت هولك أهو ال ال الست زينات عاملة أيه كويسة
- نادرة - أه الحمد لله
- طيب أنزل أنا بقى أصلى سامعة إبنى ومراته بيتخانقوا
- من شباك المطبخ وهبقى أطلع تانى بالأذن يا ندورة
- نادرة - مع السلامة يا خالتي أم سعيد
- زينات - فيه أيه يا نادرة؟
- نادرة - أبدا ظبطت أم سعيد واقفة تسمعنا من ورا الباب
- وإحنا بنتكلم
- زينات - تفكرى تكون سمعت حاجة
- نادرة - مفكرش هو إحنا قولنا حاجة واضحة تفهمها؟
- والا لو سمعت إحنا بنسرق
- زينات - لالالا متستهتريش بيها دى لقاقة ونقالة كلام
- ربنا يستر
- نادرة - مش مهم خلىنا فى حالنا إنتى رأيك أيه يأمى
- زينات - فى أيه يا بنتى
- نادرة - فى اللى قولت هولك
- زينات - اللى تشوفيه يا بنتى ربنا ينورك مخك
- نادرة - أنا عمرى ما هقول لرؤف ولا أى مخلوق على
- فلوسنا
- الناس لو عرفت أننا أغنيا وشوشهم هتتغير كثير خلىنا
- نعرف اللى بيحبونا وإحنا فقرا علشان مينضحكش علينا
- وإحنا أغنيا
- زينات - اللى تشوفيه يا بنتى
- نادرة - بصى بقى يا أم نادرة أنا أول حاجة هعملها

- هدحك مستشفى خصوصى علشان تتعالجى صح
- زينات - مش وقته بعدين يا بنتى
 - نادرة - لأ وقته أنا مش هسيبك تعانى والفلوس فى أدينا
 - وشوية كدا أشتري فيلا حلوة نعيش فيها ونفكها على
 - روحنا بدل القحط اللى أحنا عايشين فيه
 - زينات - طيب أصبرى شوية على ما الأمور تهدى
 - ونعرف راسنا من رجلينا
 - نادرة - خلاص يا أمى أنا هصبر لحد ما أشوف هنعمل
 - أيه مع أنور الصاحى ربنا يعنا عليه
 - بعد يومين رن جرس الباب وفتحت نادرة الباب
 - نادرة - مختار أهلا أهلا إتفضل
 - مختار - أهلا يا بنت عمى
 - نادرة - أدخل مرات عمك نايمة دقيقة واحدة هصحيهاك
 - مختار - لالا خليها مستريحة فى الحقيقة أنا كنت عايزك
 - أنتى فى موضوع خلينا نتكلم هنا فى الصالة
 - نادرة - طيب أتفضل خير يا مختار؟
 - مختار - خير .. نادرة أظن أنتى حاسة باللى عايز أقوله
 - نادرة - عايز تقول أياه
 - مختار - نادرة أنا بمثل بالنسبالك أياه
 - نادرة - هيكون أياه أبن عمى
 - مختار - بس
 - نادرة - هو فيه أكثر من كدا
 - مختار - أنتى مش فاهمة صحيح والا بتستعبطى
 - نادرة - أياه بستعبط دى وأيه هو اللى أنا مش فهماه؟

- مختار - نادرة أنا ..أنا
- نادرة - أنت أيه
- مختار - أنا بحبك
- نادرة - أنت بتقول أيه مش هتبطل هظارك ده
- مختار - أنا مابهظرش أنا فعلا بحبك يا نادرة وعائز
- أتجوزك رأيك أيه يا بنت عمى
- نادرة - رأيى أنك اخترت غلط أو حسيت غلط أنا كل
- إحساسى بيك أنك أبن عم وأخ وبس
- مختار - أخ . أخ أيه ؟ نادرة أنا بقولك بحبك ومش قادر
- أخبى إحساسى ده
- نادرة - وأنا بقولك أنى بعتبرك أخويا اللى إتحرمت منه
- مختار - كدا ده ردك الأخير
- نادرة - أيوة
- مختار - فكرى كويس يا بنت الناس
- نادرة - ردى أنا قولتتهولك
- مختار - بقى كدة يا نادرة أنا ترفضينى
- نادرة - مختار أنا لو لفيت الدنيا مش هلاقى زيك
- مختار - طب ما أنتى حلوة أهوه
- نادرة - مش هلاقى زيك أخ
- مختار - أخ يا نادرة أنا بحبك أنا من ساعة ماشوفتك
- قدامى بنت كاملة الأثوثة عنكى شفايفك
- نادرة - أيه . مالك يا مختار أنت شارب والا أيه
- مختار - شارب . دا أنا لسة عايز أشرب
- نادرة - وسع كدا أوعى أرجوك أنت عايز منى أيه

- مختار - عايزك عايزك أنتى يا نادرة
- (مختار يمسكها ويحاول ضمها إليه غصبا وهى تقاوم)
- نادرة - مش معقول أبعد عنى يا حيوان
- مختار - أنا حيوان علشان كدا مش هسيبك
- نادرة تحاول الإفلات منه رماها أرضا محاولا الاعتداء عليها بالقوة وهى تحاول إبعاده عنها لكنه مصمم أن يغدر بها
- نادرة - - ابعد عنى
- نادرة تركله بقدميها فى بطنه وحاولت مقاومته ولكنه جرها من قدميها محاولا تقبيلها غصبا . وهى تقاوم حتى لا تعطه الفرصة لذلك .تبعد فمها عنه وتعاقر وتعاقر ألى أن وصلت يدها الى تحفة نحاسية موضوعة فوق المنضدة وضربته بها فى رأسه فأنشغل بجرحه ودمه الذى ينزف من رأسه
- مختار - آاه يا مجنونة
- قامت تجرى وملابسها ممزقة وشعرها منكوش إلى الباب لتفتحه وقامت بطرد مختار وهى منهارة
- نادرة - أمشى أخرج برة يا حيوان برة يا كلب أتفوا عليك ندليا خالتى أم سعيد يا خالتى أم سعيد يا خالتى أم أدور الحقونى
- وسرعان ما ألتفوا حولها الجيران
- أم أدور - فيه آيه يا نادرة مالك أمك جرالها حاجة
- نادرة - تعالوا أشهدوا ع الحيوان اللى كان عايز يغتصب بنت عمه أشهدوا يا جيرانى

- أم سعيد - أنتى بتقولى أيه يا أبو أدور . يا وائل تعالوا
- أبو أدور - فيه أيه يا أم سعيد خير يا نادرة
- نادرة - تعالوا شوفوا البيه اللى ملو هدومه اللى بدل ما يحافظ على بنت عمه يستغل تعب أمها ورقدتها ويحاول يعتدى عليها
- أنا بشهدكم عليه علشان لو حد شافوا طالع يطرده من ع السلم هو ده ابن عمى اللى عايز يتجوزنى ولما رفضت عايز يخذنى بالعافية أنا بقى مبخفش ومبتهتش واللى يحاول يأذينى أفضحه فضيحة بجلال
- مختار - بقى كدا يا نادرة إن ماحاسبتك ع اللى عملتيه مبقاش مختار الراضى
- أدور - طيب يالا بقى من هنا بدل منرميك من ع السلم أخص ع الرجالة الورق هو معدش فيه نخوة (يخرج مختار ممسكا بجرحه)
- ماشى يا نادرة الأيام بيننا
- نادرة - يالا يا ندل يا جبان يا عرة عيلة الراضى أوعى أشوف وشك هنا تانى أقسم بالله لو شفتك هنا مانا ضرباك غير بشبشب الحمام يا ابن عمى
- أنا مشكرة قوى يا جماعة ربنا ميحرمنيش منكم
- أم سعيد - أدخلى يا ندورة غيرى هدومك اللى إتقطعت دى وأهدى كدا يا بنتى منه لله
- زينات من الداخل - نادرة يا نادرة فيه أيه عندك يا بنتى
- نادرة - جاية يا أما . طيب عن إذنكم يا جماعة
- أم أدور - إتفضلى يا بنتى والحمد لله اللى جت على أد كدا

(دخلت نادرة لوالدتها)

- زينات - يا لهوى أياه اللى عمل فيكى كدا يا بنتى
- جرت و ارتمت فى حضن أمها وهى تبكى
- نادرة - مختار يا ماما مختار
- زينات - مختار! مختار أبن عمك الباشمهندس
- نادرة - ايوة يا ماما الباشمهندس طلبنى للجواز قتلته
- أنت زى أخويا هجم عليا وكان عايز يعتدى عليا لكن
- ماتخافيش أنا ضربته فى دماغه بالفاضة النحاس سيحت
- دمه وناديت الجيران شهدتهم عليه وفضحته قدامهم
- زينات - خير ما عملتى..أخص عليك يا مختار بتستغل
- رقدتى فى السرير وتبهدل بنت عمك كدا
- نادرة - تعرفى يا أمى الموقف ده عرفنى أد ايه بابا كان
- عنده حق يسبنا فى حنة شعبية كدا أكيد علشان منبقاش
- لوحدينا مهما يكون الجار أخ بيجيرنا وقت المصايب
- والأخطار الله يرحمك بابا
- زينات - بقى كدا يا مختار والله ممفوتهاك
- نادرة - علشان كدا يا أمى عايزاكى تسمعى كلامى
- وتتعالجى صح علشان محدش يستهتر برقدتك دى
- زينات - عندك حق يا بنتى ورحمة حسان لأوريك يا
- مختار يا راضى ومامعديهاك
- روحى يا بنتى غيرى هدومك وأتوضى وصلى ركعتين
- شكر لله اللى فلتى من تحت أنياب الكلب ده
- نادرة - الحمد لله ياما
- زينات - صحيح اللى تحسبه موسى يطلع فرعون

- رن جرس التليفون
- نادرة - ده رؤف مش هقدر أرد عليه وأنا معيطة كدا
- زينات - نادرة أوعى تجيبيله سيرة مهما كان ده شيطان
- يا بنتى ومسير الوجوه تتقابل
- نادرة - فاهمة ياما
- زينات - روحى يا بنتى ربنا يكملك بعقلك ويبعد عنك ولاد الحرام
- توضأت نادرة وصلت ركعتين شكر لله وبعد أن هدأت
- لم يكف الهاتف عن الرن .. نظرت نادرة فى التليفون
- وجدت 23 مكالمة من رؤف
- نادرة - يا خبر أبيض دا زمانه هيتجنن ألو ... أيوة يا رؤف أنا أسفة اصلى كنت عاملة الموبايل صامت وكنت بصلى ها .. بصلى نوافل من القديم اللى عليا لربنا يا أخى هو لازم الصلاة تكون فرض بس .. مفيش مالى ما أنا زى العفريته أهو... لا أبدا أنا كويسة ..يااااه يا رؤف أرجوك . تصدق ..قلبك بيكذب عليك...يووووه ..
- رؤف أرجوك متزعش منى أنا أصلى مبنامش اليومين دول كويس بسبب اللى أنا فيه وأنا كمان ...محمد رسول الله ..أستغفر الله العظيم
- زينات -أيه يا نادرة هدى أعصابك يا بنتى إنتى إتعصبتى أوى ع الجدع دانا سامعة صوتك من هنا
- نادرة - غصب عنى يا ماما اللى حصل دا مش شوية لا اللى حصل من مختار ولا اللى حصل م الحاج حسان
- زينات - أى والله يا نادرة كله كوم واللى عمله أبوكى

كوم تانى

- نادرة - أنا تعبانة أوى يا أمى..ودماغى هتفجر
- زينات - طب تعالى نامى جنبى ع السرير وأرتحك حبة
- يا بنتى والا أدخلى إرتاحى فى أوضتك أحسن أم سعيد
- تيجى عمرك ما هتعرفى تنامى وهى قاعدة
- أدخلى أوضتك وأنا لو خبطت مش هرد. هتزهق وتنزل .
- روحى يا بنتى روحى يا حبيبتى . هيبويه الله يجازى ولاد
- الحرام

(مر وقت طويل وعندما أستيقظت نادرة وجدت والدتها
مستغرقة فى النوم

- نادرة - يااه أنتى كمان نمتى يا أم نادرة
- زينات - وهعمل أياه يا بنتى نمت علشان مقلقكيش لا
- براديو ولا تليفزيون
- نادرة - يااه دا انا نمت كثير أوى
- زينات - نوم العواف يا حبيبتى
- نادرة تحبى أجيبك تاكلى يا أمى
- زينات - لا يا حبيبتى
- انا أكلت قرصة بكوباية شاي ساخنة من الترمس كتر
- خيرك يا بنتى عاملة حسابك فى كل حاجة القرص
- وترمس الشاي وكولمان المية دا حنة العيش والحلاوة
- والجبنة والزتون والخيار جنبى بصراحة التلاجة
- الصغيرة دى مريحانى أخر راحة ربنا ميحرمنيش من
- حنيتك يا نادرة يا بنتى
- نادرة - ربنا يخليكى ليه يا ست الكل . إتفرجى بقى على

التلفزيون وأنا فيه كام حاجة كدا فى البيت هعملها وأجى
أتفرج معاكى

- زينات - على راحتك يا حبيبتي
- مر وقت
- زينات - أنتى بتعملى أيه عندك يا نادرة
- نادرة - أبدا أنا خلصت وجاية أهو
- زينات - الله أنا شمة ريحة حلوة
- نادرة - ههههه ياااه أد كدا الريحة طالعة ع العموم
- دقايق والصوانى تخرج على ما أخذ دش ع السريع
- زينات - أنتى بهدلتى نفسك فى أيه
- نادرة - أبدا كنت بمسح الصالة بالديتول وبطهر بيتنا من
- الرجلين الفذرة اللي دخلته . عن أذنك يا أمى هروح أخذ
- دش بسرعة وأجى أحسن زمان أم سعيد هتشم الريحة
- وتطلع جرى الحق أدخلى دش قبل ماتتطلع
- زينات - تطلع أيه هو دا وقته ..دا الوقت أتأخر
- نادرة - وهى دى بيهما
- زينات - على رأيك يا بنتى روحى
- (أخذت نادرة حمامها وصففت شعرها وتعطرت ودخلت
- لوالدتها
- نادرة - ها أيه رأيك
- زينات - اللهم صلى على كامل النور قمر يا حبيبتي يا
- أرض أحرصى ما عليكى
- نادرة - هههههه أنا مقصدش أيه رأيك فىا . أنا بقول أيه
- رأيك الأكل جهز أجيبلك

- زينات - وماله يا بنتى إن كنتى هتاكلى معايا
- نادرة - والله ما ليا نفس يا أمى
- زينات - يبقى خلاص مادم هاكل لوحدى يبقى مش واكله
(طرق على الباب)
- نادرة - بس كدا طب أهى جاتلك اللى تاكل معاكى أكيد دى
خالتي أم سعيد
- نادرة - تعالى ياخا.....رؤف مش معقول
(وقفت نادرة مذهولة دخل عمر)
- عمر- أيه أنتى هتفضلى مذبهلة كدا كتير مفيش أدخل .
أفضل حاجة كدا يعنى
- نادرة - أااه طبعا أفضل أفضل هات إيدك يا رؤف
- مدت نادرة يدها لتمسك يد رؤف لتدخله وقتها قبض
على يدها بحرارة كأنه وجد شئ مفقده. ودخلت به
للصالة وعندما ارادت أن تسحب يدها من يده أمسك
يدها ورفعها على صدره وقام بتقبيلها
- رؤف - وحشتينى يا نادرة وحشتينى فوق ما تتصورى
- خجلت نادرة وسحبت يدها بصعوبة
- نادرة - إتفضل يا رؤف
- رؤف - إستنى أنتى أوضتك أكيد هى اللى ع الشمال دى
- نادرة - فعلا مين قال لك
- ريحة البرفان بتاعك جاى بشدة من الشمال يبجى أكيد
هنا أوضتك
- نادرة - إنت ملكش حل أتفضل
- رؤف - الله أمال فين عمر

- عمر - أنا هنا جنب الحاجة
- نادرة - أنت لحقت
- عمر - ياه دا أنا سلمت وعرفت الحاجة بنفسى وبقينا
- أصدقاء مش كدا يا مرات عمى
- زينات - كدا يا حبيبى
- نادرة - ماما أقدملك رؤف أبن عمى
- زينات - يا مرحب يا أبنى أتفضل .. أقعديه يا نادرة
- نادرة - حاضر يا أمى أتفضل أقعد يا رؤف
- رؤف - جبل ما أتفضل وصلينى الأول أسلم على ماما
- الحاجة
- رؤف - إزيك يا ماما وأزى صحتك عاملة أيه دلوجتى
- زينات - الحمد لله يابنى نحمد ربنا على كل اللى يدهولنا
- يا مرحب
- مرحب بيكى يا ست الكل (وجه الكلام لنادرة)
- رؤف - ها مالك بجى يا ستى
- نادرة - مالى مفيش حاجة ما أنا زى القردة أهو
- رؤف - متحاوليش تخبى عليا يا نادرة أنتى مش طبيعية
- وجلبنى بيجولى أن فيه حاجة مضيجاكى
- نادرة - وأنت تاعب نفسك وجاى المشوار دا كله لمجرد
- أن فيه حاجة مضايقتانى يا رؤف
- رؤف - وأجى ماشى على رجلى كمان لو ملجيتش
- مواصلة . أنتى متعرفيش أنتى بالنسبة لى أيه قدام
- الحاجة أهه... نادرة أنا بحبك حب لو أتوزع على الكرة
- الأرضية مكانش يبجى فيه حاجة أسمها كره فهمتى يا

بت عمى

- نادرة بخجل - رؤف
- ام نادرة مبهورة ومذهولة من موقف رؤف ومن جراته وصراحته وكأنها لأول مرة ترى شخصية جريئة وواضحة بهذا الشكل وشعرت انها ظلمته بحكمها عليه بسبب فقدان بصره . وتأكدت أن رؤف هو الرجل المناسب للحفاظ على نادرة ه
- رؤف - أيه اللي مضايحك يا نادرة؟ شوفى عايزة أجولك حاجة جدام ماما الحاجة
- لو كان اللي مزعلك الفلوس اللي عند اللي أسمه أنور ده أنا بجولك ولا تسألنى فيه ولا تتعبى روحك وتدورى على الوصل ولا أيتها شئ ولو عايزة فلوس أطلبها منى وأنا رجبتي سداة من جنبه لمليون اللي أنتى عايزاه بس مش عايز أحس بلمحة حزن جواكى
- نادرة - وأنت ذنبك أيه تضيع فلوسك اللي هى مش من حقى ع الأقل دلوقتى
- رؤف - ذنبى أيه ذنبى أنى بحبك ذنبى أنى مجدرش أنام ولا يهنالى بال طول مانا حاسس مجرد الأحساس أنك متضايجة على فكرة ده مش كلام وبس وأنتى عارفة كدا كويس ولو انتى مش عايزة تطلبى فلوس ومكسوفة أنا جدام ماما الحاجة بطلب يدك ومستعد أكتب كتابى عليكى دلوجتى حالا جبل كمان شوية جولتى أيه
- نادرة - رؤف أنا مش محتاجة فلوس صدقنى ..أنا بخير دا مجرد زعل من اللي والدى حطنى فيه حاسة أنى فى

- دوامة بجد تعبت تعبت أوى
- رؤف - أرجوكى يا نادرة لولية معزة فى جلبك متفكريش ومتدوريش ومتتعيش نفسك والا أیه رأيك يا ماما الحاجة . ماما الحاجة . يا ماما
- زينات - ها أيوة يا بنى اللى تشوفه
- عمر - طيب وأنا ذنبى أیه أجى سايج على 180 وواخذ الطريق وش واحد
- رؤف - معلىش يا سيدى عجبال منتعابلك وأنت واجع زىي إكدّه
- عمر - لا يا عم أنا أعمل عاملتك دى ..ده مبینمش حب أیه دا اللى يجيب الأرق والصداع والقراع
- زينات - هههههه يوه جتك أیه يا واد يا عمر والنبي دمك زى الشربات
- عمر - شربات أیه وفلنات أیه يا مرات عمى . أیه يا نادرة مفيش كدا شايات مأكولات أى حاجة من الحاجات
- نادرة - يا خبر ده فعلا سوهى عليه أنا أسفة يا عمر إتلخمت فى كلام رؤف وماقمتش بأى واجب
- حالا الغدا يكون ع السفرة
- رؤف - سيبك منه متخديش على كلامه
- نادرة - لا أزاى دا أنا لسة عاملة صنيه فراخ وصنية باشميل وأنتهزت الفرصة وعملت معاهم صنية بسبوسة والله أنتوا رزقكم فى رجليكم
- رؤف - متتعيش نفسك يا نادرة
- نادرة - تعبكم راحة أحنا هناكل لقمة سوا لأنى ميتة من

الجوع

- رؤف - ما دام هتاكلى معايا يبجى أنا كمان جعان جدا
- نادرة - حالا السفرة تكون جاهزة
- عمر - طيب حيث أن ظهر الأكل وزهق الجوع عايز أدخل الحمام
- زينات - إتفضل يا بنى الحمام جنب المطبخ على طول
- زينات - أهلا وسهلا منور يا أبنى
- رؤف - دا نورك يا ماما الحاجة أسمحيلى أجولك يا ماما
- زينات - دا أنا يكون لى الشرف
- رؤف - طيب حيث إكده أنا كنت عايز أتكلم معاكى خصوصا وأحنا لوحدنا
- زينات - خير يا بنى
- رؤف - أنى يا ماما بحب نادرة وبطلب يدها منك وأوعدك إنى أحطها مكان عنية وأظن أن نادرة أديتك فكرة عن الموضوع .أيه رأيك يا ماما
- زينات - رأى ألف مبروك يا أبنى ..أنا مش عايزة لبنتى غير راجل يحبها ويخاف عليها
- وزى مانا شايقة مش هلاقى حد يخاف عليها ولا يحبها
- زيك يا بنى ربنا يوفقكم يا حبيبى
- نادرة - الغدا يا رؤف هات ايدك. إتفضل أقعد (بعد الأكل)
- نادرة - أتفضلوا أغسلوا أديكم
- عمر - بقولك آيه يا نادرة يا عروسة أخويا هو أنتى اللى عاملة الأكل ده والا دليفرى

- رؤف - طبعا أكل نادرة بس حجيجي يا نادرة تسلم أيديك
الوكل تحفة
- نادرة - بالهنا والشفاف أفضّل عند ماما هحط الشاي
- رؤف - ماشي يا حبيبة جلي
- نادرة - رؤف تعالى لما أقعدك مع ماما على ما أعمل
الشاي
- رؤف - مفيش مانع
- (طرق على الباب)
- أم سعيد - ندورة حبيبتى عاملة أيه يا حبيبتى روقتى والا
لسة منه لله الحيوان اللي زعلك هو فاكّر أن كل الطير
يتاكل لحمه ميعرفش أن وش القطة ده وراه أسد بنياب
حامية . بس كويس أنك نزلتيه سايح فى دمه أياك يكون
أتصفي . أخص عليه ملقاش الا بنت عمه ويعمل فيها كدا .
أخص عليه عرة شباب عيلة الراضى
- نادرة - يا خالتي أم سعيد خلاص عندنا ضيوف
- أم سعيد - ضيوف ؟ ضيوف مين ؟ أنتى نويتى تعمليله
مجلس رجالة خير ما عملتى
- (دخلت مسرعة موجهة الكلام لرؤف وعمر)
- أم سعيد - وأنا ليكوا عليا يا أخويا
- لو طلبتوني للشهادة أشهد بالحق وأقول أن نادرة سيحت
دمه دفاعا عن النفس أمال . دى القطة بتخربش عن
نفسها ودى من حقها دى مسألة شرف بس أن جيتنى
الحق كان نفسى تشفوه وهو نازل ف نص هدومه زى
الفار المبلول و نادرة عملتوا فضيحة ومن حى ما

- قالتلوا يا زبالة عيلة الراضى يا ندل يا جبان يوووووه
- نادرة - كفاية يا خالتى كفاية كفاية
 - رؤف - سبيها يا نادرة تتكلم
 - أم سعيد - يا ماشاء الله فرع الأخ طول بعرض هو ده
 - اللى هيجيبلك حقك من مختار الراضى بصحيح . أهلا يا
 - بيه وبتمد أيدها تسلم عليه
 - (ملأ الغضب وجه رؤف
 - رؤف - أيه اللى أنا بسمعه ده
 - نادرة - رؤف متخدش على كلامها
 - أم سعيد - ميخدش على كلام مين أنتى خايقة من أيه
 - عايزة أفهم دا أنتى صاحبة الحق يا هيلة
 - (نادرة تبكى ووهى تنظر لرؤف وقد أشتطاط هو وعمر
 - رؤف - الكلام اللى بسمعه ده حجيجى يا نادرة أنطجى
 - ساكتة ليه عمل فيكى أيه الكلب ده
 - نادرة - محصلش حاجة يا رؤف
 - رؤف - متحاوليش تخبى أنا عايز أعرف اللى حصل
 - وبالتفصيل
 - نادرة - رؤف
 - رؤف - أتكلمى يا نادرة وأنتى يا ست أم سعيد أتفضلنى
 - من غير مطرود
 - أم سعيد - وماله يا أخويا مهما أن كان أنتوا عيلة فى
 - بعضيكم ودى مسائل عائلية. عن اذنك يا ننينندووورة
 - نادرة - أقعد يا رؤف وأنا هحكلك على كل حاجة
 - بالتفصيل

- غباشى - أوامرني يا باش مهندس
- رؤف - بدى إثنين عتالة من رجالتك اللى بيشغلوا عندك
- غباشى - جصدكم البادى جارد
- رؤف - الله ينور عليك
- غباشى - ودول عايزهم ليه يا باشمهندس
- رؤف - لا أبدا مهمة صغيرة إكده وياخدوا اللى هما عايزينه
- غباشى - يا جدع متقولش كدا داحنا نخدمك بعيننا وأحنا فى ديك النهار لما نخدم الباشمهندس رؤف الراضى
- رؤف - ودا العشم برضوا
- غباشى - يا رعد يا جعفر
- البادى جارد - أفندم يا حاج أى خدمة
- غباشى - أيوة عايزكم تروحوا مع الباشمهندس وتشوفوا طلباته أيه وحسابكم معايا إتفضل يا باشمهندس
- رؤف - أنا عاجز عن الشكر يا معلم
- أتفضلوا أركبوا العربية وفى الطريق هشرح لكم كل حاجة عند الوصول)
- رؤف - خليكم هنا فى العربية ولما أرن عليكم تطلعوا شقة رقم 7 خلوا بالكم
- الرجالة - حاضر يا رؤف بيه
- رؤف - أنت متأكد أن ده البيت اللى ساكن فيه ال المخفى
- عمر - أيوة طبعا مش كان ابن عمى وحبيبى الروح بالروح

- (وصل رؤف لشقة مختار)
- رؤف - السلامو عليكم
 - والدة مختار - وعليك السلام مين رؤف الراضى يا أهلا وسهلا يا أبنى أتفضل
 - رؤف - أهلا بيكى يا حاجة يا ترى مختار موجود
 - والدة مختار - لا دا فى البرج الجديد
 - رؤف - ألف مبروك
 - والدة مختار - الله يبارك فيك يا يا باشمهندس ..طيب أتفضل واقف ليه أدخل وأنا أطلبهوك فى التليفون يجى حالا
 - رؤف - لا مفيش داعى أحنا هنروح له علشان نعملها له مفاجأة بس أدينا أنتى العنوان
 - والدة مختار - من عنيا ربنا يخليكم لبعض
 - والدة مختار - طب بقول أيه البيات هنا عندنا لازم نرد ولو حاجة بسيطة من كرمكم مع مختار وباسم
 - رؤف - ماتجوليش إكده يا مرات عمى داحنا أخوات ومختار سيد مين يحافظ ع الأخوة
 - بالأذن يا مرات عمى
 - والدة مختار - مع السلامة يا حبايى هستناكوا ع العشا
- (وصلوا العنوان مجرد عمارة 6 دور)
- عمر - شايف أبن عمك عمال يمعرو ويقول أشتريت برج
 - وفى الآخر تطلع عمارة ست أدوار
 - رؤف - تنتظر أيه من خسيس زى ده . بجولك أيه يا عمر متنساش تجيب الشنطة اللى فى العربية

- عمر - متخفش يا رؤف
- رؤف - يالا يا رجالة
- أطلعوا وأستنونا على باب الشجة . لحد أما ننادى عليكم
- الرجالة - أومرك يا باشمهندس
- رؤف - يالا بينا يا عمر
- عمر - هات يدك يا أخويا
- أهى الشقة أهى كاتب عليها أسمه
- (رن الجرس)
- مختتار يفتح الباب - رؤف مش معقول . أهلا أهلا أهلا
- . أتفضل يا ابن عمى
- ازيك يا عمر
- عمر - أهلا يا مختار
- رؤف - أزيك يا مختار
- مختار - أنا تمام الحمد لله . إنما مين اللى أداكم العنوان
- رؤف - الست والدتك أصلنا روحنا لك ع البيت الأول
- وعرفنا أنك هنا فى البرج
- مختار - برج ههههه الله يجازيك يا رؤف أهى حاجة
- على قدنا كدا
- رؤف - كام شجة البرج ده يا ترى
- مختار - دى عمارة 6 شقق
- رؤف - سامع أنك عايز تلم فيها شمل العيلة
- مختار - ها أه والله يا رؤف أنا قلت أحنا عيلة صغيرة
- وعلشان صلة الرحم وعضم التربة أدى كل عيلة شقة
- وأهو نسأل على بعض وعيالنا فى المستقبل يتعرفوا على

- بعض مش عايزين نغلط غلطة أهالينا ونعرف بعض على
كبر
- رؤف - عندك حج وأنت سيد مين يحفظ الأمانة ويصونها
مش إكده يا ابن عمى
 - مختار - ربنا يحفظك دا بعض ما عندكم يا رؤف
 - رؤف - لكن مجولتليش أنت بتجول كل عيلة شقة يعنى
ولاد عمك ابراهيم شجة وبت عمك حسان شجة وأنتوا
شجة والباجي هتعمل فيه آيه
 - مختار - شقة لباسم أخويا يتجوز فيها وشقة ليا
 - رؤف - تتجوز فيها برضوا
 - مختار - لا أنا مش بتاع جواز ما أنت عارف أنا أحب
أعيش حر طليق أما دا مايمنعش تبقى أستراحة ليا
لمزاجى يعنى
 - رؤف - ولما أنت مانتاش بتاع جواز بتلعب على بنات
الناس ليه؟
 - مختار - أنا لعبت على مين
 - رؤف - أنا هعرفك أنت لعبت على مين دلوجتى حالا
 - رعد .. جعفر أدخلوا وأجفلوا الباب وراكم على ما نشوف
البيه اللى مش بتاع جواز يروح لبت عمه يطلب يدها
ولما رفضت
 - الا حصل ايه لما نادرة رفضت الجواز منك يا مختار؟
 - مختار - وأنت تعرف نادرة منين وتخصك أصلا فى آيه
 - رؤف - أنا هعرفك تخصنى فى آيه دلوجتى حالا شوفوا
شغلکم يا رجاله زى ما أتفجنا

- مختار - أيه دا أنتوا هتعملوا أيه ؟ أنتوا عايزين منى أيه
- رؤف - عمر
- عمر - أيوة يا خوى
- رؤف - معاك الشنطة وفيها اللازم
- عمر - أيوة يا خوى
- رؤف - عايزكم تكسروه وتأدبوه وبعدين جلعوه هدومه كلها
- رؤف - عمر هات ماكينة الحلاجة
- عمر - جاهزة يا خوى
- رؤف - أربطه بالحبل اللي فى الشنطة بجولك أيه يا
- عمر - أبن عمك فى وشه شنب؟
- عمر - أيوة
- رؤف - إحلجهوله علشان ده مش راجل
- خسارة فيه الشنب وبعد إكده أحلجله شعره اللي طول عمره بيتباهى بيه واللى فاكر أنه سر وسامته
- مختار - ألحقونى ألحقونى
- عمر - أطلع اللزج وأحطه على بوجه يا خوى
- رؤف - لا لا أنى عايز أسمع صوته وهو بيصرخ ويعيط زى الولايا الكلب ده
- مختار - إرحمنى يا رؤف أنا حرمت خلاص حرمت والله
- أنت بتعمل أيه يا عمر كدا برضوا دا أنا أبن عمك تعمل فيا كدا
- طيب بلاش شعري أرحمنى يا رؤف وأنا أتعهدك إنى متعرضش لا لنادرة ولا لغيرها ولو حببت أهاجر من البلد

- على بعضها بس أرجوك بلاش شعري
- الرجالة - كله تمام يا باشمهندس رؤف
- رؤف - تسلموا يا رجالة
- خدوا ده بجى لبسوه له عشان يستر بيه نفسه
- عمر - هههههه إيه دا يا رؤف يا خويا
- رؤف - ده مجامه . دا أنا لو عليا كنت ركبتلوا ديل زى
- الحيوانات
- (الجميع يضحك على مختار) رعد - كله تمام يا رؤف بيه
- رؤف - أنتوا رابطينه فى كرسى مش إكده
- جعفر - أيوة يا بيه
- رؤف - حلو جوى شيلوه ونزلوه بالكرسى وأربطوه
- فوق شبكة العربية علشان الدنيا كلها تشوفه
- رعد - أومرك يا رؤف بيه بس
- رؤف - بس أيه
- رعد - أنت هتمشى بيه كدا فى الشارع
- رؤف - وهيجرى أيه
- رعد - المرور
- رؤف - متخافش لما يسألونا هنجول ده ابن عمى
- وعجله خفيف ورايحين نسلموا لمستشفى المجانين
- جعفر - أحسن يصرخ
- رؤف - لا متخافش مش هيصرخ علشان ميلفتش الأنظار
- ليه وبعدين لو صرخ هيزعلنى وهو عارف إنى زعلى
- وحش جوى ولما العرج الصعيدى بينفض مبدهاش مش
- إكده يا مختار

(يشاور مختار بالموافقة ووجه فى الأرض)

- رؤف - مسمعتش صوتك يعنى
- عمر - ماهو شاور بالموافقة يا خوى متكسفهوش بجى
- رؤف - بينا يا عمر
- عمر - على فين
- رؤف - على بيت عمك حسان
- عمر - وهناخدوا بالشكل ده
- رؤف - وماله الشكل ده هو جميص النوم مش لايح عليه
والا أيه
- عمر - ههههه بصراحة شكله مسخرة
- رؤف - يالا يا عمر بلاش تضييع وجت
- (وصل رؤف لمنزل نادرة وكل الجيران وقفوا يتفرجون
ويضحكون على منظر مختار
صعدوا ومن خلفهم أم سعيد ورنوا جرس الباب)
- فتحت نادره وفزعت من منظر مختار
- نادرة - أيه دا أنت عملت فيه أيه
- رؤف - دخلوه جصاد الحاجة جوة
- زينات - يا لهوى أيه دا مين دى يا بنى
- رؤف - دا خاين الأمانة مختار الراضى ده مختار يا
حاجة ده مختار يا نادرة لبستهولك توب النسوان اللى
ميستهالنش غيروا . مختار جدامك أهوا يا حاجة عايزة
تجوليلوا حاجة
- زينات - عايزة أقوله أخص عليك يا مختار مكنش العشم
تعمل فى بنت عمك كدا وأنا لو فىا صحة كنت كلتك

بسنانى بس نفسى فى حاجة واحدة . نفسى أتف فى
وشك وأقولك هو ده التوب اللى يليق باللى زيك يا عرة
الرجالة---- هى دى أخرتها يا بن محمود الراضى تتعدى
على بنت عمك فى بيتها من غير خشا ولا حيا ماهمكش
أن ده بيت عمك اللى أكلت فيه عيش وملح يا خاين
العيش والملح يا دون يا عرة عيلة الراضى

- رؤف - وأنتى يا نادرة الندل أهو تحت رجلينى وبين
أديكى تجدرى تعملى فيه ما بدالك أيه معايزاش تجوليله
حاجة؟

- نادرة - عايزة أقوله يا خسارة يا مختار كنت واخداك
قضوة وعاملالك تمثال بحترمه وأقدره لكن للأسف
ضيعت كل ده فى ثانية... ليه عملت كدا فيا وف نفسك يا
بن عمى ليه يا مختار

(نادرة منهارة تهجم عليه وتمسكه من رقبته)

- نادرة - ليه يا مختار ليه ليه ليه ليه ليه ليه ليه

(عمريحاول تخليص مختار من يدها)

- عمر - خلاص كفاية يا بنت عمى أهدى يا نادرة أهدى يا
بنت عمى

- رؤف - نادرة . لو جتلوا يريحك اجتلوا دلوجتى جدام
عنيكى

- نادرة - لا يا رؤف أرجوك ده مهما يكون أبن عمى
ومحبش أشوفه كدا ومحبش أشوفه فى بيتى مرة ثانية
..من فضلك يا رؤف فكه وخلية يمشى من هنا وكفاية
فضايح ليه ليه ليه

- رؤف - متعيطيش يا نادرة دموعك دى عندى غالية
جوى . رعد ..جعفر..عمر فكوا الندل ده وسيبوه يغور
من هنا

(بعد ما قاموا بتخليص مختار من قيوده أخذ يجرى ووجه
فى الأرض ولم يستطيع النظر لوجوه الموجودين وخصوصا
أن الشقة قد امتلئت بالمتفرجين اللذين يريدون رؤية الذئب
الذى هجم على بنت عمه وهو مكسور الجناح وقليل الحيلة
ووجهه فى التراب

- أم سعيد وهو خارج من الشقة
- أم سعيد استنى يا باشمهندس أما أجيبك جلبية بدل
القميص الشفتشى ده ..لولولولولولى ...روح داهية لا
ترجعك

- نادرة اخدت جلباب من الدولاب وجرت وراء مختار
- نادرة - مختار أستنى خد ألبس جلبية من هدوم عمك
- علشان تفتكر دايمًا أن عمك سترك بجلبيته وأنت كنت
عايز تعرى بنته وتشمت فيها الناس يا بن عمى
(دخلت نادرة حزينه تمسح دموعها)

- أم سعيد- لا حول الله يا ربى طول عمرك ذوق يا ندورة
شايقين يا حبايب الراجل الفرع ده هو اللى جاب لنادرة
حقها روح يا شيخ الله يعمر بيتك

- رؤف - خلاص يا ست أم ...
- أم سعيد - أم سعيد يا أخويا
- رؤف - خلاص يا ست أم سعيد أحنّا متشكرين ليكى جدا
تجدرى تتفضلى وتاخدى الباب فى أيديك

- وأنت يا رعد أنت وجعفر أنى متشكر ليكوا جدا ويا ريت
تجبلوا منى المبلغ الصغير ده
- رعد وجعفر - الحاج غباشى هيحاسبنا
- رؤف - ده مبلغ برة حسابكم وكتر خيركم
- رعد - يلزم خدمة تانية يا باشمهندس
- رؤف - شاكرين أفضالكم يا رجالة
- رعد وجعفر - سلاموا عليكم
- رؤف - وعليكم السلام
- رؤف - وأحنا كمان نستاذن يا حاجة تأمرى بحاجة
- زينات - مستعجل على أياه يا بنى أنت مش هتقعد معانا
- يومين أهو ع الأقل يستهلوا المشوار
- رؤف - كان بودى لكن مينفعش البيات عنديكم عموما
- أنا سعيد بمعرفتك جدا يا حاجة
- نادرة ادخلى اشطفى وشك وروجى كدا أمال . مش عايز
- أسمع أن فيه دمعة واحدة نزلت من عينكى يالا يا عمر.
- سلاموا عليكم
- نادرة - رؤف
- رؤف - خلص الكلام يا نادرة
- نادرة - رؤف أرجوك
- رؤف - ماجولتلك خلص الكلام . لما غضبى يروح
- نبجى نتكلم سلام
- بعد ما خرج رؤف غضبان وبالأخص من
- نادرة وموقفها مما فعله رؤف مع مختاروطريقة عقابه
- له ..دخلت نادرة حجرتها تبكى من كل ما مرت به فى

يومها فهو يوم لا يمحي من الذاكرة

(جرس الباب)

- أم سعيد - ندورة أنتى نمتى والا أيه...الله الله الله أنتى
بتعطى والا أيه...يا خايبة دا أنتى حقك تفرحى حد يزعل
لما يشوف حد يقف جنبه ويجيب له حقه...طب دانا
شبعث ضحك على منظر الباشمهندس أبو أربع علب اللى
كان يدخل البيت نافش ريشه زى الديك الرومى ويقول يا
أرض إتهدى ما عليكى أدى تصدقى بالله الجدع الفرع
اللى يوهم دا راجل بصحيح ..شوفتى كان جاى مكتفه
أزاي بس متعرفيش ليه كل ما بسمع صوته برتعش
وببقى عايزة أفضل ضربة له تعظيم سلام...الا يبقى
مين دا يا ندورة

(م نادرة من حجرتها)

- زينات - تعالى يا أم سعيد أدخلى أنا قاعدة لوحدى هنا
- أم سعيد - هههههه لا مؤاخذه يا زينات يا أختى أصلى
لقت ندورة وافقة وبتعطى قولت أدرش معاها شوية
وأفرفشها... ألا هى بتعطى ليه بقى؟
- زينات - من اللى شفته النهاردة ..هى اللى شافته شوية
يا حبيبتي دى نادرة لسة صغيرة على الهم ده
- أم سعيد - بس بسم الله ما شاء الله يا زينات يا أختى ع
الشاب الفرع اللى زى القمر ده على أد مهو شديد على
أد ما يشرح القلب الحزين..الا هو يقرب لكم أيه بالظبط
يا زينات
- زينات - دا أبوه يبقى هو وأبو نادرة ولاد عم لازم

- زینات - عم لزّم دا مین جدهم هههههه بضحك معاكى .
ندورة يا ندوره أنتی فین تعالى أما أقولك
نادرة - نعم يا خالتی
أم سعيد - انت یعنی مسألتيش عنی النهاردة لا بكوباية
مية ولا سندوتش أیه يا بت أنتی عايزانى أنزل والا أیه
نادرة - لا يا خالتی ..تحبى أعملك أیه
أم سعيد - لا قبل ما تعملی حاجة. تعالى يا حبيبتی أقعدی
جنبی أما أقولك حاجة
نادرة - قولی يا خالتی
أم سعيد - بصراحة كدا ومن غير لف ولا دورانا أنتی
بتحبى اللى اسمه مختار ده أو یعنی فيه أستلطاف بینكم
نادرة - أیه السؤال الغريب ده هو اللى أتفهم بعد دا كله
إنی بستلطف مختار
أم سعيد - والله ده اللى بان لى
نادرة - لیه یعنی؟
أم سعيد - الله ما أنتی جريتی وراه وصعب عليكی
وإديتيله جلبية المرحوم حسان الله يرحمه علشان يستر
نفسه بيها
نادرة - مش معنى إنی أدیت لمختار جلبية والدى يلبسها
إنی بستلطفه ..أو إنی ميالة له..أنا عملت كدا لأن ده
مهما يكون أبن عمى . یعنی فى مقام أخويا أو يمكن
حطيت نفسى فى مكانه يا خالتی . أنا أول ما شفته
بالمنظر اللى شفتيه ده كأنك غرستى سكينه فى قلبى .
مش قادرة أصدق ده مهما . كان لعبنا سوا وأكلنا وشربنا

- سوا واللى عمله ده حطم صور كتير حلوة جوايا كل ما
بفكرها بزعل من اللى حصل لنا ده مش أكثر ..وبعدين
ده دينا بيقول من ستر عبدا فى الدنيا ستره الله يوم
القيامة وأحنا مسلمين ماحناش كفرا والعياذ بالله
- أم سعيد - يا حبيبتي ربنا يديكى ع أد نيتك يعنى أفهم من
كدا أنك زعلتى من الذى فعله هذا الفرع المخيف أبو دم
زى الشربات
- نادرة - لو إنتى مكانى هتزعلى
- أم سعيد - أقولك الحق يا ندورة هفرح ع الأقل هحس أن
ورايا رجالة ..دى الناس كلها مبهورين بيه وأه لو
سمعتى المدح والكلام الحلو اللى الجيران بيقوله عليه
وخصوصا البت زهيرة ..هتموت وعمالة تلمح بكلام كدا
- نادرة - كلام أيه
- أم سعيد - أل أيه بتقول أن أنتى اللى أجرتى هذا الفرع
علشان يعمل كدا فى أبين عمك علشان تنتقمى منه ع اللى
عمله
- نادرة - أولا قولى لزهيرة الانتقام مش من طبعى وربنا
اللى بيحاسب العباد وبعدين الفرع المخيف اللى بتتكلّمى
عنه وفكرة إنى مأجراه ده أبين عمى وخطيبى
- أم سعيد - خطيبك
- نادرة - أيوة يا خالتي رؤف يبقى خطيبى وعلى يدك
معرفش الموضوع إلا منك أنتى يعنى كان عندنا بيتفق
مع أمى على الجواز وبعدين أنتى دخلتى . ولما عرف
حصل اللى شوفتيه داكله يعنى شىء مش مترتب وأظن

- يعنى أنا مش محتاجة أنى أشرح لزهيرة أو لغيرها دا
مين وعمل كدا ليه . وأنا مأجراه او هو متطوع يا ريت
كل واحد يخليه فى حاله أحسن
- أم سعيد - يا صلاة النبى أحسن . بقى هذا الشهم
خطيبك يا ندورة؟
 - نادرة - أيوة يا خالتي
 - أم سعيد - دا يبقى عنده حق فى اللى عمله وكويس اللى
مطخهوش عيارين دا أنتى متعرفيش غضب الصعايدة
أهو اللى زى مختار دا واللى عمله يهدره دمه وملوش
دية . يا ألف نهار مبروك يا ندورة والله فرحتك ولازم
أزغرتلك لولى لى لى لى لى
 - نادرة - هههههه كفاية يا خالتي
 - أم سعيد - أسكتى خلى العوازل يفلفلوا اللى بيقولوا أن
عمر ما حد هيقربلك بعد اللى حصل ده
 - زينات - ليه يا أم سعيد هو الحال أتقلب والا أيه سيبك
من الك الفاضى ده أحنا لا بتوع قوالة ولا عيادة سيبونا
فى اللى أحنا فيه أحنا ماكناش ناقصين زهيرة ورطها
مبقاش إلا الباييرين اللى يجيبوا سيرة ستهم والا أيه
 - نادرة - إهدى يا ماما ده مش كويس علشانك
 - زينات - بلا كويس بلا وحش . بقولك أيه يا أم سعيد أحنا
ناس كافين خيرانا شرنا لا بنحب نقول ولا نعيد أحنا مش
عايزين نعرف مين قال ومين عاد ولو سمحتى متنقلش
أى حاجة لنادرة تضايقها . أسمعى أما أقولك أحنا لا
عايزين نعرف حلو ولا وحش تمام كدا يا أم سعيد

- ما توصلوا بالسلامة تبقوا تظمنوني. توصلوا بالسلامة
- عمر - الله يسلمك
 - (أغلق عمر التليفون)
 - عمر - ليه يا رؤف مرديتش عليها
 - رؤف - علشان بحبها
 - عمر - علشان بتحبها أزاى بأى منطج ده
 - رؤف - لأنى مش عايز أزعلها ..أنت عارفنى فى غضبى مبعرفش أبوى
 - عمر - انت هتجولى ..لكن أنت غضبان منها ليه؟ ..هى ذنبها أيه فى اللى حصل ده؟
 - رؤف - ذنبها أنها مجلتلش حتى لما روحلتها بيتها وسألتها برضوا مجلتلش لولا عرفت بالصدفة من الست المهفوفة جارتهم دى
 - عمر - طيب ماهى خبت عليك علشان متزعلكش لأنها بتحبك يا رؤف
 - رؤف - وأنى كمان بحبها وبشدة . لكن دا يا عمر منهاج حياه.. سيستم لازم تتبرمج عليه من دلوجتى علشان منتعيش أنا وهى بعيدين ولازم تتعود متخبش عليا لا كبيرة ولا صغيرة. مش يمكن الندل ده لو متعاجبش كان كررها تانى بأى حيلة دى حاجة والحاجة الثانية إنى ماكنتش هعرفه على حجيجته وكنت هتعامل معاه كأخ وهو متعدى على خطيبتى يعنى أدخله بيتى وأكرمه وهو عدوى اللدود أبجى مركب إريال والا إيه يعنى ثالثا ودا الأهم مختار ده عامل كدا زى الجزء اللى بتصيبه

- باسم - أفندم أنت مين وعايذ آيه
- مختار - أنا مختار يا باسم
- باسم - مختار! مختار مين ؟
- مختار - مختار أخوك
- باسم - مختار يا خبر وأيه اللي عمل فيك كدا ؟ إلحقينى
- يا ماما تعالى إسندى معايا دا مختار أخويا
- والدة مختار - آيه مختار. وأيه اللي عمل فيه كدا يا حبيبى يا أبنى
- دخله ع الحمام الأول يا باسم أديله دش علشان يفوق خد
- غير نضيف لبسه... خلاص.. هاته على أوضته يستريح
- فى سرير
- مختار - أااه أااه غطونى أنا تعبان
- باسم - آيه اللي عمل فيك كدا يا أخويا
- مختار - عايذ أنام مش قادر
- باسم - طيب مش تقولنا فيه آيه ومين اللي عمل فيك كدا؟
- مختار - سيبونى لوحدى أرجوكم سيبونى
- أم مختار - خلاص يا باسم سيبوا يستريح لحد ميقدر يتكلم
- (خرجوا وأغلقوا الباب وسرح مختار فيما جرى له وبكى بشدة
- اهى اهى اهى
- خرجت أم مختار فى الصلاة
- أم مختار - تفكر آيه اللي عمل فى أخوك كدا يا باسم

- باسم - والله ما أنا عارف يا ماما دا شكله واكل علكة
إنما أيه م العيار الثقيل
- أم مختار - ومين دا اللي يضربه وهيضربه ليه أنا مش
مطمئة الموضوع فيه سر
- أستنى أستنى دا رؤف ابن عمك كان هنا هو وعمر أخوه
و سأل على . مختار قولتله فى البرج وأخذ منى العنوان
وراح له يا ترى قابله والا معرفش يوصل والا..
- باسم - والا أيه يا ماما
- أم مختار - والا يكونوا ليهم يد فى اللي مختار فيه مش
عارفة أنا قلبى ماكنش مطمئن
- باسم - عموما متقلقيش روحك كلها كام ساعة ينامهم
ويرتاح وبعدين نعرف
- أم مختار - بقولك أيه يا باسم هي الجلبيه اللى كان
لابسها مختار فين
- باسم - عندك فى الحمام عاوزاها ليه
(دخلت الحمام وقامت بتفتيشها)
- باسم - أيه يا ماما فيه أيه أنتى مالك بتفتشى فى الجلبيه
ليه كدا
- أم مختار - الجلبيه دى مش غريبة عليا
- باسم - ليه جلبيه بارتى
- أم مختار - أنا مبهظرش الجلبيه دى أنا عارفاها كويس
والجلبيه دى بالذات
- أيوة فعلا هي دى منتوشة من الكم أهى ...دى جلبيه
عمك حسان الله يرحمه ، أنا فاكراها كويس كان عمك

- وأبوك قاعدين فى البلكونة بيشرّبوا الشاى ويومها كانوا
 بيهظروا سوا وكم الجلبية شبك فى حديد البلكونة لو
 تفتكر الحديدة اللى بابا جاب الراجل قرطها وسواها
- باسم - أه أه فاكرها . المهم ، أيه اللى لبس جلبية عمى
 حسان لمختار؟ إستنى يا ماما دا كمان كان لابس حاجة
 غريبة تحت الجلبية قلعتها له قبل الجلبية دى إستنى أهى
 - أم مختار - يا نهار طين أيه دا دا قميص نوم إبنى كان
 لابس قميص نوم ليه؟
 - باسم - يا فضيحتك يا باسم يا راضى أخويا كان لابس
 قميص نوم ليه يا ماما
 - أم مختار - غريبة دى يا ترى حكايتك أيه يا مختار يا
 بنى . باسم أنت معاك رقم رؤف او عمر
 - باسم - أفكر كدا أيوة أهو
 - أم مختار - طيب أطلبهولى يا أبنى أما أجس النبض
 - باسم - حاضر يا ماما إتفضللى
 - أم مختار - بيرن ومحدث بيرد
 - باسم - مفيش مشكلة مش أبنيك فى حضنك ومطمنة
 عليه ، متتعيش نفسك بقى ووقت مايصحى يحكيلنا . يا
 خبر النهاردة بفلوس بكرة يبقى ببلاش ..خليه نايم
 والصباح رباح
 - فى منزل نادرة
 - أم سعيد من كثرة الثرثرة نامت على الأريكة فى حجرة
 زينات

- زينات - لا حول الله أم سعيد ...يا أم سعيد
- نادرة - يا خبر دى نامت يا أمى . خالتى أم سعيد يا خالتى
- أم سعيد - خ خ خ خ خ أبعـد عنى يا وائل أحسن أخليها ليلة سودا على دماغك الشبشب ع المخدة أهو
- نادرة - شبشب !ههههههه خالتى أم سعيد يا خالتى. دى نامت وبتحلم أنها بتكلم عم وائل كمان
- زينات - ههههههه طيب يا بنتى سبيها نايمة وهاتى الكوفرتة الخضرا من الدولاب وغطيها وأقفل الباب وروحى نامى أنتى
- طرق على الباب
- نادرة - أيوة مين ..
- رحمة - أفتحي يا نادرة أنا رحمة
- نادرة - رحمة أهلا أهلا أهلا يا حبيبة قلبى أتفضلى
- رحمة - أزيك يا نادرة
- نادرة - الله يسلمك
- زينات - مين يا نادرة
- نادرة - دى رحمة بنت عمى إبراهيم يا ماما
- زينات - رحمة بنت إبراهيم
- رحمة - أزيك يا مرات عمى يا حبيبتي وحشاني
- زينات - تسلمى يا بنتى يا أهلا وسهلا
- رحمة - أهلا بيكى يا مرات عمى
- نادرة - ها... تشربى أيه والا أجيب لك تتعشى
- رحمة - لا مليش نفس لأى حاجة يا نادرة

- نادرة - لكن مقلتلش أيه المفاجأة الحلوة دى
- رحمة - صحيح حلوة يا نادرة
- نادرة - جدا تاكلى بسبوسة
- رحمة - يا بنتى ماتتعبيش نفسك ما الليل قدمنا طويل ما
أنا قررت أبات معاكى
- نادرة - بجد أيه المفاجأة الحلوة دى
- رحمة - أعمل أيه مفيش حد أتكلم معاه . ما أنتى عارفة
أنا وحيدة وأخواتى صبيان . قولت أجى أجيك
وأستأذنتهم أبات النهاردة معاكى
- (التليفون رن)
- رحمة - ألو ..أيوا يا راضى أنا هنا عند نادرة ، أنس
وصلنى بس مرضيش يطلع قال مينفعش الوقت متأخر
...الله يسلمك خد أهى سلم عليها بنفسك...خدى يا نادرة
راضى عايز يسلم عليكى.
- نادرة - الله يسلمك يا راضى ..تمام الحمد لله ..فى عنية يا
راضى ماتخفش عليها مع السلامة
- رحمة - يا ساتر مين اللى بتشخرع الكنبه دى
- نادرة - ههههههه دى جارتنا راحت فى النوم زى
ماتكون نامت فى بير مش راضية تقوم
- رحمة - هههههههه الله يكون فى عونك يا طنط النهاردة
- زينات - النهاردة بس خدى من دا كتير ، يالا يا نادرة
خدى بنت عمك ودخليها ترتاح
- نادرة - ماشى يا أم نادرة تصبى على خير
- رحمة - تصبى على خير يا مرات عمى

- زينات - وأنتى من أهله يا رحمة
- (فى حجرة نادرة)
- رحمة - الله أوضتك تحفة يا نادرة
- نادرة - حاجة على ادنا كدا يعنى
- رحمة - بس جميلة
- نادرة - ده سريرى وده سريرك أيه رأيك
- رحمة - نعمة وفضل من ربنا . جحر ديب يساعى ميت حبيب
- نادرة - هههههه جحر ديب
- رحمة - أه بالمناسبة لسة مقرر تيش هتيجى فى الشقة اللى بيفرشها لكم مختار؟
- نادرة - لا يا رحمة أنا مش هسيب بيتى
- رحمة بحزن - عندك حق من خرج من داره إتقل مقداره
- نادرة - ليه أنتى مش مبسوفة فى البرج والا أيه؟
- رحمة - برج برج أيه يا بنتى
- نادرة - البرج بتاع مختار
- رحمة - مين اللى قال أنه برج
- نادرة - مختار
- رحمة - هههههه هما بيقولوا فعلا عليها برج لكن هى حنة عمارة ست ادوار
- نادرة - ست ادوار..أمال أيه برج برج
- رحمة - يمكن بيدلعوها يا ستى
- نادرة - هههههه لكن برضوا مقلتلش أنتى مبسوفة هناك

- رحمة - شوفى أنا أى حثة يكون فيها مختار . أكيد ببقى سعيدة فيها
- نادرة - مختار
- رحمة - أه
- نادرة - مختار الراضى؟
- رحمة - أيوة مالك . مستغربة مش كدا؟
- نادرة - يعنى مكنتش متوقعة
- صوت رسالة فى تليفون نادرة
- رحمة - رسالة . أيوة يا عم..ياترى من مين
- نادرة بأرتباك - طيب عن أذك دقيقة
- (اخذت الموبايل وخرجت
- الرسالة من مختار
- نادرة أنا أسف يا بنت عمى
- عمرى ماهسامح روى ع اللى عملته معاكى
- سامحينى يا بنت عمى
- وأوعدك أنك مش هتشوفى وشى تانى
- يوم والا أثنين هبدأ أجهز ورقى للهجرة
- لأنى مش قادر أورى وشى لحد ولا أحط عينى فى عينك
- أرجوكى سامحينى . مختار
- دخلت الحجرة
- نادرة- أتأخرت عليكى؟
- رحمة - لا أبدا ، ها الرسالة دى من البوى فرند بتاعك
- نادرة - لالا لالا دددى من شركة المحمول باعتين لى
- عرض ما أنتى عارفة زنهم

- رحمة - ممكن كوباية مية يا نادرة
- نادرة - من عنيا يا قمر
- رحمة فتحت الرسائل بسرعة وقرأت الرسالة
- (دخلت نادرة وهي تمسك الموبايل وذو هلت من الموقف
- رحمة - أيه اللي بينك وبين مختار يا نادرة
- نادرة - بيني أنا ومختار؟

- رحمة - أبوة التليفون فى أيدي ورسالته قريتها
- نادرة - وأزاي تسمحى لنفسك تفتحى تليفونى وتتعدى على خصوصياتى
- رحمة - مش عارفة أيه اللي خلانى أعمل كذا لكن شىء
- جوايا خلانى أمسك الموبايل وأقرأ الرسالة يمكن فضول
- منى ويمكن إحساس مكبوت جوايا مش قادرة أقوله لحد
- نادرة - عموما يا ستى أطمنى أنا مفيش بينى وبين
- مختار أى علاقة من أى نوع ولو عايزة أحلفك على
- كتاب الله أنا مستعدة علشان تطمنى قلبك
- رحمة - ربنا يريح قلبك يا بنت عمى أنا أصلى لما شفت
- الرسالة الدنيا ضلعت فى وشى تعرفى يا نادرة ليكوا
- صورة وأنتوا صغيرين لو قولتلك إن مختار ممكن يقعد
- باصص لها بالساعات مش هتصدقى وطبعاً دا شىء
- مأخذتش بالى منه غير بعد
- نادرة - بعد أيه
- رحمة - ب ب بعد ما حبيته وحبه كبير جوايا
- نادرة - يااااه أد كذا بتحبيه يا رحمة

- رحمة - مش عارفة
- نادرة - مش عارفة يعنى أيه؟
- نادرة - أنتى بتناقدى نفسك ليه ؟ ماهو يا أه يا لا
- رحمة - رؤف أول أنسان يقرب منى ويحسسنى بأنوثتى
- ساعات أبقي طيارة فوق السحاب مع كلامه ونظراته
- وساعات أحس أن مش هو ده مختار اللى حبيته وعشت
- معاه أحاسيس جميلة
- نادرة - طيب ويا ترى طلب منك الجواز؟
- رحمة - دايما كل ما أفتح معاه الموضوع ده وشه يتغير
- وأحس أنه أنسان تانى تفتكرى ليه؟
- نادرة - أنا معرفش
- رحمة - طيب ممكن أسئلك سؤال
- نادرة - إسئلى
- رحمة - مختار بيتأسفلك على أيه فى الرسالة و حقيقى
- هو هيسافر؟
- نادرة - أرجوكى تعفينى من الأجابة علشان متطرنيش
- أكذب عليكى أما موضوع السفر دا فأنا معرفش هو
- بيتكلم جد والا لأ لأنى معرفش مختار كويس لأنى
- متعاملتش معاه قبل كدا
- رحمة - طب هو عايز يسافر ليه؟
- نادرة - بقولك أيه تشربى شاي
- رحمة - نادرة أنتى بتهرى من سؤالى مش كدا؟
- نادرة - أرجوكى يا رحمة قفلى ع السيرة دى
- رحمة - نادرة . أنا لو مختار سافر وساب البلد أبقي

ضعت

- نادرة - ضعتى ...ضعتى يعنى أيه ؟ للدرجة دى يا رحمة
، أقدر أعرف نوع العلاقة اللى بينك وبين مختار أيه
بالظبط

- رحمة بأرتباك - ها أأبدا علاقة حب عادية
- نادرة - رحمة . أنا قلبى بيقولى غير كدا
- رحمة - تقصدى أيه
- نادرة - أرتباكك وخوفك من سفره وعدم يقينك بحبه
ليكى ده شىء مش مطمئنى
- رحمة - أنتى مش قولتى أنك هتعمللى شأى
- نادرة - ماشى يا ستى هروح أعمل شأى
(خرجت من الحجرة)

- سمعت صوت صراخ يخرج من حجرة والدتها ...فجرت
هى ورحمة على الصوت .فتحت الباب والنور وجدت أم
سعيد فى عراك مع الوسادة ظنا منها أنها زوجها
فتضربه بالحذاء

- نادرة - أيه يا ماما فيه أيه
- زينات -مش عارفة يا بنتى . أنا بعد مانمت قمت على
ضربها فى المخذة وهى بتقولها ، والله لمعلمك الأدب يا
وانل أنا تبص لغيرى إن ما ربيتك. وزى مانتى شايقة كدا
- نادرة - خالتى أم سعيد... أم سعيد فوقى فوقى
- أم سعيد - أيه فيه أيه هو الواحد مايعرفش ينام فى بيت
أم صلاح النحس ده . فيه أيه يا ست نادرة هو أنتى
قلقانى بالنهار وقلقانى بالليل

- مش كفاية ركبي اللي سابت من اللي حصل بينك وبين مختار ..كمان مش عارفة أنا
- رحمة - هو أيه اللي حصل بينك وبين مختار يا نادرة
- نادرة - ولا حاجة يا بنت عمى دى خالتى أم سعيد متلوها فى النوم
- أم سعيد - لا أنا صاحبة هو أنتى هتوهينى مش مختار كان هنا وخرج بفضيحة
- رحمة - فضيحة ..فضيحة أيه
- أم سعيد - أى نعم فضيحة
- نادرة - يا خالتى أم سعيد ربنا مايجبش فضايح . أبوس أيديك يا تنامى يا تنزلى تنامى فى شقتك
- أم سعيد - أنتى بتطردينى يا نادرة ..أنتى أتعلمتى من خطيبك هذا الفرع الشهم طويل الباع . طيب هو طردنى علشان كان زهقان من اللي عرفه عن العاملة السودا اللي عملها أبن عمك ..إنما أنتى زعلانة ليه ؟ أنتى مكسوفة من الأمور دى اللي أنتى تبقى مين يا شابة ...هو فيه حد يزور حد فى وقت زى ده برضوا هى الدنيا جرى فيها أيه جتكم البلا عيلة هم
- رحمة - أنتى بتقولى أيه يا ست أنتى . أيه حد ده أنا حد ، ما تحسنى ألفاظك شوية أنا أبقي بنت عمها
- أم سعيد - يا شوم ولاد العم يا حبيبتي طب ماهو مختار أبن عمها . خدت منه أيه غير الفضيحة والجرسه
- رحمة - ماتفهمونى فيه أيه يا جماعة وأييه اللي حصل من مختار بالظبط؟ إتكلمى يا نادرة وألا والله لأنزل

- دلوقتى حالا وأروح له البيت وأسأله عن اللي حصل
- أم سعيد - يا لهوى ع البجاجة شوقتى ونعم أبناء العم
أما أقوم أنزل أنتيل أنام جنب وائل الكئيب رغم أنه
جوزى لكنه مش شبهى خالص والله أنا عنيا حلوين وهو
عنيه حولين أنا شعرى طويل وهو أقرع وحزين . أنا
أحب أتكلم وأتبجح وهو صامت زى جالوس الطين ولما
أفك نفسى بالكلام معاه يقولى أذكرى الله أحسن يا قليلة
الدين
 - رحمة - أيه اللي جاب وائل فى كلامنا أنتى توهتينا .
وأيه اللي جاب سيرة حلاوتك والا غيره أيه الست
الغريبة دى يا نادرة ، أحنا فى أيه والا أيه . ياساتر
 - أم سعيد - الله الله الله بالراحة علينا شوية يا شابة هو
الواحد مايفضفضش والا أيه . وبعدين أنتى جاية
تواسيها دلوقتى هى دى الأخوة ال على رأى المثل يا
معزى بعد سنة يا مجدد الأحزان
 - رحمة - أوف نادرة أنا مش قادرة أستحمل ، يا ساتر
 - نادرة - طيب كملى نومك ياخالتي أم سعيد وأنا هطفى
النور و أمن ع الباب وهدخل أنام
 - أم سعيد - خ خ خ خ خ
 - رحمة - يا خرابى دى الولية نامت وشخرت فى ثانية
 - نادرة - هههههه هى طيبة ماتاخدش على كلامها
 - رحمة - هههههه طيب يالا بينا ننام أحسن أنا اللي
دماغى ركب ومبقيتش مركزة شخصية غريبة أول مرة
أشوفها يالا بينا

- نادرة - أفضلى الكوفرتة أهى وتصبحى على خير
- رحمة - وأنتى من أهله
- رحمة - نادرة
- نادرة - أيوة يا حبيبتي أمرى
- رحمة - انا كنت ...كنت عايزة اعرف حكايتك مع مختار أرجوكى لو بتحبينى قوليلى
- نادرة - هاقولك يا رحمة .. هاقولك علشان تخافى على روحك من مختار ، شوفى يا ستى
- (نادرة تحكى ورحمة تضع يدها على قلبها ودموعها فوق خدودها وبعد ماأنتهت الحكاية
- رحمة - أنتى بتقولى أيه يا نادرة
- نادرة - أنا أسفة يارحمة . بس هى دى الحقيقة . وأنا مكذبتش عليكى فى حرف واحد ويعلم ربنا أنا ماكنتش هقولك لكن لما قولتيلى أن فيه عاطفة بتربطك بمختار وبعد لت وعجن أم سعيد كمان
- (رحمة تبكى بكاء شديد)
- نادرة - الله الله فيه أيه يا رحمة مالك؟ أنا أسفة أهدى يا حبيبتي فيه أيه يا رحمة؟
- رحمة - فيه أن معنى كلامك ده بياكدلى على أن كل كلمة قالهاك حقيقة وأنه ناوى يسافر ويبعد عنى
- نادرة - أهدى يا رحمة أرجوكى أنتى خايفة ليسيبك ويبعد عنك أنا عارفة
- رحمة - يا ريت لو عليا أنا ماكنش يهمنى يا نادرة أنا مش مهم

- نادرة - أمال هو فيه حد تانى يهمه وجود مختار فى البلد
 - رحمة - أيوة يا نادرة وبشدة
 - نادرة - مين دا ابننا اللي فى بطنى اهى اهى اهى
- (نادرة فى ذهول)

- نادرة - أنتى بتخرفى تقولى أيه
- رحمة - أنا مش بخرف يا نادرة هى دى الحقيقة لما رجع مختار من السفر جه زارنا وجاب لنا هدايا كتير وكان ظريف ومهذب جدا وحكى لنا ع البرج اللي أشتراه ووصية والده له أنه يلم شمل العيلة وعرض علينا أننا نروح نعيش ويلم شمل العيلة حسب وصية عمى محمود ..أخواتى فرحوا ورحبوا بالفكرة خصوصا أن شقتنا زى ما أنتى عارفة ضيقة وف حته مش ولا بد قالوا أنهم هيقوا مطمنين عليا وهما فى شغلهم أكثر لأن العيلة كلها هتبقى فى مكان واحد وكلنا هنخلى بالنا من بعض ولما روحنا نفرش الشقة لقيناها مجرد عمارة ست أدوار. ساعتها أخواتى برضوا قالو وماله أحسن من شقتنا . وأبتدينا نفرش فى الشقة وأبتدى مختار يقرب منى ويشاغلى حبة حبة أعترف لى بحبه وفضل يستعطفنى ويقولى أنه طول عمره متغرب ووحيد وعمره ماعرف معنى الحب اللا لما شافنى ولما لقانى خائفة منه عرض عليا أننا نتجوز ولما لقيته جد. وافقت وفى يوم طلب منى أطلعه كوباية شاي لأنه عنده صداع وتعبان وقلى كمان عايز ياخذ رأى فى لون الريسبشن على أساس أن دى شقتنا وهو بيظبطها ...فرحت وكنت عاملة كيك طلعتة

جنب الشأى ولما طلعت لقيته متغير ومش طبيعى زى ما يكون شارب حاجة . الحقيقة خفت منه ..حطيت الشأى وجريت ع الباب بسرعة لكنه لحقتى وشدنى وأنا حاولت أفلت من تحت أيده لكن ماقدرتش حاولت أصرخ كتم نفسى مقدرتش عليه نهائى ولما لقانى ببكى والطم خدودى طمنى وقالى ، أنتى مهما يكون بنت عمى وأنه عند وعده هيتجوزنى بس لما يقدر يفتح والدته ويقنعها لأنها عايزة تجوزه صفاء بنت خالته وفضل يضحك عليا بكلامه المعسول لحد ما ف يوم حسيت أنى مش طبيعية فعملت تحليل فى المعمل ولقيته موجب وأن المشكلة كبرت و الموضوع بقى يا حياه يا موت ولما حكيت له ع اللى حصل وقولتله أعمل أي شهرين بالكثير وأنفضح وأخواتى لو عرفوا هيقتلونى .. وأنا لازم نتجوز بأسرع وقت فضل يتهرب زى التعبان أمسك راسه يطلعلى ديله أمسك ديله يطلعلى راسه لحد ماهدته أنى هقول لولدته أننا بنحب بعض. وهكلمها توافق على جوازنا وتسبب لى مختار لأنه بيحبنى وبجبه لقيته اتغير وزى ميكون اتحول ومسكنى من شعرى وهددنى وقالى لو ده حصل هيقول لأخواتى ان انا بتبلى عليه لكن لو سكت وهديت هو هيجلهاخفت منه ولما جينا للجد لقيتها مجرد ورقة عرفى..وحلف لى أنه مش هيتخلى عنى بس لما مشروع مصنع الأحذية يشتغل علشان يقدر يطلبنى من أخواتى وهو واقف على رجليه ..وأدينى صابرة أما أشوف أيه آخرتها ولما لقيت نفسى مش عارفة أوصل

لحل معاه ومش عارفة أعمل أيه.. جيت لك علشان أبات
 معاكى يومين يمكن لسانى يقدر يتكلم وأحكىلك اللى أنا
 فيه . وأدينى لقيته عامل مصيبة أكبر للأسف مختار
 مبيحبنيش مختار بيحب نفسه وبس وعموما أنا دلوقتى
 لا عايزة حبه ولا عايزاه أنا عايزة الستر الستر وبس
 عايزة حل لمشكلتى...نادرة أنا فكرت أنى أموت نفسى
 وأخلص من حياتى وأرحم أخواتى من عارى اهى اهى
 اهى اهى

- نادرة - أستغفرى الله وبلاش كفر...الجبان الندل يعمل
- كدا فى أقرب الناس . مختار دا لازم ياخذ درس يعلمه
- الأدب ويخليه يفكر ألف مرة قبل ما يعمل حاجة زى دى
- رحمة - بس أزاي هو فيه أكثر من اللى أتعلم فيا
- نادرة - أكيد هيكون فيه أكثر وأكثر
- يا سلام لو رؤف يرد عليا كنت قولتله وهو كان ينصحنى
- أعمل أيه
- رحمة - صحيح أنتى أتخطبتى له
- نادرة - يا دوب الموضوع لسة ف أوله وجه موضوع
- مختار ومقدرتش أقوله لكنه عرف زى ما أنتى عرفتى
- كدا من خالتى أم سعيد وزعل أنى خبيت عليه ومبيردش
- عليا وأنا سايباه لما يهدى هو كمان
- رحمة - ياااه دا زعله وحش أوى
- نادرة - أوى أوى
- رحمة - بس تعرفى ربنا يهنيكم ببعض واضح أنه بيحبك
- أوى وأنتى كمان لكن قوليلى بصرف النظر أنك زعلتى

- من منظر مختار وهو داخل عليكى بيه كدا أكيد كان
جواكى أحساس تانى من ناحية رؤف
- نادرة - ماخبيش عليكى كبر فى نظرى ورفع راسى فى
الحتة وتأكدت أنه هو دا الراجل اللى مايخفش من حد
مادام على حق وأنه بيحبنى وأثبت لى أن النظر عند ناس
كثير بيتمتعوا بيه لكن البصيرة معدومة عندهم والدليل
على كدا مختار واللى بيعملوا انا بجد سعيدة من قلبى انى
ربنا وفقتى انا ورؤف لبعض
- رحمة - الله الله ع الحب الله على كدا بقالكم كثير بتحبوا
بعض
- نادرة - هههههه
- رحمة - بتضحكى على أياه
- نادرة - أصلك مش هتصدقى
- رحمة - أياه بقى اللى مش هصدقه
- نادرة - أنا ورؤف عرفنا بعض وحبينا بعض وصارحنا
بعض بحبنا فى يوم واحد يمكن فى أقل من يوم
- رحمة - ياااه حبيتوا بعض ف يوم وجه من الصعيد
وعمل علشانك ده كله
- نادرة - تخيلى
- رحمة - الله أكبر فى عنيا ربنا يسعدكم ويهنيكم أنتى
أنسانة محترمة وحنينة وقلبك طيب وأبيض وتستاهلى
يحبك أكثر من كدا يا نادرة
- نادرة - ربنا يخليكى يا حبيبتي...أنا هدخل أصلى العشا
وأدعى ربنا يفك أزمك على خير

- رحمة - تسلميلي يا بنت عمى
- (خرجت نادرة تتوضأ وتصلى العشاء ورحمة بدلت
ملابسها ودموعها فوق خدها وفجأة دق جرس الهاتف
- رحمة - ألو...مختار..الله يسلمك .. أخيرا أفكرت أن
ليك زوجة تكلمها...أتكلم يا مختار أنا سمعك عايز تقول
أيه..أسف يا أيه يا مراتى أنا مراتك يا مختار ..وحبيبك
كمان لالالالا أنا مش مصدقة اللي بسمع أيوة مش
مصدقة خايفة ليكون دا مجرد كلام زى اللي بتضحك عليا
بيه كل مرة ..أنت بتقسم بالله يا مختار أنا.. أنا ..أنا كل
الحب ده ليا أنا ..أزاي هتصلحها أزاي بورق عرفى غير
اللى سهيتنى وأخذته من شنطتى وخبيته عموما أنا معايا
صورة منه...يوم الخميس الجاى ده كلمت مين أنس
وراضى أنت بتتكلم جد ..يا حبيبى يا مختار ربنا يخليك
ليا وميحرمنيش منك أبدا أنت ماتعرفش أنت زحت من
على قلبى هم كبير أد أيه اهى اهى اهى اهى بغيط من
فرحتى يا مختار مش مصدقة نفسى خلاص يوم الخميس
يا رب يا مختار يا رب الحمدلله أنت متعرفش أنت
ريحتنى وأسعدتنى أد أيه وأنا أوعدك أنى أكون زوجة
مطبعة ومايهمنيش فى الدنيا غير سعادتك وسعادة أولادنا
...مع السلامة يا ...يا حبيبى وروحى كمان هههههه
بعدين بقى مينفعش فى التليفون بعد يوم الخميس وعليك
خير . سلام الحمد لله أحمدك وأشكر فضلك يا رب
جرس التليفون
- رحمة - ألو أيوة يا أنس ..الحمدلله يا حبيبى أيه لحقت

وحشتكوا بتتصلوا بيا ...أيه.. خبرخلو خير دا لازم خبر
مهم اللي يخليكم تتصلوا بيا فى وقت متأخر زى ده مين
؟ مختار ابن عمى ..طلب أيدى أنا أمتى ؟ من نص ساعة
متأخر كدا طيب وأنتوا قولتوله أيه؟ رحبتوا كدا من غير
ما تاخذوا رأى ..للدرجة دى رأى ميهمكوش طيب ما
أنتوا وافقتوا من غير ماتاخذوا رأى أهو لالا مش هفكر
مش أنتوا موافقين يا أخويا عموما دا ابن عمى وأنتوا
أخواتى وهتعملولى الصالح
(دخلت عليها نادرة وهى تتكلم)
شاورت لها بسعادة على المكالمة
- رحمة - ماشى يا أنس أتعيشيت أنت وراضى والا
لوصتوا من غيرى...ههههه بتتدربوا على غيابى ما أنا
هبقى معاكوا فى نفس العمارة هو أنا هسيبكم وراكو
وراكو مع السلامة
- نادرة - اللي سمعتوا دا مضبوط
أمسكت نادرة من يديها ولفت بها الحجرة
- رحمة - نادرة أنا فرحانة فرحانة مختار طلب
أيدى من أخواتى وهنكتب كتابنا يوم الخميس
- نادرة - يا حبيبتي الحمدلله ربنا يسعد قلبك يا رحمة
- رحمة - بركة دعواتك وبركة اللي عمله رؤف فيه يظهر
أنه عقله وعلمه الأدب بصحيح الحمدلله أحمدك وأشكر
فضلك يا رب
(أم سعيد قامت لتشرب وجدت حجرة نادرة مضيئة والبنات
فرحانين يضحكون

- أم سعيد - هههههههه ماتضحكونى معاكوا يا بنات
أخص عليكم بتضحكوا لوحدكم
- نادرة - خالتى أم سعيد أيه اللى مصحيكى
- أم سعيد - لقيت ريقى ناشف قلت أقوم اشرب لقيتكم
مبسوطين قلت أما أشوفكم مبسوطين ليه فرحونى معاكوا
- رحمة - يا ست أم سعيد أحنا من سنك
- أم سعيد - يعنى أياه مش فاهمة
- رحمة - يعنى أنتى جيل وأحنا جيل تانى أياه اللى يخليكى
تنحشرى فى كلامنا وتضحكى معنا
- أم سعيد - ليه هو أنتى شايفانى من أيام توت عنخ آمون
طب دا أنا صغيرة غيرش الههم...وبعدين أنتى يا بت أنتى
مستقصدانى ليه ومنفسنة منى
- رحمة - أياه من أياه منفسة منك وهنفسن منك ليه يا قمر
- أم سعيد - أهو أنتى اللى أعترفتى أهو قمر أنا قمر ببقى
منفسنة والا لا
- رحمة - أياه دا يا نادرة الست دى مش معقولة مش
طبيعية أبدا
- أم سعيد - مش طبيعية ليه شايفانى نافخة والا شدة
الحمد لله طبيعية مية ف المية
- رحمة - لالا لالا لالا نادرة أنا هنام خلاص مش قادرة
أستحمل
- أم سعيد - أحسن حاجة عملتها نامى يا ختى أتمنالكَ
كوابيس كنيبة
- رحمة - أنا مش هرد عليكى علشان أنتى ست كبيرة

- أم سعيد - ست أيه كبيرة طبعاً يا حبيبتي ما أنا صحيح كبيرة فى المقام يا منفسنه...يا منفسنة
- (خرجت ام سعيد من الحجرة وذهبت إلى المطبخ)
- رحمة - أيه يا نادرة الست دى أنتوا مستحملين رزالتها دى أزاي
- نادرة - جارتنا من زمان وعشرة عمر أتعودنا عليها
- أم سعيد - ندورة يا ندورة
- نادرة - أيوة يا خالتي
- أم سعيد - أنا نازلة لعك وائل وأخذت كيس السفندى اللى جوة أحسن جالى فى الحلم وقالى . أنا ريقى ناشف يا يوسف أفندى يمكن يكون بيموت ونفسه فى السفندى
- نادرة - بعد الشر على عمى وائل خديه بالهنا والشفاف
- أم سعيد - يخليكى يا ندورة يا أم نفس حلوة مش منفسنة زى ناس
- عن أذنك تعالى أقفلى ورايا الباب
- (فى الصعيد رؤف فبحجرتة مع نفسه)
- دخلت عليه مريم
- مريم - صباح الفل على عيونك يا أغلى باشمهندس فى الدنيا
- رؤف - صباح الخير يا مريم
- مريم - أيه يا حبيبى أنت قاعد لوحذك كدا ليه يا أوفاف
- رؤف - لا أبدا عادى يعنى صليت الفجر وقلت أشم الهوا النقى بدرى
- مريم - مالك يا رؤف

- رؤف - مفيش يا مريم
- مريم - طيب كلمت نادرة
- رؤف - ماكلمتهاش النهاردة الشبكة واجعة
- مريم - أزاى ده طب دانا لسة متكلمة كانت الشبكة موجوده ورينى موبايلك كدا . الله طب ماهى الشبكة كاملة أهى تحب أطلبهاك
- رؤف - لا متتعبيش نفسك أنا هطلبها
- مريم - كدا ماشى يا باشا عن أدنك
- رؤف يستمع لأغنية يا مسهرنى
- أخذ التليفون وضرب رقم واحد إتصال سريع المسجل بأسم نادرة ووضع السماعة على التليفون
- (يا ناسينى وأنت على بالى وخيالك ميفارق عينى ريحنى وأعطف على حالى وأرحمنى من كتر ظنونى لا عنيا بيهواها النوم ولا بخطر على بالك يوم تسأل عنى يا مسهرنى)
- نادرة سمعت الأغنية وطارت من الفرحة أغلقت ورننت على رؤف
- نادرة - سامحتك سامحتك سامحتك كثير سامحتك
- سامحتك بقلبي الكبير ومش غصب عنى ولا ضعف منى ولكن لأنى بحب بضمير سامحتك كثير
- أبتسم رؤف وقلبه أمتلىء بهجة وسعادة
- نادرة مبسوطة وسعيدة
- رحمة - أيه يا نادرة مالك مبسوطة كدا
- نادرة - يظهر أن رؤف قلبه بدأ يحن يا حبيبى يا رؤف
- مش هاين عليه يزعلنى

- رحمة - كدا طب كويس يا رب يتم فرحتنا أنا وأنتى يا نادرة ويسعد كل البنات
- نادرة - يا رب يا رحمة يا رب
- يالا نلحق ننام ليننا ساعتين
- (فى منزل مختار)
- والدة مختار صلت الفجر ودخلت تطل على مختار وجدته جالس على كرسى يصلى . أستعجبت
- أم مختار - أيه دا يا مختار أول مرة أشوفك بتصلى من يوم ما رجعت من المانيا . حرما يا حبيبى
- مختار - جمعا أن شاء الله يا أمى
- أم مختار - ها مش هتقولى أيه اللى عمل فيك كدا
- مختار - لازم أقولك يا أمى . شوفى يا ستى
- بعد ما حكى
- نظرت له أمه بذهول وغضب ودون أن تشعر ضربته بالقلم على وجهه
- أم مختار - يا ندل يا قدر بقى ابن محمود الراضى يستحل أعراض الناس بالشكل دا..دا اللى عمله رؤف الراضى فيك شوية دا كويس اللى مقتلكش أخص عليك هتروح فين من ربنا هتهرب فين من ضميرك
- ليه كدا يابنى بقى تسبب شيطانك يغلبك بالشكل دا أنا لازم أروح لنادرة أراضيه وأعتذر لها ع اللى حصل
- مختار - ماما أيه رأيك فى رحمة
- أم مختار - مالها رحمة
- مختار - عايز أتجوزها

- أم مختار - تفتكر رحمة هتوافق بعد اللى حصل
- مختار - أيوة أنا متأكد أنها موافقة لأنى طلبت أيدها ف التليفون وكلمت أخوتها ووافقوا هما كمان
- أم مختار - عموما أنا عمرى ما أقدر أضغط عليك تتجوز مين وماتتجوزش مين أنت راجل وتعرف راحتك مع مين
- والحقيقة رحمة بنت كويسة وطيبة وبنت حلال وأنا شخصيا برتاح لها وأنت هينوبك فيها ثواب لأنها بنت يتيمة وغير كذا بنت عمك لحمك ودمك
- (مختار قبل يد والدته وقال لها)
- مختار - سامحيني يا أمى لو كنت ضايقتك بموضوع نادرة لكن أنا عارف أنك لو معرفتيش منى هتعرفى من أى حد تاتى ولأنى نويت بينى وبين ربنا أبتدى صفحة جديدة وأحاول أصلح غلطى وأحاول ماعملش حاجة تغضبه
- أم مختار - ربنا يهديك يا أبنى ويثبتك على حبه ويزيدك إيمان كمان وكمان عن أذنك يا بنى
- مختار - أتفضلى يا أمى
- (فى منزل نادرة جرس هاتف نادرة يدق)
- رحمة - مين اللى بيرن عليكى يا نادرة بدرى كدا
- نادرة - مش عارفة رقم غريب
- رحمة - طيب ردى
- نادرة - ألو سلاموا عليكم مين معايا
- مين ! اهلا اهلا يا طنط أهلا يا مرات عمى . أرى حضرتك

- أنا تمام الحمد لله
- محرجة منى أنا..طيب ليه..لا لا متشيليش نفسك ذنب يا
- مرات عمى أحنا بنى أدمين مش ملايكة . وأنا بحاول
- أنسى ...لا أنا مش من طبعى أشيل من حد ومختار أبني
- عمى وف مقام أخويا ..ماهو أكيد شيطان
- ربنا يهديه لنفسه ..عجبك يعنى مزعلتيش من اللي عمله
- فى مختار
- صحيح يا طنط علمه الأدب ؟ أزاى أقصد أياه اللي خلى
- حضرتك تقولى كدا...عرفتى من مين..من مختار نفسه
- هو اللي حكى لك ليه هو مكنش بيصلى ...وعدك يلتزم
- ..سر سر أياه ..والله رحمة ما شاء الله يا زين ما أختار
- رحمة بنت عمنا طيبة وبنت حلال ...ربنا يوفقهم ..أبني
- الحلال ..أبني الحلال هو اللي رجع مختار
- لعقله...ههههههه أه يا طنط رؤف يبقى خطيبى ...لا
- متوصلش للقتل دا مهما كان ولاد عم برضوا ..الله يبارك
- فيكى يا طنط ..عايزة سلامتك تسلمى يا مرات عمى
- ..وعليكم السلام
- نادرة - أبشرى يا رحمة . مفاجأة
- رحمة - أياه يا نادرة مفاجأة أياه
- نادرة - مختار كلم مامته فى موضوع جوازكم ووافقت
- رحمة - أياه أنتى بتقولى أياه مش معقول أنا مش مصدقة
- بتتكلمى جد يا نادرة
- نادرة - أه والله يا رحمة طنط لسة كانت بتقولى دلوقتى
- فى التلفون

- رحمة - نادرة أقرصيني يا نادرة أنا بحلم والا دى حقيقة
- نادرة - حقيقة يا حبيبتي ربنا يسعدك
- رحمة - طيب أنا هقوم ألبس وأمشى بقى
- نادرة - الله هو أنتى مش قولتيلى أنك هتفعدى معايا يومين
- رحمة - معلى بقى يا نادرة عايزة أروح أشوف الدنيا عاملة أيه فى البرج وبعدين أحسن مامة مختار تيجى تكلمنى فى موضوع الجواز تلاقينى فى البيت مش تلاقينى بايئة برة ...
- نادرة - طيب ثوانى نفطر وبعدين روحى
- رحمة - لالا لالا أنا شبعانة شبعانة.. عن أذنك أشوف وشك بخير سلمى على طنط مش عايزة أقلق منامها..وسلميلى ع الست الخنيقة دى اللى أسمها ام سيد
- نادرة - هههه أم سعيد
- رحمة - أم سعيد . أم سيد المهم سلمى عليها أنا أصلى من فرحتى مش عايزة حد يزعل منى . سلام يا ندورة
- نادرة - ههههه مع السلامة يا بنت عمى
- زينات - نادرة يا نادرة
- نادرة - أيوة يا أمى . صباح الخير
- زينات - صباح النور على عنيكى يا حبيبتي . أنتى كنتى مشغولة فى حاجة
- نادرة - لا أبدا أنا كنت بجهز فطار
- زينات - طيب يا حبيبتي وأنتى واقفة أعمليلى كوباية

نغناع

- نادرة - طيب مش لما تفطرى الأول
- زينات - لا أصلى حاسة بشوية مغص وصداع
- نادرة - يا خبر يا ماما من أمتى
- زينات - ماتتخضيش كدا دى حاجة بسيطة
- نادرة - لالا كدا مش هينفع أبدا أحنأ لازم نروح نكشف
- زينات - طب بس أعملى اللى قُلتك عليه وأنا هبقى كويسة أن شاء الله
- نادرة - حاضر يا أمى
- زينات - هى الساعة كام دلوقتى
- نادرة - عشرة وربع
- زينات - ياااه وأنا نمت لحد دلوقتى
- نادرة - نوم العواف يا حبيبتى
- زينات - أنا أصلى ماعرفتش أنام من شخير أم سعيد أعوذ بالله
- نادرة - ههههه دى كانت ليلتها ليلة
- زينات - طول الليل تخبط وترزع وتتكلم وهى نائمة لما ربت لى الخفيف
- نادرة - هههههه بس والله دمها زى العسل
- زينات - والله أنتى اللى عسل يا حبيبتى...ها رؤف ماكلمكيش
- نادرة - رؤف لا ماكلمنيش بس رن عليه
- زينات - رن عليكى أزاى وماكلمكيش
- نادرة - يعنى الدنيا عنده لسة بتندع بكرة تمطر هههههه

- زينات - هههههه على العموم معنى أنه رن يبقى مش
قادر على زعلك ودا شيء كويس ...أما رؤف دا راجل
بصحيح وهو دا اللي لو مت هبقى مطمئة عليكى وأنتى
معاه

- نادرة - بعد الشر عليكى يا حبيبتى ربنا يخليكى ليا
وتشيلى ولادى وولاد ولادى كمان
- زينات - إن شالله يارب أنا مش طالبة من ربنا غير أنى
أشيل ولادك على إيديا دول
- نادرة - يا حبيبتى يا ماما ربنا ميحرمينش منك يا ست
الكل

طرق على الباب

- زينات - با ترى مين اللي جاى لنا بدرى كدا
- نادرة - هيكون مين غير خالتى أم سعيد
- أم سعيد - صباح الخير يا ندورة
- نادرة - صباح الخير يا خالتى إتفضللى
- أم سعيد - طيب خدى
- نادرة - أيه دا
- أم سعيد - قشر السفندى اللي خدته منك أهو
- نادرة - قشر سفندى طب وهاخدوا أعمل بيه أيه يوه
يعنى الحق عليا أنا قلت أنك عندك زلعة مش ويمكن
تحبى تخليليه فيها
- نادرة - لا لا لا أخاف أحسن يبوظ الجبنة
- أم سعيد - إهى طيب زى ما تحبى بس بقولك أيه خدى
أرمى القشر فى الزباله وهاتى لى حنتين جبنة من الزلعة

- نادرة - خلى علبتك وأنا هجيبك حتتين فى علبة صغيرة
بدل ما توسخيهها
- أم سعيد - لا هى دى يا دوب على أد الحتتين اللى أنا
عايزاهم
- نادرة - دا اللى فى الزلعة كله ميملاش نصها
- أم سعيد - طيب خلاص اللى تجيبه يا أميرة يا ذوق أنا
هدخل أصبح على أمك على ماتجهزيها ...الا من الحق
إنتى فطرتى
- نادرة - لا لسة بعمل فطار
- أم سعيد - كدا دا أنا حماتى كانت بتموت فىا هههههه
- صباح الخير يا زينات
- زينات - صباح الخير يا أم سعيد
- أم سعيد - مالك يا أختى صفرا كدا ليه أنتى تعبانة والا
أيه
- زينات - لا أبدا عندى شوية مغص وصداع
- أم سعيد - أنا عارفة من أيه
- زينات - من أيه
- أم سعيد - من الضيوف البايخة اللى بيجوا يقتلوا عليكى
متعرفيش برضوا تنامى كويس وفيه حد غريب بايت
معاكى فى الشقة أسألينى أنا
- نادرة - النعناع يا ست زينات
- زينات - مانحرمش منك أبدا يا بنتى يا رب
- أم سعيد - ماتفتحيننا التلفزيون ده يا ندورة نتفرج على
الحاج متولى خلىنا نشوف الموكوس أبو عين زايغة دا

هيتجوز الرابعة والا لا رجالة ملهاش أمان . لا ومن
لؤمه مفهمهم أنه هيتجوز لمصلحتهم ههههه ال
مصلحتهم ال

(فتحت نادرة التلفزيون وجدت إعلان عن لحوم ومنتجات
ألبان الصاحي وصور كثيرة للمعالف

- نادرة - أفرجى يا ماما أنور الصاحي بيعلن عن منتجاته
- زينات - والله والنملة بقالها صوت ياولاد
- أم سعيد - أنور الصاحي دا مش هو الكلاف اللي كان
شغال عند الحاج...بسم الله ما شاء الله بقى حاجة عليوى
أوى الله يرحم لما كان كلاف بينضف تحت البهايم اللي
قانيها الحاج . شوفى دلوقتى بقى أيه دانا فاكرا الحاج
قبل ما يموت بيوم يوم كنت جاية أخذ مخرطة الملوخية
وأنتى كنتى لسة راجعة من السوق يا زينات كان أنور دا
مقابلنى ع السلم بيكلم نفسه ويقول أنا أتهدد يا حسان
والله ما أنا معديهاك وكان زعلان أوى يظهر أن الحاج
كان مديهم له صح طلعت أخذ المخرطة لقيت الحاج
واقف يتأمل فى صورة الحاجة وقعد ينفض فيها يظهر يا
عيني أفكرها يومها ومعداش عليه يومين إلا وحصلها
كان بيتأمل فيها زى اللي كان بيقولها الله يرحمك ياما يا
حافضة سرى فى حياتك ومماتك وأول ما شافنى إتكسف
منى يا عيني وقام معلقها قولتله تعيش و تفتكرها يا حاج
حسان العمر الطويل لك

- نادرة - طب يالا كلى يا أم سعيد علشان تيجى معايا نودى
ماما للدكتور

- أم سعيد - من عنيا يا حبيبتى
(فى حجرة الطبيب)
- بعد ما أنتهى الطبيب من الكشف على أم نادرة
- نادرة - خير يا دكتور
- الطبيب - خير إن شاء الله والدتك محتاجة راحة تامة
- أم سعيد - ماهى فعلا مرتاحة دى مابتقومش من سريرها...مفيش لها حل يخليها تمشى تانى على رجليها
- الطبيب - والله العلم كل يوم فى حال .. وحالة والدتك دى لها عملية فى العمود الفقرى تعملها وإن شاء الله خير
- نادرة - طيب يا ريت يا دكتور تعملها لها
- الطبيب - أه بس دى مكلفة جدا يا بنتى
- نادرة - أنا مستعدة لأى مبلغ من جنيه لمليون يا دكتور إن شالله
- الطبيب - خلاص لو حبيتى أحجزها تحت رعايتى فى المستشفى الخاص بتاعى
- ولو أنتى مستعدة يبقى نبدأ فى التحاليل والأشعة من النهاردة
- نادرة - وأنا ماعنديش مانع
- الطبيب - خلاص على خيرة الله
- أم سعيد - يالهاوى يا ندورة أنتى بعقلك
- نادرة - دول عشر الاف عربون والباقي بعد أما أشوف والدتى ماشية على رجليها
- الطبيب - وهو كذلك
- أم سعيد - يخرب بيتك أنتى جبتى الفلوس دى كلها منين

- نادرة - فلوسى اللى سبهالى والدى يا أم سعيد
- (تم حجز زينات فى المشفى وعادت نادرة للمنزل وأرتمت فوق سريرها وهى تبكى
- طرق على الباب
- نادرة - يا ترى مين

- ذهبت نادرة تفتح الباب
- أم مهران - السلام عليكمكيفك يا نادرة يا بتى
- نادرة - عليكم السلام أهلا أهلا يا مرات عمى أهلا أهلا
- يا عمى يا دى النور .. أنا مش مصدقة نفسى أتفضلوا
- أم مهران - يزيد فضلك يا بتى خدى يد رؤف واجف برة
- نادرة - رؤف
- عصران - أيوة يا بتى مالك واجفة مبجلجة كدا ليه
- نادرة - لالالا أبدا يا عمى أتفضل حضرتك وأنا هاخذ
- بأيده إتفضل يا رؤف هات أيديك
- رؤف - هاتى أنتى يدك أما أبوسها... وحشتينى
- نادرة - رؤف .. ماتحرجنيش قدام أمك وأبوك
- رؤف - إكده ماشى يا ستى كلها أيام وكله يبجى عادى
- نادرة - إتفضل
- نادرة - يا أهلا يا عمى يا مرحب يا مرات عمى أيه
- المفاجأة الحلوة دى
- أم مهران - عشتى يا بتى أمال فىن الست والدتك
- نادرة - والدتى ...والدتى أه أه
- أم مهران - أيه يا بتى مالك خزيانة ليه إكده

- نادرة - والدتي فى المستشفى
- أم مهران - واه مستشفى مستشفى ليه لا جدر الله
- نادرة - لا أبدا أصل عندها مشكلة فى فقرات ضهرها
- والدكتور قال أن لازم لها عملية وبعدها تمشى كويس
- وتعيش حياتها عادى
- أم مهران - طب وماله يا بتى ربنا خلع الطب والدوا
- عصران - ها وعملت العملية والا لسة
- نادرة - لا دا لسة محجوزة من ساعة واحدة . أنا لسة
- جاية من المستشفى والدكتور هيعملها الفحوصات
- والتحاليل اللازمة وبعدين يحدد ميعاد العملية
- رؤف - مجولتليش ليه يا نادرة كنت جيت وجفت معاكى
- بدل ما تبجى لوحذك
- نادرة - والله يا رؤف اللي حصل ده فجأة هي تعبت
- النهاردة الصبح ووديتها للدكتور وقرر العملية يعنى
- الوقت ضيق مفيش فرصة أقول
- أم مهران - لا ألف سلامة عليها يا بتى إكده يا رؤف
- جولتلك نخبرهم بالتلفون الأول . تجولى لا بدى أعملها
- مفاجأة لنادرة طب أدى أحنا ملجيناك الست أم نادرة أها
- نادرة - ليه هو فيه حاجة يا مرات عمى؟
- أم مهران - أبدا يا بتى أحنا كنا جايين نطلب يدك رسمى
- من الحاجة .. وادى أحنا لجيناها بعافية وهنخزى نفتح
- معاها الموضوع فى الظروف الواعرة دى
- رؤف - لا واعرة ولا حاجة أنا مصمم أتمم الموضوع
- فى التوجيت ده بالذات لأنى مش هجدر أسيب نادرة

- لوحدها فى الظروف دى
- عصران - طب والعمل يا والدى
 - رؤف - لازم نروح نزور ماما الحاجة ونتمم اللى جايبين
علشانه
 - نادرة - رؤف أنت بتقول أيه
 - رؤف - بجول اللى سمعته..واللى سمعته كلكم
 - أم مهران - كيف دا يا ولدى
 - رؤف - زى الناس يا أمى...نادرة بتجول أن ماما
الحاجة توها محجوزة فى المستشفى من ساعة. أحنا
نروح نزورها ونفتح معاها الموضوع ونتفج و نستأذن
الدكتور ناخدها ونوصل لأجرب مآذون ونكتب كتابنا
ونرجعها تانى للمستشفى ولو مش جادرة أجيب لها
المآذون لحد السرير المهم نتمم كتب الكتاب علشان أجدر
أبيت مع نادرة وأحميها مسيبتهاش لحالها إكده يا أمى
والا أيه يا حاج
 - عصران - والله يابنى اللى تشوفه ويرحك أنت وهى
والا أيه رأيك يا نادرة يا بتى
 - (نادرة مرتبكة وسعيدة فى نفس الوقت)
 - نادرة - اللى يشوفه رؤف أنا موافقة عليه يا عمى
 - عصران - يبجى خلاص مفيش مشكله وخير البر عاجله
ياللا بينا يا أم مهران
 - أم مهران - يالا يا حاج
 - نادرة - طيب مش تستنوا لما أعشيكم الأول زمانكم
جايبين من السفر جعانيين

- رؤف - لا يا ستى ..أحنا مش جعانين وبعدين لما نخلص
الى جايين علشانہ . ليكم عليه هعزمكم ع العشا فى
أحسن المطاعم . يالا بينا
- أم مهران - الله لا مؤاخذه يا أسطى عدنان . أحنا نسينا
أنك مطلع الزيارة ..دخلها إهنا فى الصالة وتعالى علشان
رايحين مشوار مهم
- امرك يا ست ام مهران
(فى المستشفى)
- أم مهران - سلام عليكم
- زينات - وعليكم السلام أهلا يا جاجة
- عصران - ألف سلامة عليكى يا ست أم نادرة
- زينات - الله يسلمك يا حاج عصران
- رؤف - ألف سلامة عليكى يا ماما الحاجة
- زينات - إن شاء الله تسلم أزيك يا رؤف يا بنى
- رؤف - الحمد لله تمام يا ماما
- عصران - شوفى يا ست أم نادرة..مفيش وجت نضيعه
وأحنا طالعين دلوجيت فوتنا ع الدكتور وسألناه العملية
دى عتستخرج وجت كد آيه . جال لنا مش أجل من شهر
..وبعدين رؤف زعلان يا ستى ماعايزش يسيب نادرة
لحالها فى البيت شهر بحاله..وجرر أنه يكتب كتاب بنتنا
نادرة علشان يجدر يبيت معاها رسمى ويحميها فى
غيابك لأنه عيخاف عليها جوى
- رؤف - طبعا يا بوى بخاف عليها هو أنا عندى أغلى
منها أخاف عليه

- أم مهران - ها جولتى أيه يا زينات يا أختى
- زينات - قولت أنا من ناحيتى معنديش مانع بس الراى رأى نادرة
- رؤف - يبجى خلاص أحنا أستاذنا الدكتور وهناخدك لمدة ساعة نوصل لمكتب أجرب مآذون نكتب الكتاب ونرجعك تانى ولو مش جادرة أطلبه يجى
- زينات - والله يا بنى يا ريت تطلبوا يجى أحسن أنا مبحبش أتعب حد وأخليك تشيلنى وتحطنى
- رؤف - وهو كذالك خليكوا هنا وأنا ونادرة نروح نجيب المآذون ونيجى
- عصران - طيب بس متآخروش علينا يا ولاد عاد رؤف بعد ساعة ومعه المآذون والشيكولاتة والكانز . وبعد أن تم كتب الكتاب وصلت وجبات من أفخم المطاعم للطاخم الممرضين والممرضات وقدم رؤف هديته الذهبية لنادرة وقدمت الست أم مهران خمس من الأساور هدية للعروسة ثم أستاذنوا للسفر على وعد بالعودة للأطمئنان على الست أم نادرة (
- عصران - يالا نوصلكم فى سكتنا يا ولاد وعند باب المنزل نزل عصران وزوجته لوداع العروسين وأطلقت أم مهران الكثير من الزغاريد كنوع من الأشهار وإخبار الجيران . وخرجت أم سعيد والجيران فى الشرفات)
- أم سعيد - خير يا ندورة يا لهوى أيه الذهب دا كله أنتوا سرقنوا محل ذهب والا أيه
- نادرة - ههههه لا يا خالتي دى شبكتى أنا ورؤف.

- أتجوزنا لسة جايين من المستشفى عند ماما وكتبنا كتابنا
هناك... ودى ماما رؤف وده والده عمى عصران
- أم سعيد - يا ألف مبروك يا حاجة بس بالذمة دى كلها
شبكة تجيبوها لها كان كفاية غويشة واحدة دى حتى
نادرة بترضى بقليله
 - أم مهران - الله أكبر فردة واحدة آيه يا ست اللي
عتكلمى عنها دى بس تحليه كدا . لما نعمل الفرح
نبجى نجدم اللي يليج بنوارة عيلة الراضى
 - أم سعيد - يا لهوى يعنى كمان دى مش الشبكة
 - أم مهران - فيه آيه يا ولية أنتى أنتى بتجرى ع البنطة
ليه حرام عليكى دى لسة صغيرة على عنيكى دى الله
أكبر الله أكبر... خد مرتك وأطلع يا ولدى ومن بكرة
الصبح تشوفولكم فيلا واللى شجة واسعة ومبجحة إكده
وأفرشوها وأنجلوا فيها لجل ماتبعدوا عن الحارة الهم
دى والجيران أم عنين صفر دول أطلع بينا يا عدنان
سلام يا نادرة يا بتي أه م الحج يا نادرة أول ما تدخل
أدخلى برجلك اليمين وشغلى صورة البجرة ربنا يحميك
من عنين الناس يا بتي ويجوم لك والدتك
بالسلامة... سلام عليكو مش هو صيك يا رؤف ملكش
بركة الا نادرة وأنتى يا نادرة يا بتي خلى بالك منيه
 - نادرة - فى عنيا يا ماما الحاجة مع السلامة أتفضل يا
رؤف ... أطلع على مهلك.. أتفضل أدخل فيه حاجة يا
خالتي أم سعيد تحبى تتفضللى معانا
 - أم سعيد - هااا لالا يا حبيبتي دا أنا بوصلكم بدل ما

- أنتوا طالعين قورع كدا من غير زفة ولا ناس
- رؤف - متشكرين يا ست أم سعيد كتر خيرك أتفضلنى على شجتك ولما نعوذ حاجة نبجى ننادى عليكى متبجيش تتطوعى بخدماتك يعنى
 - أم سعيد - من عنيا يا أستاذ فرع وأنت منور وتخض كدا وزى العسل ليلتكم فل تصبحوا على خير
 - نادرة - وأنتى من أهله يا خالتى (دخلت نادرة وأغلقت الباب)
 - رؤف - نزلت الست المزعجة دى
 - نادرة - هههه أه وخافت منك ومش هتطلع طول مانت هنا
 - رؤف - يبجى أحسن المهم أحنا هنضيع الليله فى الكلام عن الست أم سعيد والا آيه
 - نادرة بخجل - تقصد آيه
 - رؤف - أجصد هاتى يدك...أظن من حجى أمسكها وأبوسها وأبوس صاحبتها كمان
 - نادرة - هههه رؤف أرجوك متكسفينش
 - رؤف - هنتكسفى من آيه..دا أنا جوزك وأنتى مراتى
 - نادرة - أنا مش مصدقة اللى حصل ده.. ده زى ما يكون حلم
 - رؤف - ويا ترى حلم حلو بالنسبالك يا نادرة
 - نادرة - أحلى حلم حلمته فى حياتى يا رؤف (أخذها بين أحضانه وقبلها من جبينها)
 - رؤف - أوعدك يا نادرة أنى أكون الزوج اللى متندميش

على أنك أخترتيه أبدا
- نادرة - وأنا أوعدك أنى أكون الزوجة المطيعة اللى
تسهر على راحتك وسعادتك يا حبيبى
(يحاول ضمها لصدره ليقترب منها . شعر أنها خائفة أو
مكسوفة

- رؤف - نادرة عايزك ماتخفيش منى وأتأكدى أنى عمرى
ما همد يدى عليكى ولا هطلب منك حاجة الا لما نعمل
فرح وزفة كبيرة تبجى فيها زى أميرة الأحلام أنا بس هنا
معاكى مجرد حارس أمين ماتخافيش منى خالص

- نادرة - أنا عمرى ماخاف منك أبدا يا رؤف بالعكس دا
أنا مابحسش بالأمان غير وأنت معايا ربنا يخليك ليا
وميحرمينش من وجودك جنبى

- رؤف - طيب بجى يا ستى أنتى هتنامى فىن وأنا فىن

- نادرة - هنتام فى أوضة واحدة أنا وأنت

- رؤف - جد

نادرة - جد أصل أنا أوضتى بسريرين هههههههه

- رؤف - ههههه وأنا اللي جولت أنى صعبت عليكى

هههههه ماشی یا سستی بس أنا طالب منك طلب

- نادرة - عيني يا نور عيني

- رؤف - دا أنتی الی نور عینی الی منور لی حیاتی کلها

- نادرة - أيه هو الطلب بقي

- رؤف - دخليني سريري و غطيني و اعمليانا كوبايتين

شای و اُجعدی علی سریرك ندردش و نتكلم و نعرف بعض

أكثر وأكثر وكفاية عليا أنى أحس بوجودك جريبة فى

- المكان اللى أنا فيه
- نادرة - ماشى يا حبيبى
 - رؤف - تسلميلى يا نور عينى
 - نادرة غطت رؤف و أحضرت الشاى
 - وبدؤا الحديث معا
 - نادرة - الشاى يا رؤف
 - رؤف - تسلم يدك يا حبيبتى أجعدى بجى وأستريحى
 - نادرة - طيب لحظة هغير هدومى وأجيبك قوام
 - رؤف - وتخرجى برة وتاخذى برد ليه . ماتغيرى هنا
يعنى أنا شايف حاجة
 - نادرة - لا يا سيدى أتكسف وبعدين مش جايز نظرك
يرجع لك فجأة على حظى
 - رؤف - ههههههه اللى يريحك يا ستى
 - نادرة - ها أدينى جيت أهو كنا بنقول أيه بقى
 - رؤف - كنا بنجول أجعدى أستريحى ومددى على
سريرك وأحكى لى عملتى أيه من ساعة ما سبتك لحد
اللحظة دى
 - نادرة - أنا هحكىك من يوم ما أبويا مات لحد النهاردة
بس أنت متزهقش شوف يا سيدى
 - نادرة - بس . . هو دا كل اللى جرى من الألف للياء
 - رؤف - يا خبر أبيض كل دى فلوس لجتيها عند والدك .
طيب وليه عمل كدا
 - نادرة - مش عارفة بس متهى لى أنه خايف علينا لأننا
أتنين ستات لوحدينا

- رؤف - مشكلة عمى حسان إنك ماتجدريش تعرفى هو
بيعمل أيه أو عايز أيه
- رؤف - طيب والوصل ، دورتى كويس والا تحبى نسهر
ندور مع بعض
- نادرة - لا متتعش نفسك أنا قلبت البيت ودورت فيه حته
حتة
- رؤف - مفيش دولاب سحرى أو خزنة فى حيطه تكون
ورا صورة زى ما بنشوف فى الأفلام
- نادرة - صورة .. أنت بتقول خزنة ورا صورة معتقدش.
لكن ليه مايكونش مخبى الوصل فى صورة
- رؤف - أنتوا عندكم هنا صور متعلقه
- نادرة - أه صورتين كبار مش أنا قللتك أنه وصى والدتى
لو أنتقلنا أى مكان جديد لازم ناخذ صورته هو وجدتى
ومنساهمش
- رؤف - دا غير كلام أم جردان اللى أسمها أم سعيد لما
شافته بيكلم الصورة
- نادرة - أيه رأيك أنا هقوم أنزل الصور دى وأفتش فيهم
- رؤف - وأنا هاجى أنزلهم معاكى ليكونوا تجال عليكى
- نادرة - ياااه دول عالين أوى
- رؤف - وصلنى يدى ليهم وأنا هفكهم وأنزلهم لك يا
حبيبتي
- نادرة - أدى واحدة . . وأدى الثانية أستنى . أنفضهم
وبعدين ندور. كدا مابقاش عليهم تراب
- رؤف - أستنى وريهم لى أحسس عليهم بدال متبوظيهم

- نادرة - خد صورة جدتى الأول
- رؤف - إشمعنى؟
- نادرة - علشان خالتى أم سعيد شفته بيكلمها ويقولها يا كاتمة أسرارى وأنتى عايشة وأنتى ميتة
- رؤف - ورينى إكده...دا بصحيح الظاهر أن أسرار أبوكى كتير جوى يا نادرة
- نادرة - صحيح يا رؤف
- رؤف - الصورة مكلكة مليانة أوراج إن شاء الله هتلاجى اللى أنتى عايزاه
- نادرة - يارب يا رؤف . . طيب شوف دى كمان
- رؤف - برضوا مليانة أكيد فيها حاجة. هاتلى سكينه أما أفتحهم لك
- نادرة -أدى السكينه أهى يا حبيبى
- (رؤف فتح صورة الجدة)
- نادرة - الحق يا رؤف دى أوراق كتير حقيقى والصورة الثانية كمان مليانة وأيه دا ؟ ختم بابا
- ودا أيه دا كمان...مش معقول . دا الوصل اللى بابا واخده على أنور الصاحى يا نهار أبيض دا مبلغ كبير فعلا يعادل ربع فلوس بابا 30 مليون جنيه ده غير مكسبهم
- رؤف - يا خبر أبيض دا راجل ضلالى كان جابل على نفسه المبلغ دا كله
- نادرة - ودى وصولات البنك . أيه دا دى وصولات كتير أوى

- بس مش على عنوانا هنا
- رؤف - أمال على فين
- نادرة - أيه دا . دا عنوان والدة طنط رنيقة مرات عمى إبراهيم الله يرحمه
- رؤف - غريبة دى وأييه علاقة أموال والدك بببت أم
- مرت عمك إبراهيم
- نادرة - أستنى كدا ،هيه... مش معقول أيه اللي أنا شايلاه ده
- رؤف - أيه يا نادرة بتشهجى إكده ليه فيه أيه
- نادرة - دى قسيمة جواز بين بابا وطنط رنيقة الله يرحمها
- رؤف - أيه يا بنتى الألغاز دى . أبوكى دا فعلا كان راجل غامض وملوش جرار زى ماجالتلك الحاجة زينات .
- دورى دورى يمكن تلاجى مصيبة تانية مخفية
- نادرة - دى أوراق فيها وصيته ودا جواب مكتوب عليه
- أسمى
- رؤف - طيب أجريه إكده
- (بسم الله الرحمن الرحيم)
- بتى الحبيبة نادرة
- اوعى تكونى بتدعى عليا علشان دوختك على ورتك ومالك
- سامحينى يا بتى الدنيا هى اللي خلتنى غامض وكتوم ومديش
- سرى لحد حتى أجرب الناس ليا
- تعرفى ليه لأنى فى أول حياتى أتجرصت من أجرب الناس
- لجلبى من أبوى الله يرحمه . وأنا صغير كنت أشتغل

وما كنتش أعمل حساب لمالى وكنت أصرف وأشيل بجية
فلوسى مع بوى وكان يجولى اللى عتعمله ده مش صح يا
حسان أنت دماغك حلوة وبتفكر صح بس عيبك أنك مش
حريص وأهبل شيل مالك لحالك وحافظ عليه لحد ما بجيوا
2720 ولما أحتجت لهم لجل ما أشتري أول جاموسة ملكى
طلبتهم منه جالى لو عرفت أنت شايل معايا فلوس كد آيه
هتاخذهم لكن لو معرفتش كام بالمظبوط والله ما أنت شايفهم
ساعتها أحترت وجعدت أفكر جولتله ألفين وميت جنيه
لطعنى بالجلم على وشى وجالى أنت محوشتش ولا مليم يا
ولد الفرطوس وطرردنى من جدامه وفضلت طول الليل خدى
واجعنى ودمعى منشفش من على وشى ومن يومها جررت
أنى مأمنش حتى لأجرب الناس ليا وسرى لازم يبجى فى
عبنى أعزىنى يا بنتى وسامحىنى بس بعد أكده بمدة طويلة
جذك الله يرحمه جابلى الجاموسة اللى كان نفسى أشتريها
بس منولنيش جرشى فى يدى كيف ما جلى بالظبط

وكانت جاموسة مبروكة وفاتحة خير عليا بعدها أتجوزت من
حبيبة أول بختى لجيتها حنينة وطيبة ومفيش زيها والله
وربنا رزجنى منها بنادر بس يا بنتى نادر طلع عنده مشكلة
كبيرة جوى يعنى زى متجولى كده معوج مخه مش كامل
معيفهمش كويس يعنى مش طبيعى رضيت بنصيبى وحمدت
ربنا لكن يظهر أن العبط وراثة عند عيلة حبيبة مرتى
والدكاترة حذروها من الخلفة علشان هتبجى كلتها زى نادر
أكده ولكن علشان هى ست أصيلة صح وعتحبنى جوى
كسرت على نفسها لمونة وخلتتى أتجوز بس بعيد عنها

علشان هي عارفة نفسها عتحنى ومعايزاش تتحرج بنار
الغيرة وأتجوزت أمك الست زينات ست طيبة ومحترمة ربنا
يخليهاك يا بتى ولجل ما النصيب مكتوب وممنوش مهروب
أمك تعبت وجالها نزيف شديد والدكاترا جرروا يشيلو الرحم
وقد كان

وحمدت ربنا ورضيت بنصيبى وجولت كفاية أنتى عليا يا
نادرة والحمد لله أن مخك سليم وحنينة علشان تجدرى تراعى
أخوكى ربنا يعينك يا بتى أنا عارف إن الحمل تجيل جوى
على ضهرك على فكرة المال مالك صوح لكن لو أخوكى
أحتاج فى يوم من الأيام تصرفى عليه مهما يكون ده ولدى
وأخوكى يا نادرة دا إذا يعنى ، متعلميش الدنيا ممكن تعمل
فيها أياه

وعايزك تعرفى أن نادر له أموال لا تحصى ولا تعد لكن من
ناحية أمه حبيبة كان حداها ورث كبير جوى أصلها وحيدة
أبوها زيك كدا يا حبيبة أبوكى وكنت لسة فى بداية مشوارى
ماكنش لسة معاى المال دا كلاته وطلبت منى أشغل لها مالها
فى تجارة المواشى ونجسم الربح على ثلاثة التلتين ليها هي
وولدها والتلت الباجى ليا أنا وأنا وهبت حجى ليكى بما أن
حبيبة جسمت زى ما هي عايزة وعنها وشيلت 60000
جنيه اديتهم لأمك جولت أنتوا غلابة وطلباتكم مش كتير
ولجل ما تحافظ عليهم جولتلها الفلوس دى من عجز لعوز
ومن طبيبتها طارت بيهم م الفرحة وطبعا هتجولى أنى سايبكم
ليه فى الشجة المتواضعة دى وأنى معاى المال دا كولاته
أجولك أنتو أنتين حريم والناس عتطمع فيكم الناس معدش

عنديها رحمة يا بتي ولو عرفوا أن وراكي جرش
عينهشوكى وأنتى ضعيفه جولت خليكى تعضى فى الدنيا
والدنيا تعض فيكى لجل ما عضمك يجوى وتبجى ديبة فى
دنيا الديابة ومحدث يجدر يضحك عليكى وهو ده الدرس
اللى أبوى علمهولى بس بشكل أصعب ودا لأنك بنت
ومحتاجة لمخالب جامدة تجدرى تغرسها فى جلب أى حد
يتعرضلك أولمالك والشجة فى وسط الناس اللى أتربيتى فى
وسطيهم مهما أن كان وجت ما تجولى أى من أى وجع
تلاجى كل جيرائك حواليكى يعنى أجصد أموت وأنا مطمئن
يعنى نوع من أنواع العزوة والأمان ليكم

فيه سر هتكتشفيه وجت ماتلاجى الجواب ده جسيمة جوازى
من الست رنيقة مرت عمك إبراهيم أوعى تستغربى أو تظنى
فيا السؤ أنى لو كان غرضى الجواز للمتعة كنت جبت
فرفورة من اللى عيجوا فى التلفزيون كسم ورسم وحاجات
من دى يعنى انتى فاهمة جصدى لكن جوازى من رنيقة الله
يرحمها له حكاية صغيرة هجولهاك

لما مات أخوى إبراهيم مات لأنه حط فلوسه كلها فى شحنة
بجر وعلى ما وصلت المينا كان أترمى نصها فى البحر
والباجى أتعدم فى المينا بسبب جنون البحر عمك مستحملى
الصدمة وجع من طوله وجابل رب كريم مات مديون بسبب
عدم تنظيم المال لأنه حط ماله كله فى صفقة واحدة وعليها
قرض كبير من البنك

كانت ولاده صغار وكان طبعا من الواجب عليا أنى أسد دينه
جبل ما يندفن وفعلا سدبت ديونه . وجفت جنب مرته وعياله

وف يوم جالت لى مرت أخوى أنها لسة صغيرة وأن أمها
بدها تجوزها وتظمن عليها وأن متجدم لها واحد عنده
معصرة زيت وغنى جوى جولت لها يا بت الناس عندينا فى
الصعيد العم أولى بولاد أخوه وأظن العريس ده مهما يكون
غنى مش هيبجى أغنى منى وعنهما وطلبت يدها ووافجت
بس شرطت عليها أن يكون ده سر ميعرفهوش غير أنى
وهى وأمها والشهود وبس وكنا فارشين شجة فى بيت أمها
وتصديجا لكلامى كانت وصولات البنك بتيجي ليا على
العنوان ده هتلاجيهم عندك ولما تعبت رنيقة جوى أكتشفنا
أن عندها اللهم أحفظنا الخبيث وأحنا موعيناش ليه إلا متأخر
جوى وطبعا عيالها أمانة فى رجبتي

ورجبتك أنتى كمان وجبل ما تموت رنيقة وصتنى عليهم
وجولت لها دول فى عنيا لذلك هتلاجى عندك عجد بخمسين
فدان أرض أستصلاح فى الحسنية متأجرة بأسمهم الولدين
كل واحد 20 فدان ورحمة 10 والأيجار بيدخل أتوماتك فى
حسابك من سنتين فاتوا كل سنة 50000 جنيه

وانا عارفك حجابية ومناكلش حج حد يا ريت تخلص بالك
منهم دول غلبة يا بتى ومهما يكون لحكمك ودمك عايز
أجولك على حاجة

أوصيكى والزمان يوصيكى لما تيجى تختارى راجل ويكون
زوج ليكى أنتنى وأحسنى الاختيار ونجيه راجل ولو مكونش
بغصب عليكى يا ريت يبجى ولد من ولاد عمك عصران أو
عمك هريدى فى الصعيد طول عمر عصران يحبنى ويجولى
لو يبجى بينا نسب كانت الصداقة تتوتد جوى بناتنا ...ايوه

يا بنتى أحنا لينا باع كبير فى جنا دايم الصعايدة تلاجيهن
رجالة صح وجلبهن حامى ربنا يكتبك راجل من شهر راجل
يا بتى

حاجة كمان أرض المعلف اللى على طريق جنا أنى كتبتك
يا بتى وبرضوا الورد بكل اللى يخصها من مجاسات وتمن
موجود فى صورة جدتك نادرة الله يرحمها وهى دى اللى
بيسوج منها أنور الصاحى المواشى المستوردة واللى
وصولاتها عندك برضوا وأول ما يخلص البجر خديها منيه
هو كان يملك عنبر واحد فيه وأخذته منيه بيع وشرا والعبد
عندك لو لجيتى نفسك مش هتجدرى ع الشراكة دى فكيتها
وكل واحد يروح لحاله خلى بالك أنور الصاحى عايز المفتاح
له يعنى زى ماتجولى إكده ذمته أستك مطاط شوية يعنى
ههههههه

خلى بالك من روحك ومن زينات وطبعا نادر أخوكى أمانة فى
رجبتك عرفتى ليه ماسبتش الحمل على كتافك غير لما
تكبرى وعودك يشتد الدنيا دى مفيهاش راحة وربنا يرزجك
بالأمين اللى يشيل الحمل معاكى يا بتى والسلام عليكم
ورحمة الله وبركاته.

- نادرة - يااااا يا بابا د كدا كنت راجل حكيم
- رؤف - عمى حسان كان ونعم الرجال فعلا والله كان
راجل ولا كل الرجالة..بس اللى يستغربه أزاى كان بيقرر
يدارى كل حاجة وای حاجة وأيه السياسة الغربية دى
طب ليه ماداش الورق ده لحد يأمن له مثلا الست حبيبة
والا أبويا الحاج عصران بما أنه كان بيتق فيه إكده

- رؤف - نفترض أنك مأخديش بالك من وصيته ع الصور
والا من كلام أم سعيد معنى إكده أنك كنتى هتفضلى طول
عمرك متعرفيش فين حقك ومالك ليه يسببها للصدفة
- نادرة - عندك حق يا رؤف دا أنا أعتبره تفكير غريب
بحس أنه زى تفكير قداماء المصريين لما كانوا يحبوا
يشيلوا فلوسهم ببقى فى المقابر أو جوة الحيطان
- رؤف - يعنى عمى حسان تحتمس هههههههه .
- نادرة - بس موقفه نبيل جدا تجاه مرات أخوه وولاد
أخوه
- رؤف - يا بنتى دى تجاليدنا لما الأخ يموت ويسبب عيال
مبيخرجوش مراته من البيت يجوزوها أخوه الموجود
سواء متجوز أو عازب
- نادرة - نعم نعم أيه التفكير العقيم ده
- رؤف - دا مش تفكير دا عرف وتجاليد يعنى مثلا لو
ربنا أفكرنى ممكن يجوزوكى عمر أو وهبى
(وضعت يدها على فمه)
- نادرة - بعد الشر عليك ربنا يجعل يومى قبل يومك
- (أمسك يدها وقبلها)
- رؤف - ربنا يخليكى ليا وتفضلى منورة دنيتى إكده على
طول يا نادرة
- نادرة - طيب وسع أما ألم الورق دا فى شنة علشان
ميتنطورش وأبقى أقعد على رواقه أنا وأنت نفرزهم
ورقة ورقة ودلوقتى نعدل الصور ونعلقها تانى
- رؤف - ماشى يا ستى

- بجولك أيه يا نادرة أيه رأيك بكرة إن شاء الله بعد
- مانظمئن على ماما الحاجة فى المستشفى ننزل ندور
- على فيلا أو شقة واسعة تقضينا أنا وأنتى وماما
- ونفرشها ونجهزها ونعملها لها مفاجأة
- نادرة - اللى تشوفه يا حبيبى بس
- رؤف - بس أيه إتكلّمى
- نادرة - بس أنا كنت عايزة أقولك أيه رأيك ناخذ الشقة
- أو الفيلا دى فى قنا
- رؤف - جنا أنتى يا نادرة اللى بتطلبى نعيش فى جنا
- نادرة - أيه.. يضايقتك أننا نعيش هناك؟
- رؤف - لا أبدا بالعكس بس عايز أعرف أيه اللى خلاكى
- تفكرى فى إكده
- نادرة - أولا لأنى أول ما عرفتك عرفتك هناك
- ثانيا بحس أن الترابط هيكون أكبر
- ثالثا نعيش فى وسط أهالينا ومانبقاش لوحدا
- رابعا والأهم أنى أبقى جنب أخويا نادر وأقدر أنفذ وصية
- والدى وأخلى بالى منه
- رؤف - والله اللى تشفيه يا حبيبتى على فكرة أنتى جميله
- جوى ونادرة ده أسم على مسمى ربنا يخليكى ليا يا
- ندورة
- نادرة - ههههههه ندورة
- رؤف - أيه بتضحكى على أيه
- نادرة - أصلك بتفكرنى بخالتى أم سعيد هى الوحيدة اللى
- بتقولى يا ندورة

- رؤف - طيب أفكرى لنا حاجة عدلة أمال
(رن هاتف نادرة)
- رؤف - مين اللى بيطلبك فى وجت متأخر إكده
- نادرة - دى رحمة بنت عمى إبراهيم
- نادرة - ألو رحمة أزيك أنتى يا حبيبتى ...أنا الحمدلله
ماما بعد ما مشيتى تعبت منى ووديتها للدكتور وقررلها
عملية وحجزها فى المستشفىلا أنا مش بايئة
لوحدى أنا بايئة مع جوزى..أه والله مابھطرش رؤف جه
وكتبنا كتابنا علشان يقدر يقعد معايا فى الشقة..الله يبارك
فيكى وأنتى عملتى أیه فى موضوعك لبستوا الشبكة .
ومامة مختار عاملة معاكى أیه...طيب الحمدلله خلاص
هانت كلها يومين وتكتبوا الكتاب ألف مبروك يا حبيبتى
لا مش معطلانى ولا حاجة رؤف لا دا نام من بدرى . لا لا
دا مش زفاف . دا مجرد ختم مرور علشان يقدر يبات
معايا ويحمينى بس . أنما إن شالله الفرح قريب جدا لما
ماما تقوم بالسلامة . أه طبعا هعزمك ...طيب يا حبيبتى
مع السلامة
- نادرة - دى رحمة بنت عمى لبست الشبكة
- رؤف - الحمدلله ربنا يسعدها ويهدى لها مختار ويهديه
لنفسه
- نادرة - يعنى لو عزمونا على كتب كتابهم هنروح؟
- رؤف - أمااااا أنا لازم أظهر معاكى فى كل مكان علشان
محدث يتجراً ويبص لحرم رؤف الراضى بس بشرط
ممنوع الزيارات ما بينا ..أنا لا يمكن أدخل بيتى كلب كان

- عايز ينهش لحمى
- نادرة - حقه ولو عايز مانحضرش فرحهم كمان أنا موافقة
 - رؤف - ربنا ميحرمنيش منك
 - نادرة - يالا بقى ننام
 - رؤف - مش هتفرزى الورق
 - نادرة - بكرة أحسن عايزة أنا...أه م الحق فكرنى بكرة أروح لأنور الصاحى أديله وصله وأخد فلوسى
 - رؤف - إن شاء الله
 - نادرة - تصبح على خير
 - رؤف - أنتى من أهل الخير
 - وفى الصباح أستيقظ رؤف ونادرة وأرتدوا ملابسهم وخرجوا للذهاب الى مصالحهم وقابلتهم أم سعيد على السلم
 - أم سعيد - يا حلاوتهم يا قطاقيطهوم اللهم صلى على النبى
 - العرسان الحلوين آيه اللى مخليهم نازلين بدرى كدا
 - أظن أنا مطلعتش ضايقتكم يا سيادة العريس أهو أنا حظيت كرسى على بابى علشان أى حد طالع أرجعه علشان ميقلقكوش
 - نادرة - ليه هو فيه حد سأل علينا يا أم سعيد
 - أم سعيد - يوووووه متعديش
 - جالكم محضر من البنك قلته مسافرة وجالك الكلاف قولته مش موجودة وجالك عكاشة السواق قولته أنكم

- نزلتوا فضل يقولى أنك أتصلتى بيه طبعا مصدقنوش
هتتصلى بيه أزاي وأنتى عروسة
- نادرة - يا خبر أبيض ليه كدا يا خالتى أم سعيد أمال
هنروح مشوارنا أزاي دلوقتى
- رؤف - ناولينى رجة الولية دى أخنجهالا أملك
لسانها أقطعه لها يا ساتر دى نوع غريب جوى من
البشر أنى ماشفتش إكده عاد
- أم سعيد - يا لهوى أنت هتتحول والا آيه الحق عليا اللى
بحافظ لك على أقل بنود الراحة أيها الفرع المغتاز
- نادرة - أهدى بس يا رؤف...يا خالتى أنتى كدا بتوقفى
مصلحتنا مايصحش كدا أرجوكى متعمليش حاجة زى دى
وتمشى حد من غير ما تاخدى رأينا اذا كنا عايزينه
يتفضل أو لا
- نادرة - خلاص يا ندورة بعد كدا مش حارساكى وأنا
قاعدة تحت بعد كدا هقعذك على باب الشقة وأوصل
جرس لو رنيت عليكى رنتين تفهمى أن فيه زائر. ترنى
عليه رنة أعرف أنه أه رنتين أعرف أنه لا ومتزعليش
نفسك أبدا
- رؤف - يا ستى ماينفعش اللى بتجوليه ده أنى بدى
أعرف أنتى مالك ومالنا أنتى ولية أمرنا...من بجية
عيلتنا..نخصك فى حاجة
- أم سعيد - الله الله الله هى دى آخرتها طبعا ندورة
تخصنى وما دام أنت أتجوزت ندورة يبقى تخصها واللى
يخصها يخصنى وبعدين طول ما الست زينات مش معاها

- لازم أخلى بالى منها
- رؤف - يا سلام وأنى راس فجلة أياك...
 - أم سعيد - وأنا مالى ما أن شائلة تكون راس البر حتى
 - رؤف - وسعى يا نادرة سيبينى ع الولية اللى تخرج الدم دى
 - أم سعيد - أنت هتعملهم عليا والا أياه أنا عارفة أنك راجل صعيدى والصعايدة مايمدوش أيدهم على حريم أنا عرفت كل عادتكم من ع أنت رؤف - نت؟
 - أم سعيد - أه نت خلّيت أبنى يقرالى وعرفت عنكم كل حاجة بتعيشوا فى جماعات الكبير بيحن ع الصغير كلامكم قليل وفعلكم أكبر بس غضبكم شديد
 - رؤف - خلاص أنتى كدا بتوصفى بنى أدمين والا حاجة تانية يا ست أم سعيد . بعدى عننا نادرة أحنا لازم نشوف لنا سكن تانى بعيد عن السكنة اللى تخرج الدم دى
 - أم سعيد - يا لهوى ونهون عليك أيها الفرع المحترق دمه
 - رؤف - يالا بينا يا نادرة
 - نادرة - طب بس ثوانى أرن على عمى عكاشة
 - أيوة يا عم عكاشة معلش عندى أنا دى أنت فىن على أول الشارع طيب كويس ممكن تيجى قدام الباب لوسمحت متشكرة يا عم عكاشة
 - أم سعيد - أستنى أعدلك هدومك أحسن أتبهذلت من النرفة

- نادرة - أهو عمى عكاشة وصل . أتفضل يا رؤف عن
أذنك يا خالتي
- أم سعيد - أذنك معاكى يا ندورة بالسلامة يا قمر مع
السلامة يا سى زرزور
- لنفسها
- أم سعيد فى سرها - متزرر على آيه هو أنا عملت حاجة
....كمان اللى عايزاهم يرتاحوا والنبى دا منظر عرسان
نازلىنلى من النجمة ربنا يشفى طب دول مشيوا أشغل
نفسى بمين يا ترى . مفيش غير مرات أبنى ووائل
جوزى أما أدخل أقتحم عليهم البيت وأحرق دمهم زى ما
دمى إنحرق
- فى السيارة
- نادرة - أزيك يا عمى عكاشة
- عكاشة - الله يسلمك يا ست هانم
- نادرة - أقدملك الأستاذ رؤف
- عكاشة - طبعا الأستاذ رؤف الراضى غنى عن التعريف
- نادرة - أه بس النهاردة أنا بقدمه لك علشان أقولك
الأستاذ رؤف يبقى جوزى يا عم عكاشة ..أحنا كتبنا
كتابنا أمبارح عند ماما فى المستشفى
- عكاشة - ألف مبروك يا نادرة يا بنتى يا زين ما اخترتى
نسب وأدب وأنت كمان يا أستاذ مختار يا زين ما اخترت
. أدب وجمال وكمال ربنا يسعدكم يا ولادى
- نادرة - ربنا يبارك فيك يا عم عكاشة
- عكاشة - ها تحبوا أودىكم فين

- نادرة - ودينا على المستشفى
- عكاشة - من عنيا
- رؤف - لا بعد أذك يا نادرة نروح للصاحي الأول
- نخلص من قصته وبعدين نروح نفرح ماما الحاجة
- نادرة - عندك حق اللي تشوفه يا رؤف بينا ع الصاحي يا
- عم عكاشة
- (نزلت نادرة ومعها رؤف ...طرقت الباب وطلبت مقابلة
- أنور الصاحي
- وأستقبلهم أنور الصاحي
- أنور - أهلا أهلا يا ست البنات أتفضلنى
- نادرة - أهلا بيبك يا حاج أنور
- أنور - أنا رحى لك البيت النهاردة الصبح ملقيتكوش
- كنت عايزك أنتى والست الوالدة فى موضوع خصوصى
- نادرة - خير يا معلم
- أنور - خير إن شاء الله من يوم ما كنتى عندى المرة
- اللى فاتت وأنا كنت عايز أجى للست زينات بخصوص
- موضوع كدا
- نادرة - موضوع أيه أتكلم يا حاج
- أنور - موضوع جواز
- نادرة - جواز جواز مين يا حاج مش أنفضينا من
- الموضوع دا من زمان وقلت لك أن أبناك ما يناسبنيش
- أنور - لا ماهو المرة دى الجواز مش لفايز
- نادرة - أمال لمين يا حاج
- أنور - لأبو فايز

- نادرة - أيه لك أنت يا حاج
- أنور - دا بعد أذنك يا ست العرايس أنا قلت من يوم ما والدك أتوفى وأنتوا لوحدكم ومفيش معاكم راجل قلت نلم زيتنا فى دقيقنا يعنى و
- نادرة - وأيه يا معلم
- أنور - ونتجوز يا ست البنات وأهو يبقى معاكم راجل
- رؤف - بتخرف بتقول أيه يا راجل أنت
- أنور - أنت أيه اللي حشرك يا أخ
- رؤف - أيه اللي حشرنى . اللي حشرنى
- نادرة - أستنى يا رؤف أنا اللي هعرف الحاج أنت مين
- نادرة - أحب أقدملك يا حاج
- الباشمهندس رؤف الراضى ...جوزى
- أنور - أيه جوجوجوزك
- نادرة - أيوة يا معلم جوزى
- أنور - كدا يا ألف نهار مبروك
- أنور - ماتأخذنيش يا أستاذ دا كان مجرد عرض لحماية بنت المعلم حسان صاحبي وحبيبى
- رؤف - لا تشكر يا معلم كتر خيرك ممكن نخلص اللي
- أحنا جايين علشاناه
- أنور - اللي هو أيه
- رؤف - فلوس الشحنة بتاعة مدام نادرة
- أنور - ما أنا قولت لها تجيب الوصل أديها فلوسها
- رؤف - وأدى الوصل يا معلم
- أنور - ورينى كدا

(رؤف خبأ الوصل فى يده)

- رؤف - لا مؤاخذه يا معلم الفلوس فى أيد نادرة تاخذ الوصل
- أنور - كدا وهو كذلك يا باشمهندس دا شيك بأربعين مليون لحامله
- إتفضل... هات الوصل بقى
- رؤف - يعنى المكسب عشرة مليون بس يا حاج فى سنة ونص
- أنور - عيب يا باشمهندس وأنا هضحك عليكم
- رؤف - وهو كذلك يا معلم دا بخصوص فلوس شحنة البقر نيجى للعنبر اللى يخصك فى المعلق طبعا أنت عارف يا معلم أن عمى حسان اشتراه منك وهو كان موسى لما يخلص البقر منيه تاخده نادرة لو ملهاش غرض فى الشراكة وأعتقد البقر أتباع من زمان وأحنا سايبينك تستعمل المعلق لحد ما نجرر هنعمل فيه آيه هناجره هنبيعه هنشغله هنركنه أرض الله أعلم لسه مقررناش
- أنور - إذا أجرته أنا تحت أمركم هتبعوه برضوا أنا تحت أمركم هتشغلوه بالنص بينى وبينكم أنا تحت أمركم لأن الست نادرة ملهاش فى تجارة المواشى
- رؤف - لا متشيلش همها دا شغلنا أحنا بجى من فضلك جدامك 15 يوم تفضى المعلق وتسلمه لنا ونكون شاكرين الأفضل يا معلم
- أنور - وهو كذلك بعد 15 يوم هسلك المعلق

- رؤف - نستأذن أحنأ يا معلم
- أنور - كذا من غير ما نعمل أى واجب
- رؤف - واجبك وصل يا معلم . سلام عليكم
- أنور - وعليك السلام وألف مبروك مرة ثانية يا

باشمهندس

- رؤف - لله يبارك فيك يا معلم

(ركب رؤف ونادرة السيارة)

- فايز - أنت بتقول لمين مبروك يابا
- أنور - بقول لنادرة بنت المعلم حسان شايف يا بأف
- وقعها واحد أعمى مش أنت عيون بقر ومفيش نظر غور
- جتك البلا ضيعت من أيدك بنك متنقل أتفو عليك عديم

المخ

(فى السيارة)

- نادرة - هنروح على المستشفى
- رؤف - لا طبعأ هندق ع الحديد وهو ساخن هنطلع ع
- البنك نصرف الشيك ونحط الفلوس فى حسابك وبعدين
- نروح المستشفى وده علشان ميبقاش فيه فرصة
- للصاحى يلعب بينا متعلميش النفوس فيها أيه وماتنسيش
- أن والدك حذرك من لؤمه
- عكاشة - عندك حق يا رؤف يا بنى ربنا يزيدك من نعيم

الله مهندس مهندس على حق

(بعد ما أنتهت مهمة البنك ذهبوا للمشفى)

- نادرة - أيه دا ماما مش فى أوضيتها يا رؤف وسريرها

متساوى

- رؤف - إهدى يا حبيبتي وهنعرف كل شى دلوقتى
- نادرة - الممرضة أهى
- من فضلك الست زينات اللى كانت فى أوضة 24 مش موجودة
- الممرضة - الست زينات تمام وماتخافيش وعملت العملية بس الدكتور أمر أنها تدخل العناية المركزة علشان يبقى مطمئن عليها
- نادرة - يعنى هى بخير
- الممرضة - والله يا ستى بخير وزى الفل دى حتى جت من شوية ست غريبة كدا ولما ملقيتهاش فى أوضيتها فضلت تصوت وتقول عملتوا فيها آيه يا مجرمين وحاجات غريبة والدكتور أدها حقنة مهدئة أخذتها ونامت ونيمناها فى أوضة الممرضات
- نادرة - ست مين؟
- رؤف - هيكون مين يعنى أكيد الست المهفوفة اللى أسمها أم سعيد
- الممرضة - أيوة بالظبط هى أم سعيد
- نادرة - يا خبر أحنا أسفين جدا والله
- الممرضة - لا أبدا هى عملت كدا من خضتها على الحاجة دى محبة يا مدام نادرة
- رؤف - أيوة محبة أهى هى دى المحبة الجاتلة اللى بيجولوا عندها . ست متعبة جدا
- نادرة - المهم ممكن أشوف ماما وأطمئن عليها
- الممرضة - هخليكى تشوفها بس من بعيد علشان

- تتطمنى بس بسرعة قبل ما الدكتور يمر ويشوفك
- نادرة - أنا متشكرة جدا
 - نادرة - يا حبيبتي يا ماما ربنا يشفيكى شايف يا رؤف
 - نايمة زى الملاك أزاى
 - رؤف - ربنا يجومها لك بالسلامة يا حبيبتي
 - نادرة - أنا أسفة يا رؤف
 - رؤف - ماتتأسفيش يا حبيبتي أنى برضك شايفها بجلبى
 - اظن اطمنيتى عليها .. جاعدتنا مبجاش ليها لزمة يالا
 - بيننا جبل الحيدبون ما تفوج وتشبط فينا أنى جلبى مش
 - مطمئن
 - نادرة - حيدبون مين
 - رؤف - جارة الهنا هو فيه غيرها
 - نادرة - ههههه طب والله دى طيبة أوى يا رؤف أنت
 - اللى قافش منها مش عارفة ليه
 - رؤف - أصلها حشرية وبتتصرف من غير مخ . يالا بجى
 - أم سعيد - ندورة ندورة يا حبيبتي أنتى جيتى شوفتى يا
 - ندورة خضونى على زينات أزاى أنتى شوفتيها
 - نادرة - أه يا خالتى أهى . بصى عليها من الأزاز أهى
 - كويسة الحمد لله
 - أم سعيد - يا حبيبتي يا زينات حطينك فى التلاجة دى
 - ليه؟
 - نادرة - ههههه دى مش تلاجة يا خالتى دى أوضة فيها
 - جميع الكماليات اللى تخليهم يعتنوا بيها
 - أم سعيد - والله عشنا وشوفنا

- رؤف - يالا يا نادرة
- نادرة - يالا يا حبيبي
- أم سعيد - أنتوا رايعين على فين أنتو مرواحين
- رؤف - لا أحنا ورانا شوية مشاوير هنجضيها وبعدين نروح
- أم سعيد - إن كنتم هنتغدوا خدوني معاكوا أصلى جعانة أوى بقالى يجى ساعتين نايمة فى المستشفى وجوعت
- نادرة - يا حبيبتي يا خالتي أم سعيد تعالى وأحنا نغديكى
- رؤف - تعالى نجعدك فى المطعم اللى جنب المستشفى ونحاسب ع الغدا اللى تطلبليه ونروح أحنا مشاورنا
- أم سعيد - ربنا يكرمك يا كريم يابن ال
- رؤف - ال أيه
- أم سعيد - الكرما يا خويا وأنا أقدر أقول غير كدا
- رؤف - أه بحسب
- أم سعيد - هو أنت على طول متهور كدا يا أفوا
- رؤف - أسمى الباشمهندس رؤف
- أم سعيد - ماشى يا باشمهندس مش هننزل بقى والا أيه
- أنا جعانة وأنا لما بجوع مابعرفش أنا بقول أيه
- رؤف - إتفضللى يا ست أم سعيد على عيني وراسى
- أم سعيد - تسلم يا فرع يا أبن الحلال يا أبن الأصول
- يابن الناس الطيبين
- رؤف - خلاص يا ست أمشى وأنتى ساكتة أنى مش عايز
- شكر منك أنا بس عايزك تحطى لسانك فى بجك وأنى هعملك اللى أنتى عايزاه

- أم سعيد - من عنيا يا باشمهندس
(فى المطعم)
- رؤف - أفضلى يا ست أم سعيد تحبى تاكلى آيه .
- جرسون ممكن تجول للست عندكم أكل آيه
- الجرسون - عندنا بيكاتا بالشانبيون
- رز بالكارى
- جمبرى بالمايونيز
- اسماك مشوية
- اسماك مقليه
- كباب وكفتة
- خضار سوتيه
- أم سعيد - كفاية كفاية أنا عرفت هاكل آيه بلاش
- نابليون ولا رز ولا الا أنت قولت عليه دا كله عندك
- محشى كرنب
- الجرسون - لا
- أم سعيد - خبيزة
- الجرسون - أفندم
- أم سعيد - طيب أقولك
- أم سعيد - هاتلى 2 كيلو كباب وكفتة ولفهم لى
- رؤف - يلفهم ليه أنتى مش جعانة
- أم سعيد - معلىش يا باشمهندس هأخدهم وأتغدى مع
- جوزى وأبنى ومراته وعياله
- رؤف - إكده طب خليه 3 كيلو ياأبنى وحسابهم أهو
- والباجى علشانك

- أم سعيد - إلهى يسعدك يا باشمهندس ويخليك مراتك ويسعدكم قادر يا كريم
- رؤف - طيب يالا أما نوصلك للبيت علشان تلحجوا تاكلوه وهو سخن وبعدين نروح أحنا مشوارنا
- نادرة - رؤف أيه رأيك بلاش الفكرة اللي فى دماغك دى وخلينا نفكر لما نروح البيت
- رؤف - أنتى شايقة إكده يبجى ناخذ لنا كيلو كباب وكفتة أحنا كمان ونروح نستريح ونتفاهم
- أم سعيد - تتفاهموا على أيه ها ها
- رؤف - أستغفر الله العظيم اللهم أطولك يا روح
- أم سعيد - طب خلاص مش عايزة أعرف أل يا خبر بفلوس بكرة يبقى ببلاش
- (عند المنزل)
- رؤف - إتفضل معانا يا عم عكاشة
- عكاشة - متشكر يا باشمهندس أنا هروح ولو عوزتونى رنوا عليا
- رؤف - طيب ع العموم غداك فى اللفة اللي ع الكرسي الورانى بالهنا والشفاه
- عكاشة - متشكر جدا يا باشمهندس
- رؤف - يالا يا نادرة
- نادرة - يالا يا حبيبى
- أم سعيد - أتفضلوا معانا يا ولاد عندنا كباب وكفته هاتندموا
- نادرة - ههههه بالهنا والشفاه ليكم يا خالتي أم سعيد

- 253

- نادرة - أنت كنت عايز تروح فين؟
- رؤف - أبدا أحنأ مش جولنا هنشوف شجة ونفرشها ونعملها مفاجأة لماما الحاجة
- نادرة - أنا قولتلك أنى عايزة جوازنا وبيتنا يكون فى قنا وأنى مش هعيش فى البلد دى تانى
- رؤف - والله اللى تشوفيه
- نادرة - اللى أنا عايزاه بصحيح أسحب فلوس ولاد عمى من فلوسى وأرجع لهم الأمانة اللى فى رقبتي علشان أبقي خليت مسؤوليتى
- رؤف - خلاص يا ستى نتعدى وننزل نخلص الموضوع ده
- نادرة - لا خليها بكرة ونروح نحضر كتب كتاب رحمة ومختار ونديهم حقهم
- رؤف - اللى تشوفيه يا حبيبتي
- نادرة - ها.. تشرب أيه
- رؤف - شأى مضبوط على ماتعمله أكون كلمت الحاج عصران . بس بجولك أيه آخر كلام هنتجوز فى جنا
- نادرة - آخر كلام يا حبيبى
- رؤف - السلام عليكم ..أزيك يا حاج عصران
- أنى بخير الحمد لله ..ونادرة بخير وبتسلم عليكم وأم نادرة زى الفل عملت العملية النهاردة وف العناية
- كنت بجول أيه يا حاج ..نادرة بدها الجواز يتم فى البلد عندينا وعلشان إكده كنت عايزك تشوف لينا شجة فى حطة حلوة وأحنأ نبجي ننزل نفرشها على الحاجة ما

- تجوم بالسلامة... فيلا أه الفيلا الجديدة وأنتوا مش كنتوا
هتجولوا فيها يا حاج
- بتبنيها للى يتجوز الاول منينا... يعنى طلعت من نصيبى
ههههه طب الحمد لله خلاص نبجي ننزل نفرشها
- يوصل السلام يا حاج سلم لنا على الحاجة وعلى أخواتى
بالسلامة يا بوى ألفين سلام
- نادرة - ها كلمتهم وسلمتلى عليهم والا نسيت
- رؤف - لا سلمت لك عليهم وهما بيسلموا عليكى كمان
- نادرة - الله يسلمهم
- رؤف - كنت بتكلم علشان يشوفولنا سكن نواحيهم .
لجيتهم هيدونا الفيلا الجديدة وأحنا نبجي نفرشها وهما
هيبنوا غيرها للى يتجوز بعد منى
- نادرة - ههههه ربنا يخليهم لينا يا رب
- رؤف - ويخليكى أنتى ليا هاتى يدك
- نادرة - تانى
- رؤف - يعنى حتى يدك ماطايلهاش طب دى يدك دى
اللى بتحسسنى أن أنا وأنتى فى مكان واحد
- قبل رؤف يدها
- رؤف - أنى بحبك جوى يا نادرة
- نادرة - وأنا كمان يا رؤف متتصورش أنا سعيدة
بوجودك معايا أد أيه
- رؤف - ربنا يخليكى ليا وميحرمنيش منك
(وفى الصباح ذهبوا لتحليص حقوق أولاد عمها إبراهيم)
- نادرة - ها تحب نروح لماما وبعدين نروح لهم والا

العكس

- رؤف - تعالى نبص على ماما الحاجة وبعدين نروح
لولاد عمك فى شجبتهم يكون العصر دخل نحضر كتب
كتاب رحمة والندل ونبارك ونمشى على طول مانطولش
وأنى ربنا يصبرنى على وجودى فى المكان اللى هو
جاعد فيه

- نادرة - اللى تشوفه يا حبيبى ولو عايز مانحضرش
الكتاب أنا موافقة

- رؤف - لا خلىنا أحنا الأحسن

(فى المستشفى)

- نادرة - ماما يا حبيبتى يا ماما
- زينات - نادرة يا حبيبة أمك تعالى فى حضنى
- نادرة - ماتجهديش نفسك يا حبيبتى
- رؤف - أزيك يا ماما الحاجة حمدلله ع السلامة
- زينات - الله يسلمك يا رؤف يا أبنى ..ها عاملين آيه يا
ولاد

- رؤف - أحنا تمام لولا الست جارتنا الغريبة
- زينات - مين أم سعيد
- رؤف - ماتجيبش سيرتها يا حاجة أرجوكى أحسن دى
بتيجى ع السيرة

- زينات - دى هى هنا من الصبح معايا
- رؤف - معاكى امال هى فين؟
- زينات - نزلت تجيب لى علبتين عصير
- رؤف - إكده طيب أستاذن أنا وهستاكى فى العربية

ولما أرن لك يا نادرة تنزلى بسرعة

- نادرة - ماشى يا حبيبى
- زينات - ها عاملة أيه يا نادرة
- نادرة - الحمد لله يا أمى
- زينات - ورؤف عامل معاكى أيه
- نادرة - رؤف دا أحن وأطف أنسان فى الدنيا كلها
- زينات - ربنا يسعدكم يا بنتى ... مقولتليش أتفقتوا
هتعيشوا فين
- نادرة - أيوة يا ماما أنا طلبت منه نعيش فى البلد منه
يكون وسط أهله وأنا أكون جنب أخويا أسكتى مش لقيت
الوصل بتاع أنور الصاحى
- زينات - بجد لقتيه فين؟
- نادرة - مش هتصدقى لقيته هو وكل أوراق أبويا
محطوطيين فى صورته وصورة جدتى المتعلقين فى
أوضتك
- زينات - يا لوأمك يا حاج حسان
- نادرة - أسكتى ياما هحكىلك من أول ماسيبتك لحد
دلوقتى
- بس خلاص
- زينات - ههههه الله يخرب عقلك يا أم سعيد أتاريه يا
عينى مش طايقها بس الحمد لله أن ربنا عطرك فى الورق
ياما أنت كريم يا رب
- نادرة - النهاردة كتب كتاب مختار ورحمة بنت عمى
- زينات - والله

- نادرة - أه والله وهنروح نحضره أنا ورؤف
- زينات - ورؤف موافق يروح
- نادرة - أه بس قالى ربع ساعة بالكثير ونرجع وده
علشان ميزعلنيش
- زينات - ربنا يخلهولك يا حبيبتي يا رب ونعم الرجال
(تحت المستشفى)
- أم سعيد - مين الباشمهندس أنت مطلعتش والا أيه
- رؤف - لاطلعت ولسة نازل دلوجتى
- أم سعيد - وندورة فوق
- رؤف - أه وزمانها نازلة أصلنا ورانا مشوار. أتفضلى
أطلعى أنتى بسرعة الا الحاجة ريجها ناشف جوى
ومنتظرة العصير
- أم سعيد - من عنيا يا خويا طلعالها أهو
(رن على نادرة)
- رؤف - نادرة أنزلى بسرعة أم سعيد طالعة أنزلى قبل ما
توصل الأوضة ماتعرفيش تخلعى منها
- نادرة - ماشى يا رؤف عن أدنك يا ماما أصل رؤف
مستنى
- زينات - مع ألف سلامة يا حبيبتي
- أم سعيد - ندورة الله أنتى ماشية والا أيه
- نادرة - معلش يا خالتى علشان مستعجلة
(نزلت نادرة)
- رؤف - لحجتك أم سعيد؟
- نادرة - على الباب وقولت لها أنك مستنى تحت ونزلت

بسرعة

- رؤف - هههههه يا ساتر دى مصيبة على بلد
- نادرة - أطلع بينا يا عم عكاشة
- (فى شقة رحمة فتح أنس الباب)
- أنس - أهلا أهلا أهلا نادرة . أزيك يا بنت عمى
- نادرة - الحمد لله تمام أزيك أنت يا أنس
- أنس - الحمد لله بخير
- نادرة - أقدمك الباشمهندس رؤف جوزى
- أنس - جوزك... أمتى حصل ده
- نادرة - أول أمبارح
- أنس - وأحنا مانعرفش كدا
- نادرة - معلى .. أصل الحكاية جت فجأة . آمال فين
- رحمة وراضى
- أنس - راضى فى الحمام وزمانه خارج ورحمة جوة
- ومعاها الست الكوافيرة بتجهزها لكتب الكتاب
- نادرة - طيب أنا داخلة لها
- أنس - أتفضلى يا بنت عمى وأنا هنا مع الباشمهندس ،
- أفضل يا باشمهندس
- رؤف - متشكر
- أنس - راضى يا راضى خلص عندنا ضيوف
- (فى حجرة رحمة)
- نادرة - رحمة
- رحمة - نادرة حبيبتي أتفضلى يا حبيبتي
- نادرة - أيه الحلاوة دى يا بت

- رحمة - بعض ما عندكم يا حبيبتي
- نادرة - ها قربتي تخلصي
- رحمة - عشرين دقائق وأكون جاهزة
- نادرة - طيب أنا هقعد مع أخواتك ورؤف جوزي برة
- وهستناكي علشان فيه موضوع مهم هنتكلم فيه ولازم تسمعيه
- رحمة - ماشي يا حبيبتي
- (دخلت نادرة على رؤف وأنس)
- نادرة - ها إتعرفتوا على بعض
- أنس - الحقيقة يا زين ما أخترتي يا نادرة يا بنت عمي
- . الباشمهندس رؤف ونعم الرجال
- رؤف - الله يكرمك يا سيدي
- راضى - أزيك يا نادرة
- نادرة - الله يسلمك يا راضى
- راضى - ألف مبروك على الجواز
- نادرة - الله يبارك فيك . بأذن الله هنعمل فرح كبير
- وهتكونوا أول المعازيم أن شاء الله... المهم كويس أنكم موجودين كلكم علشان فيه موضوع كدا لازم نتكلم فيه
- بس لما تيجي رحمة بالمرة
- رحمة - أنا جيت أهو يا ستى . أزيك يا أستاذ رؤف
- منور والله
- رؤف - متشكر يا أنسة رحمة
- راضى - خير يا نادرة
- نادرة - باختصار كدا ومن غير تطويل أنا لقيت وصية

لوالدى معاها أوراق تخصوكم. والدى الله يرحمه أشتري
لكم أرض إستصلاح فى الحسنية وأدى عقدها أنت يا
راضى عشرين فدان أنت يا أنس عشرين فدان . وليكى
عشر فدادين يا رحمة وهما متأجرين من سنتين وأدى
إيجارهم بفوايدهم . أستلموا الأمانة بتاعتكم علشان
أرتاح أنا منها

- راضى - أيه اللي بنسمعوا دا أحنا لينا أملاك أزاي وأبونا
مات مديون وعمى حسان هو اللي سد دينه
- نادرة - ماهو عمكم أشتري لكم الأرض دى هدية .
علشان تبدأو حياتكم وتتجوزوا وتعيشوا
- أنس - ياااه مين بيعمل كدا فى الزمن دا
- نادرة - عمكم حسان الراضى طبعاً .
- راضى - الله يرحمك يا عمى
- أنس - الله يرحمك يا عمى
- رحمة - الله يرحمك يا عمى
- نادرة - تعيشوا وتترحموا وتعيشوا وتفكروا . المهم
دلوقتى عروستنا زى القمر

(جرس الباب)

- رحمة - دا لازم مختار ومعاها المأذون ، أفتح يا أنس
- ففتح أنس الباب
- أنس - العريس وصل أتفضل يا عريسنا ..أتفضلى يا
مرات عمى
- مختار - السلام عليكم
- الكل - وعليكم السلام ورحمة الله وبركاته

- مختار - أزيك يا رؤف ..مد أيدك يا رؤف أنا مادد لك

إيدى

(رؤف متردد يمد يده أم لا)

- مختار - مد إيدك وأنا أسف على اللى حصل منى قدام

كل اللى قاعدين أحنا كلنا عيلة واحدة ، وأنا مش

هتكسف من أخواتى . أنا بعترف بغلطى وقبل ما أكتب

كتابى على رحمة..أنا يا جماعة بعترف بغلطى وكل

إنسان بيغلط . وبعدين أنا مديون لك يا رؤف لأنك سبب

إلتزامى فعلا ، وأنا قدامك أهو لو عايزنى أحب على

راسك أنا مستعد لو عايز متعرفنيش أنا مش هقولك لا

..لكن والله أنا بحلفك إن دا كان شيطان وأنا ندمان من

قلبى وبعثدرك وبعثدرك لنادرة بنت عمى وأوعدك أنى

عمرى ما هضايقك

- أم مختار - خلاص بقى يا رؤف أنا بأكدلك على كلام

مختار أبنى...مختار فعلا أتغير ورجع لرشده وندم على

كل اللى حصل منه علشان خاطرى تسامحه ..وأنتى يا

نادرة حقك عليا يا حبيبتى وتأكدى أن اللى حصل ده

عمره ما هيتكرر بأى شكل من الأشكال وأدى راسك أهى

وحقك عليا أنا يا بنتى . بس سامحيه

- نادرة - أنا مسامحاه يا مرات عمى وعارفة إن ده كان

شيطان وراح لحاله ومهما كان مختار فى منزلة أخويا

- أم مختار - وأنت يا رؤف

- رؤف - أنى لجل خاطرك يا مرت عمى هسامحه بس

على شرط

- أم مختار - أيه هو أوامر
- رؤف - صاحبي وصاحبك ع الجهوة منتبادلش الزيارات
- مختار - طيب ليه يابن عمى دا أحنا طول عمرنا أخوات وأصحاب
- رؤف - أحب أجولك أن نادرة دلوجت بجت مرتى وحمائتها ملزومة منى والحج ميزعلش يا ابن عمى
- أم مختار - والله يا رؤف أتجوزت أنت ونادرة
- رؤف - إيوة يا مرت عمى كتبنا كتابنا من يومين وإن شاء الله الليلة الكبيرة هتبجي فى جنا وكلكم معزومين بأذن الله وأنا لجل مزعلش نادرة ولجل مبوظش الليلة الحلوة دى جبلت أعتذارك يا ابن عمى وربنا يبعد عنك شيطانك
- مختار - أنا مش عارف أقولك أيه ولا أشكرك أزاى .
- بالحضن يا ابن عمى ربنا ميحرمنيش منك وألف مبروك والله أنتم تستاهلوا بعض ربنا يسعدكم
- نادرة - وأنت كمان يا مختار معاك جوهرة من جواهر عيلة الراضى . أرجو أنك تعرف قيمتها وتحافظ عليها
- مختار - فى عنيا يا بنت عمى . رحمة جوة قلبى وف عنية
- أم مختار - ألف مبروك يا نادرة ..ألف مبروك يا رؤف .
- ربنا يهنیکم ويسعدکم یا رب
- نادرة - الله يبارك فيكى يا مرات عمى
- رؤف - الله يبارك فيكى يا مرت عمى
- راضى - بس أنا مش فاهم سبب الزعل أيه

- أنس - ولا أنا كمان . هو فيه أيه يا مختار؟ ماتفهمينا
- يا نادرة أنتى ورؤف أيه اللى مزعلكم من مختار
- رؤف - ماتشغلوش بالكم أنتم . دى حاجة بسيطة
- وخليكم فى فرح أختكم أحسن يا أنس أنت وراضى
- نادرة - الله آمال فىن المأذون أتأخر ليه
- راضى - زمانه جاى ، باسم راح يجيبوا
- (جرس الباب)

- أنس - المأذون وصل يا حبايب
- رحمة بفرحة - المأذون وصل يا نادرة
- نادرة - أه يا حبيبتي الحمد لله ربنا يتمملك بخير
- (بعد كتب الكتاب)

- أطلقت والدة العريس الزغاريد
- أم مختار - مبروك يا رحمة يا حبيبتي
- رحمة - الله يبارك فيكى يا ماما
- نادرة - ألف مبروك يا رحمة
- رحمة - الله يبارك فيكى يا ندورة
- رؤف - ما بلاش ندورة دى أحسن صاحبتها بتيجى ع
- السيرة

- رحمة - بتقول أيه يا رؤف
- رؤف - لا ولا حاجة أصلى بتشائم من الأسم ده
- رحمة - خلاص أبقى أقولها يا دودو أو نونو
- رؤف - أى أسم بس بلاش ندورة ده
- نادرة - الا أنتم ناويين تقضوا شهر العسل فىن
- مختار - أنا حجزت ليا أنا ورحمة وناوينا نروح نعمل

**عمرة بعد يومين نزور و نغسل قلوبنا وذنوبنا عند بيت
الله الحرام ونبدأ حياه جديدة علشان تبقى جواز مبارك**

- رؤف - والله زين ما عملت يابن عمي

- مختار - أحنا هنفضل واقفين كدا والا آيه . آيه يا راضى

أنت وأنس فين طبق الجاتوه والحاجة الساقعة لمولانا ،
ولفوله وجبة العشا بتاعته

- أم مختار - يالا يا عريس لبس الشبكة للعروسة لولى لى

لی لی لی لی لی

(في آخر السهرة)

أم مختار - يالا ياولاد على شقتكم وكلنا هنوصلكم

(عند باب الشقة حضنوا الأخين أختهم)

- راضى - ألف مبروك يا رحمة... خلى بالك منها يا

مختار

أنس - ألف مبروك يا جماعة حظ رحمة في عنيك يا

مختار دی آختنا الوحيدة

- مختار - أختكم في قلبي قبل عنيا يا جماعة متقلقوش

عليها

- نادرة - ألف مبروك يا بنت عمى مبروك يا مختار

- نادرة - الله يبارك فيكى يا بنت عمى

رحمة - عقبال ليلتك يا نادرة

- نادرة - متشكرة أوى يا حبيبتي

- نادرة - مبروك يا مرات عمي نستاذن أحنا

- أم مختار - الله يبارك فيكى يا حبيبتي

- رؤف - مبروك يا مختار مبروك يا مرت عمى

- مختار - الله يبارك فيك يا بن عمى ، عقبال ليلتكم الكبيرة يا رؤف
- رؤف - يالا يا نادرة سلام عليكم
- أم مختار - مع السلامة يا ولاد
- (بعد ماعاد رؤف ونادرة للمنزل)
- نادرة - يا سلام كانت ليلة حلوة رغم بساطتها
- رؤف - فعلا وأجمل ما فيها أنى حسيت بتوبة مختار وندمه
- نادرة - البركة فيك يا رؤف
- مختار - البركة من عند ربنا يا نادرة ، أنا مجرد وسيله
- لا وأجمل ما فى الموضوع أنهم هايروحوا عمرة
- ويزوروا بيت الله الحرام ربنا يتقبل منهم وعجبانا يا نادرة
- نادرة - إن شاء الله قريب جدا يا رؤف
- رؤف - عندى ليكى مفاجأة
- نادرة - أيه هى
- رؤف - لما سبجتك على تحت النهاردة وأنتى فى المستشفى جابلت الدكتور وسألته على حالة ماما الحاجة ...ظمنى جدا وجالى الحمد لله العملية نجحت وكلها أيام وماما تتماثل للشفاء وكلها 15 يوم وتخرج من المستشفى وتبجى زى الأول وأحسن كمان
- نادرة - صحيح يا رؤف
- رؤف - صحيح يا جلب رؤف
- نادرة - أنا مش مصدقة نفسى

- 267

- نادرة - أمال فين مريومة
- مريم - أنى أهوه يا رؤف وحشتنى جوى يا أوفاء .. نادرة وحشتينى يا مرت أخوى
- نادرة - وأنتى كمان يا مريم وحشتونا كلکم
- رؤف - أمال فين وهبى وعمر
- عصران - زى العادة وهبى فى الغيظ وعمر فى الجامعة .
- أجدوا يا ولاد أستريحوا...ها نويتوا على آيه أمال
- رؤف - أحنأ جايين علشان نادرة تشوف الفيلا وتفرشها
- أم مهران - خير ما عملتم .. الليلاى تشوفها ومن بكرة نطلع على أحسن معرض موبيليا فى جنا ونجيب العفش
- اللى يعجبك وأفرشيه وحالا هعينك خدمتين يمسخوها ويروجوها ونفرشها طوالى
- نادرة - ربنا ميحرمنيش منك يا ماما الحاجة
- أم مهران - ربنا يهنیکم ويسعدکم يا بتى
- رؤف - أمين يا أمى طول ما أنتى بتمنحينا دعوتك دى
- هنفصل بخير
- أم مهران - هههههههه مانحرمش منك ومن حلاوة لسانك
- يا ولدى ...يالآ أدخلوا ریحوا لكم ساعة على ما الغدا
- تجهز وبعد الغدا نوصل للفيلا هى مش بعيد عن إهنة
- رؤف - أه والله يا أمى أنا محتاج أرتاح يالآ يا نادرة
- نادرة - يالآ يا يا رؤف أما أوصلك لأوضتك
- رؤف - ليه وأنتى مش هتريحي
- نادرة - هريح بس فى أوضة مريم
- رؤف - ليه يا بت الناس مانا وعدتك متخافيش منى

- نادرة - لا الأصول أصول
- ماشى يا ستى اللى يريحك
- (بعد حوالى ساعتين جواهر أيقظتهم لتناول الغداء . بعد تناول الغداء) -
- رؤف - الحمد لله
- أم مهران - ما تاكل يا ولدى
- رؤف - شبعت يا أمى
- نادرة - وأنا كمان خلاص شبعت دا أنا كنت جعانة بشكل
- أم مهران - ها هتشرّبوا الشاى
- نادرة - لا خلىنى ابص ع الفيلا الأول
- (فى الفيلا)
- نادرة - الله حقيقى الفيلا تحفة يا رؤف
- رؤف - أنتى اللى شايفها ، عليكى توصفيتها لى ونرتبها
- سوا
- نادرة - ماشى يا حبيبى
- أول هام فيه سور ببوابة خشب صغيرة ، ولما ندخل فيه
- طريقة مرصوفة وف آخرها فراندا كبيرة وجميلة وفى
- الوسط بوابة مدورة حديد مزخرف تحفة . أيه رأيك فى
- طقم خرزان هنا
- رؤف - تمام يبقى هایل علشان تجرلى زى ما أنا عايز
- وأى ضيف مش على مزاجى أستضيفه فيها
- نادرة - تعالى ندخل بقى من الباب . ريسبشن واسع
- وعلى الجانبين سلمين واحد شمال وواحد يمين
- رؤف - دا زى نظام فلل أفلام الأبيض وأسود

- نادرة - بالظبط
- نادرة - تحت السلم اليمين مطبخ كبير ومن الشمال
أوضة بحمام يبات فيها الخدامين
- رؤف - تمام
- نادرة - تعالى هات أيدك نطلع فوق . ياه 16 سلمة
- رؤف - هههه أنت عديتهم
- نادرة - تعالى فيه ع اليمين أوضتين وع الشمال أوضتين
وفى النص جناح بحمام وطبعا الكبيرة دى هتبقى أوضة
نومنا
- رؤف - اللى تشوفيه يا حبيبتى
- نادرة - والباقي نفرش أثنين أطفال وأثنين ضيوف آيه
رأيك
- رؤف - واحدة بس ضيوف أنتى ناسية أن ماما الحاجة
هتعيش معانا
- نادرة - أه صحيح عندك حق يا رؤف
- رؤف - يعنى المهم عجبك الفيل
- نادرة - الا عجبنتى دى تحفة حاجة ولا فى الأحلام . يا
سلام يا رؤف لما تتفرش هتبقى وهم . يالا بينا ننزل
الجنينة . الله دا فيه أوضة ع اليمين فى الريسبشن
- رؤف - طيب تنفع لأيه
- نادرة - تنفع أوضة مكتب هعمل لك فيها مكتبة كبيرة
نقعد نقرا فيها لما نزهق ، تعالى ننزل الجنينة الله دى
فيها أحواض ورد وأشجار جميلة . تعالى نلف ورا كدا
...واو آيه دا دا حمام سباحة يجنن فى الجنينة اللى ورا

- الفيلـا . أيـه الجمـال ده أنا عمرى ما فكرت مجرد التفكير
أنى أعيش فى فيلا زى دى
- رؤف - يالا أتشطرى علشان تفرشيها بجى
 - نادرة - أنا رسمت كل حطة موبيليا فى مكانها المظبوط
وحياتك لخليها لك جنة يا رؤف
 - رؤف - خلاص يا حبيبتي من بكرة ننزل ننقى ونشترى
اللى نفسك فيه
 - نادرة - ماشى يا حبيبى . اللى تشوفه
 - نفرشها فى خلال الأسبوع دا وننزل مصر علشان أجهز
للفرح . وأيه رأيك نعمل الفرحة فى جنيـنة الفيلـا
 - رؤف - والله فكرة حلوة
 - نادرة - ونعمله عند حمام السباحة . ههههه أنا حاسة
أنها هتبقى ليلة جميلة
 - رؤف - طبعا يا نادرة كفاية أن شملنا هيتلم ونعيش
زوجين بحج وحجيجى مش زوجين مع إيقاف التنفيذ
 - نادرة - ههههه أما أنت عليك كلام مش ممكن
 - طيب يالا بينا نرجع . تعرف أكثر حاجة مفرحانى أيـه
 - رؤف - أيـه يا حبيبتي
 - نادرة - إننا هنبقى قريبين جدا من سراية عمى عصـران
كأننا فى بيت واحد
 - رؤف - طيب يالا علشان مانتأخرش سيبى البنات
يمسحوا وينضفوا ويالا بينا أحنا
 - نادرة - يالا يا سيدى
 - أم مهران - ها أيـه رأيك فى الفيلـا يا نادرة عجبـتك

- نادرة - إلا عجبتنى دى تجنن يا ماما الحاجة
- أم مهران - مبروكة عليكم يا بتى . تعيشى وتعمريها
وعيالكم يجروا فيها يا رب يا نادرة يا بتى
- نادرة - يا رب يا ماما يا رب
- (وفى اليوم التالى رؤف ونادرة وعمر والحاج عصران
اختاروا الموبيليا اللى تناسب الفيلا عادوا إلى السرايا
بعد يوم شاق
- نادرة - أه أما كان يوم مرهق بشكل
- أم مهران - ربنا يجعلوا بفايدة يا ولاد وتكونوا جبوتوا
اللى نفسكم فيه
- رؤف - الحمد لله يا حاجة . نادرة جابت كل اللى نفسها
فيه
- نادرة - أه يا ماما هيعجبك العفش جدا وبكره إن شاء الله
هنفرشه ياخذ حوالى 3 أيام ونرجع مصر علشان أجهز
الكوافير وفستان الفرحة والذى منه
- أم مهران - ربنا معاكوا يا بنتى
- (نادرة وضعت الأثاث فى الفيلا وأصبحت جميلة فوق
الخيال وعادت هى ورؤف إلى مصر وعندما وصلوا
قابلتهم
- أم سعيد
- أم سعيد - حمد لله ع السلامة أنتوا آيه روحتوا وقتلتوا
عدولى
- نادرة - أزيك يا خالتي أم سعيد
- أم سعيد - إن شاء الله تسلمى يا ندورة يا حبيبتي

- نادرة - أخبار ماما أيه يا خالتي؟
- أم سعيد - لسة جاية من عندها أهو قلت أما أجى
- أستحمى وأغير أحسن الحمامات هناك أيه بتبرق .
- الواحد يخاف يوسخها من الجلخ اللي هينزل من جتته
- نادرة - لا ماتقوليش كدا دا أنتى زى الفل يا خالتي
- أم سعيد - تسلميلى يا ست الكل يا قمر بيطل طول عمرك
- لسانك بينقط عسل
- أزيك يا أستاذ رؤف أيه يا أخويا هو أنا كنت بايتة فى
- حضنك والا أيه
- رؤف - أيه الكلام الخايب ده يا ست أم سعيد
- أم سعيد - أنا كلامى خايب . أنا أقصد اللي ما سلمت ولا
- مسيت ولا تحيت ولا أكنك سامعنى وكألك لا روح و لا
- جيت
- رؤف - لا مؤاخذه يا ست اصل بالى مشغول حبتين
- أم سعيد - وأييه اللي شاغل بالك وتاعب حالك وقالق
- راحتك ومغير أحوالك
- رؤف - أبدا حاجة خاصة مش لازم تعرفيها
- أم سعيد - خلاص أيها الكائن المتعصب مش عايزة
- أعرف أنت بصراحة بقيت أوفر ولا طايق نفسك ولا
- طايق بلوفر
- رؤف - أيه يا نادرة أحنا هنفضل واجفين نسمع أشعار
- الست أم سعيد إكده . مش هنطلع والا أيه
- رؤف - لا طبعا يا حبيبى يالا بينا هات أيدك
- أم سعيد - تحبى أجى أوصلك يا أستاذ رؤف

- رؤف - لا شاكرين الأفضال يا ست أم سعيد
- أم سعيد - طيب يا ندورة أطلعي دلوقتي وأنا ليا قاعدة
- معاكى علشان تحكىلى عملتى أيه فى البلد
- رؤف - ما هي إن شاء الله هتكون الصبح عند مامتها
- أبجى أسمعها وهي بتحكى لأمها
- أم سعيد - كدا طيب يا سى رؤف
- نادرة - تصبجى على خير يا خالتى
- أم سعيد - وأنتوا من أهل الخير
- نادرة - رؤف أنا حاسة أنك جاى على خالتى أم سعيد
- وتملى تطسها فى الكلام مش عارفة ليه
- رؤف - ماهى اللي بتجبرنى أنى أعاملها وحش والله يا
- نادرة
- نادرة - طيب معلىش يا سيدى . رجاء تبطل تبين لها أنك
- متضايق منها واد أنت شايف هي نفعانا أد أيه ، كفاية
- قاعدتها بولدتى
- رؤف - أه والله عندك حج يا حبيبتي . أوعدك أبجى
- أخلى بالى من هنا ورايح
- (فى اليوم التالى ذهب رؤف ونادرة للمشفى . وأخذت
- نادرة تحكى ما حدث لها فى البلد وأم سعيد تستمع فى ذهول
- أم سعيد - والله صبرتى ونولتى يا ندورة . والفرح
- هيبقى أمتى أن شاء الله
- نادرة - تانى يوم ماما ما تخرج بالسلامة بأذن الله
- (دخل الدكتور - ها أيه الأخبار يا حاجة
- زينات - الحمد لله يا دكتور البركة فيك

- الدكتور - لالا لا دا أنتى بقيتى عال
- نادرة - يعنى تخرج أمتى يا دكتور
- الدكتور - لا لسة شويه بس هى تحاول تقوم تتمشى
- علشان تلين الجرح وميشدش عليها ونطمئن أكثر
- أم سعيد - إن شاء الله يا دكتور هانمشيها
- فى اليوم التالى ذهبت نادرة لشراء ثوب العرس
- والشموع وكل ما يلزمها من ملابس ولوازم العرس قبل
- الذهاب للمشفى
- وفى منتصف الأسبوع ذهبت نادرة للبلد ورتبت
- ملابسها فى الخزانات . وذهبت إلى زوجة أبيها لتخبرها
- بموعد العرس
- وهناك قابلتها زوجة أبيها بالترحب وعبرت عن فرحتها
- بهذه المناسبة ووقرت عمل الطعام للعروسين لمدة 40
- يوم وفى موعد خروج الحاجة زينات من المشفى ذهبت
- لأذاها والعودة بها للمنزل وأستقبلوها الجيران أجمل
- أستقبال
- وبعد يومين ذهبت نادرة وأرتدت ثوب الزفاف وأتصل
- رؤف بوالده حتى يجهز الذبائح والأنوار وكل ما يلزم
- ليلة الزفاف من طعام ومشروبات وولائم وكل ما يجعلها
- ليلة من ألف ليلة وليلة وبالفعل
- كان رؤف مثل فارس الأحلام ونادرة مثل أميرة
- الحواديت
- أستقبلوهم المعازيم أستقبال رائع بالمزمار البلدى

- وكانت ليلة جميلة
- والعروسة والعريسكأنهم قمرين فى تمامهم
- رأت نادرة أم سعيد
- نادرة - يا خبر يا رؤف دى خالتى أم سعيد جت من غير عزومة
- رؤف - إكده طيب يالا بينا خدى يدى ويالا نجرى قبل ما توصل لنا
- أستغرب الجميع لجرى العروسين وهرولتهم
- زينات - على فين يا ولاد
- أشارت لهم العروس بباقة الورد التى بيدها وكلها سعادة
- رؤف - على شهر العسل
- وركبوا عربة جميلة مزينة بالورود وأنوار وذهبوا
- لمكان متفق عليه بينهم لا يعرفه أحد لعدم الأزعاج
- وجرت خلفهم أم سعيد
- أم سعيد - أستنوا يا ولاد . عايزة أبارك لكم
- توك توك

تمت بحمد الله